

2  
*Bonifacij Cannobij.*  
S A N C T I

DIDACI COMPLVTENSIS

C A N O N I Z A T I O.

Quam

SIXTVS V. PONT. OPT. MAX.

*Admiranda pietate, solemni ritu, frequentissimo cleri,  
populiq. conuentu, celebrauit*

vj. Nonas Iul. Anno M. D. xxcviii.

A PET. GALESINIO PROT. APOSTOLICO  
descripta, distinctaq. partibus tribus.



R O M A E.

Ex Typographia Vaticana. M. D. xxcviii.

B

Bartholomew

THE

OF

THE

THE

THE

THE

THE

THE



THE

THE

THE

POTENTISSIMO  
PHILIPPO II. AVSTRIO  
HISPANIARVM REGI  
CATHOLICO.



VI se instituit, Potentissime Rex, ita  
vt vitam pie, religioſeq. agat, is vere  
beatus eſt: in hanc enim ſententiam  
ſacræ litteræ, digito Dei ſcriptæ, lo-  
quuntur: BEATVS VIR, QVI TI-  
MET DOMINVM, IN MANDATIS EIVS VO-  
LET NIMIS. Vere igitur beatus Didacus et eſt, et  
habetur, qui pura, ſinceraq. pietate erga Deum, ac  
religione, vitam rite, atque recte conſtituit: quiq.  
vere pius, et religioſus, legum diuinarum medita-  
tione die, ac noctu vehementer delectatus, cum ni-  
hil haberet in vita hac antiquius, quàm vt illas cole-  
ret, atque obſeruaret, is, velut arbor ſecunda, ad  
confluentem ſata, vberrimos attulit fructus virtu-  
tum, quibus exornauit Eccleſiam Dei. Tantum ergo  
virum, ac vere beatum, diuinorum munerum copijs  
affluentem, et ſanctimonix laude florentiſſimum  
Maietas Tua Catholica diu maximopere ſtudit in  
ſanctorum, cum Chriſto Domino in cælis regnan-  
tium,

tium, numerum rite referri. Id iam primum a fel. rec.  
Pio Quarto Pont. Max. deinde a beatæ memoriæ  
Pio Quinto, qui pròximie ei in Pontificatum succes-  
serat, supplex et litteris et nuncijs summopere pe-  
tierat: postea a Gregorio Decimotertio, itidem ef-  
flagitarat: demum id ipsum summa prece postulauit  
a SIXTO QUINTO, Pont. cui beati Didaci cano-  
nizationis actus diuino erat consilio reseruatus. Is  
igitur, vt Pontifex est, ad Ecclesiæ ædificandæ et  
propagandæ studium attentissimus, ac diligentissi-  
mus, iusta atque æquissima in primis Tuæ Maiestatis  
Catholicæ petitione motus, ac Pontificiæ sollicitudi-  
nis officio, alijsq. præterea plurimis rationibus addu-  
ctus, rem tot ab hinc annis assidue vehementerq. ex-  
petitam, concessit et confecit: eo magnæ, vel summæ  
potius pietatis sensu affectus, eaq. erga eius Maie-  
statem, quam vnice in Christo diligit, paternâ chari-  
tate, vt illam intimi animi gaudentis lætitiâ, pijs  
meditationibus, in Pontificiæ suæ mentis sinu con-  
ceptam, lacrymis profusis expresserit: cum illum in  
rei, quæ sancte gerebatur, contemplatione fixum, in-  
deq. lacrymantem, non exiguo temporis spatio, ple-  
rique omnes ex infinitæ illius multitudinis frequen-  
tia conspexerint: quæ tâta tamq. innumera fuit, vt in  
mentem venirent illa prisca religionis nostræ tem-  
pora, cum Christiani omnes ad sacros festos, solem-  
nesq. dies concelebrandos purissime conuenirent.  
Id autem omne, quamquam ad eius Maiestatem,  
multorum, præsertim clarissimi Henrici Guzma-  
nij,

nij, Comitum de Oliuares, Oratoris, viri prudentia  
rerumq. gerendarum vfu præstantissimi, et aliorum  
litteris; ac nuncijs longe antea diligenter perlatum  
est: tamen Sanctissimus D.N. SIXTVS QVINTVS,  
eius singularis diuinaq. sapientia maximis in reipub-  
licæ Christianæ negotijs eius Maiestati, ceterisq.  
cognita est, ac perspecta charitas; spectatæq. amplissi-  
mæ virtutes, pro summa sua erga ipsam rempubli-  
cam solitudine, ac diligentia, proq. paterno amore;  
quo Tuæ Maiestatis, non solum pietatem eximie dili-  
git, sed gloriam ac dignitatem maximopere fouet;  
cum iam superioribus proximis mensibus in ea cura  
vehementer euigilarit, vt ipsius beati Didaci cano-  
nizationis actum perficeret: voluit etiam is, et pro  
rei, quæ rite solemniterq. acta, ac gesta est, comme-  
morabili magnitudine; et pro posteritatis, cui item  
consulendum fuit, rationibus, de Sancti illius vita,  
virtutibus admirandis, atque omnibus canonizationi-  
nis actis commentarium enucleate perscribi: idemq.  
ijs partibus, quas ad id perficiendum instructissi-  
mas, mihi demonstraui, recte absolutum, re-  
gio Augustoq. nomini tuo inscriptum ad te mit-  
ti. Ego sane pro mea tenuitate feci, quod Ponti-  
fex iusserat: vellem id effecissem, quod et rei, quam  
scripsi, magnitudo postulare videbatur, et a me de-  
poscebat Maiestatis Catholicæ dignitas, et in primis  
voluntas requirebat Pontificis, et SIXTI Pontificis:  
qui, vt excelsus est magnoq. animo, et virtutibus exag-  
gerato, ita summa omnia cupit, summeq. præcel-  
lencia,

lentiâ, ac numeris omnibus perfectâ, tantisq. non  
solum eloquentiâ, sed eruditionis munita præsi-  
dijs, quanta vel maxima, animus eruditissimi viri  
studijs exquisitissimis capere potest. Non equidem  
id mihi arrogo, vt tantum me affecutum putem,  
quantum ille maxime concupierat: sed affirmare  
hoc possum, sapientissimi Pontificis, qui Maiestatis  
Tuæ Catholicæ studiosus est, atque cupidus, deside-  
rio incensum, me in magna difficultatum, quibus  
huius scriptiōis meæ cursus retardari, aut certe im-  
pediri videbatur, concursatione, sine vlla aut labo-  
ris, aut occupationis, aut temporis exceptione, Ma-  
iestati Tuæ id opus præstare: in quo ea mihi ad scri-  
bendum proposui, quæ in primis ad gloriam Dei  
omnipotentis, tum ad Sancti; cuius vitam litteris  
mandare studui, laudes, tum ad ecclesiæ catholicæ  
amplitudinem, tum ad Tuæ Maiestatis, cuius causa  
Pontifex SIXTVS de Sancti illius virtutibus com-  
mentarium hoc scribi voluit, splendorem ac pieta-  
tem pertinere possent. Non igitur dubito, quin ipse,  
Rex Maxime, ea, qua abundas, benignitate, grato, li-  
berali, vèreq. regio animo id accipias: cum et præci-  
puum quoddam sit Augustissimæ Tuæ pietatis mo-  
numentum, et insigne quoddam pignus paternæ cha-  
ritatis, qua erga te Regem Catholicum omni laude  
præstantem, Pontifex Optimus egregie affectus id  
fieri, et Tuæ Maiestati dicari iussit: vt in eo, tam-  
quam in speculo, assidue contēpleris amplissimas il-  
las, ac diuinas virtutes S. Didaci, quem præcipue tibi  
pro-

proposuisti cū ad venerationem , tum ad imita-  
tionem, ad illumq. pietatis cursum, quem Deo bene-  
dicente , iamdiu tenes summa cum laude . Ego ve-  
ro quoniam miro diuturnoq. ardeo desiderio colen-  
dæ Catholicæ Maiestatis Tuæ ob merita , quorum  
gloria longe omnium florentissimus es , in eam cu-  
ram perpetuo incumbam, vt si qua in re possum, ali-  
quod semper tuæ gloriæ officium nauem ac præ-  
stem industriæ meæ . Interea Deum Opt. Max. af-  
sidue precabor , vt Maiestatem Tuam , reipubli-  
cæ Christianæ incolumem conseruet quam diutissi-  
me . Romæ ex Vaticano . Idibus Decembris .  
M. D. X X C V I I I .

*Maiestatis Tuæ Catholica*

*Seruus deditissimus*

*Petrus Galestinus, Prot. Apostolicus.*





DVLCI LIGNVM. DVLCES CLAVOS. DVLCIA FERENS PONDERA .  
QVAE SOLA FVISTI DIGNA PORTARE REGEM CAELORVM ET DOMINVM



# S. DIDACI COMPLUTENSIS

V I T A.



ÆLESTIS ille Spiritus, a quo diuina mune-  
ra manant, magnis donis, splendidissimisq.  
ornamentis beatum Didacum Compluten-  
sem illustrauit: quem nuper, ob præclara me-  
rita, efflagitante Philippo II. Hispaniarum  
Rege catholico, eximia pietate florentissi-  
mo, SIXTVS QVINTVS Pontifex Maximus, idemq. et  
religiosissimus, et sapientissimus in sanctorum numero ascrip-  
sit. Admirandas igitur eius res, vitamq. omnem, religionis  
ac sanctitatis laude cumulatam, scripturus, id mihi argumen-  
tum suppeditari video: quod non verbis tantum, delectu et  
splendore illustribus, enarrandum est, sed sacrarum litterarum  
sententijs, atque demonstrationibus dilucide explicatis. Fuit  
enim is vir simplex, rectus, timens Deum: quiq. vsque adeo  
cunctis virtutibus præluxit, vt quod diuinitus scriptum est, de  
eo dici liceat: Quasi vas auri solidum, ornatum omni lapide  
pretioso. Charitas, virtutum omnium princeps, quæ auri no-  
mine significatur, mirifica in eo extitit: humilitas autem sum-  
ma, pietas singularis, orationis ardor incensus, abstinencia in-  
credibilis, ceteraq. itidem virtutes, quæ a charitate profisciscu-  
tur, et charitatem exornant, quæq. tamquam insignia gem-  
marum ac margaritarum ornamenta, maxime in viro Dei  
enituerunt. Quamobrem in tanta scribendi copia, quæ mihi  
proponitur, modum in primis seruabo: vt non vberime so-  
lum, sed distincte, atque ordine res omnis exposita videatur.  
Neque autem, cum locus inciderit, commemorare prætermit-  
tam lacrymas, suspiria, gemitus, atque ardentissimum illud

*Iob 1.*

*Eccli. 30.*

A

cæli

cæli desiderium, quo Dei seruus Didacus inflammatus, omnia huius vitæ incommoda, molestias, ac labores facillime tolerauit: immo labores otio, tempestates tranquillitati, pericula securitati in omni temporum varietate prætulit. Iam nunc primum more maiorum, qui in huiusce scriptiois cursu cum laude versati sunt, illius genus, vitam, mores, ac virtutes exponam: deinde ad veram solidamq. enarrationem accedam certissimorum illorum miraculorum, quibus ad sempiternam gloriam insignibus, Deus mirabilis in sanctis suis, illius sanctitatem et testificatam, et illustratam esse voluit. Ita opinor, fiet, vt, adiutrice diuina gratia, vtilis ac salutaris futura sit omnis hæc, quæ a me studiose suscepta est, commemoratio. Exempla namque virtutum, quarum laude viri sancti celebrantur, ad eorum nos imitationem excitant: miracula autem, quæ illorum gratia Deus edidit, ad diuinum eius amorem nos vehementer incendunt: cum immensam illam benignitatem et charitatem perpendimus, qua, quod sibi diuinitatis iure proprium est, non modo ipsis sanctis hominibus, sed eorum semicinctijs et sudariolis communicare dignatus est. Et quoniam res cunctas, ab eo mirabiliter ac diuinitus gestas, recensendo persequi, longum nimis esset ac pene infinitum opus, ex ijs multas accurate seligendas putauit: et illas quidem potissimum, quibus tum magis diuinæ erga virum sanctum bonitatis splendor elucescit: tum ardentius animi ac mentes legentium inflammantur ad illius diuinæ benignitatis amorem. Ijs, vt diligentissime potero, explicatis, quæ sunt præclara inuenta virtutum, et testimonia luculenta meritorum, ob quæ Deo dilectus Didacus a SIXTO QUINTO Pontifice in sanctos relatus est: consequens etiam existimaui, ne quid ad huius scriptiois meæ cumulum desit, acta omnia, solemnesq. ac statas illas, plenas diuinorum mysteriorum caerimonias exponere, quæ ex catholice ecclesie instituto atque vsu adhibitæ sunt, ad illud pontificium et sacrosanctum canonizationis munus. Hæc autem omnia a me exordij loco dicta sint. Nam etsi ex rhetorum præceptis in hoc scribendi genere nullum, aut certe breue exordium fieri oportuit: tamen pro sancti viri, cuius vita commemoratur, ratione, proq. factorum eius dignitate præfari ita libuit: vt præsertim rerum, quæ magnæ ad scribendum

Pf. 67.

A. 19.

dum proponuntur, quæq. longo commentario opus habent, ordinem in ipso exorsu omnes facile intelligant. Verum iam locus postulat, ut ipsam narrationem ingrediar. Nihil mihi nec ad officium aptius, nec ad laudem amplius, nec ad delectationem iucundius, nec ad salutaris disciplinæ fructum vtilius contingere potuit, quàm diuinas res vitamq. tam sancti viri ad posteritatem litterarum monumentis prodere, et laudes illius celebrare: qui charitate summa exardescens, in ijs euigilauit curis, in eaq. assidua pernoctauit cogitatione, ut Christi Domini gloriæ seruiret omnino. At cum mihi in mentem venit, ad munus, quod suscepi, in primis opus esse castissimi animi meditationibus, et morum innocentia: cumq. video non omne vitæ meæ tempus me in Dei sanctorumq. laudem contulisse: huius meæ conscientiae metu, a præclaro conatu deterreri posse video. Itaque Deum optimum maximum, qui prunæ ardore abstergit linguam, quam se pollutam habere Isaias profitebatur, id continenter precor, ut diuino spiritu intimos meos sensus ab omni labe purus reddat, oris mei impuritatem, quam ex prophanis sermonibus contraxi, abstergat, mentemq. exurat et inflammet ad diuinam eius gloriam celebrandam in sancto viro Didaco: cuius vitam, clarissimas virtutes, resq. mirificas scribendi initium in præsentī facio. Isa. 6.

*De tempore, quo nascitur. I.*

**P**RIMUM igitur, ut ordine, quem mihi præscripsi, narrationem instituam, de tempore dicam, quo is editus est in lucem. Id accurate, ac diu inuestigatum, non compertum habetur quicquam certi, quod assueueranter scribi possit. At coniectura hoc ipsum perspicere facile potest. Certis enim litterarum publicis monumentis, Romam ab Hispania recte allatis, proditum est, illum ad summam senectutem vixisse, annoq. millesimo quadrigentesimo quinquagesimo, Nicolao Quinto Pontifice, ad Iubilei celebritatem, in urbem venisse, et vèro annis post duodecim e corporis ergastulo solutum, abiisse in cælum. Ratione igitur inita huius temporis, quod certum notaui, cum esset is ætate scilicet ingrauescente peneq. decursa: credibile sit, vel potius vere dici licet, illum exortum esse aliquanto ante

millesimum et quadrigentesimum annum a Christo nato. Neque propterea fortasse a vero alienum erit affirmare, eius ortum incidisse in tempora Bonifacij Noni Pontificis: qui, pontificatum iniens anno M CCLXXXIX. gessit annis circiter quindecim. Quo tempore Hispania, Henrico III. Rege, maxime floruit: ab ea tamen re felicior extitit, quod virum talem peperit, cuius sanctitatis odor in omnem ecclesiam diffusus est. Sed hinc, res mira silentio prætereunda non videtur. Erat beatæ Mariæ virginis Visitationis celebritas aliquot ante annis ab Urbano VI. Pontifice instituta: quæ cum non esset, adhuc inducta in consuetudinem, aut forte temporum iniuria in cultu esse desisset: illam idem Bonifacius ad usum reuocauit, indulgentiarumq. munere auctam, solemniorem reddidit. Diuino consilio factum est, vt qui dies in celebri veneratione esse cœpit, cum beatus Didacus tunc primum in lucem editus, aut infans, puerve extitit, eo ipso sacro solemni die, tam multis post annis, a SIXTO QUINTO Pontifice, Philippi Regis rogatu sit in sanctorum Confessorum numero collocatus. Verum id omne copiosius loco suo infra enarrandum erit.

*De prouincia, et loco vbi nascitur. II.*

**D**Ei munere, beneficioq. Hispania iam inde vsque ab eo tempore, quo Apostoli, et apostolici viri splēdidissimum fidei ac virtutum Christianarum ornatum explicarunt, tam mirifico illo splendore incensa, dementis superstitionis falso cultu abiecto, ardens amplexa est sanctissimam Christi Domini religionem. Quo factum est, vt in omni temporum varietate, quibus contra ecclesiam Dei bellum exarsit, magnam ac firmissimam martyrum multitudinē, quasi cohortem quandam prætoriam, in aciem eduxerit. Eamq. ob rem admirabilis elucet Christiana virtus Hispanorū, qui fide imbuti, ad eam tuendam sunt confirmati vehementius. Nulla ferme est Hispaniæ ciuitas, quæ aliquo nomine clara, etiam non sit nobilitata martyrio multorum. Neque attinet omnes enumerare, cum præsertim ecclesiastici annales non obscure loquantur. At hoc meminisse gloriosum est, atque iucundum, pro Christi fide, Diocletiano et Maximiano Imperatoribus, Cæsaraugustam,

flam, quæ vrbs in Hispania est regionis Sedetaniæ, ita contēdisse, et dimicasse, vt cum omni alia non modo ciuitate, sed prouincia comparari optimo iure, meritissimoq. possit. Id testatissimum fecit Prudentius hymno illo elegantissimo, quem *Prudentius. Hym.* de martyribus octo et decem Cæsaraugustanis scripsit. Fuerunt semper in omni Hispania, et sanctitatis, et doctrinæ gloria præstantes non modo Antistites, sed alij cuiuscūque ordinis et loci viri, quos non est, cur nominatim appellē. Iam vero synodi, in quibus Christiana morū disciplina maxime illustris est, quàm antiquæ, et quàm frequentes extiterint, id cum Illiberis, tum Toleti monumenta declarant. Conuentus autem Toletani quattuor et viginti, atque adeo amplius numerantur. Nulla enim toto orbe terrarum est vrbs, vbi sæpius concilia prouincialia coacta sint, eaq. recte atque ordine habita. Episcoporum item multitudinem demonstrant tabulæ dyptichæ Hispanienses: in quibus etiam cernitur numerus satis magnus ecclesiarum, præsertim cathedralium. Atqui eæ sunt fere omnes censu amplissimo auctæ, ac multæ admirabili opere, augustissimisq. donis excultæ. Hæc omnia ob oculos ponunt singulare religionis Christianæ studium: quo perpetuo omnis Hispania floruit. Alia multa extant, quæ ad illius gloriam redundant. Regnis namque duodecim constat, quæ magna amplaq. habent vectigalia. Archiepiscopatibus quinque circumscribitur præter Vlyssiponensem: qui in Lusitania a Bonifacio Nono Pontifice, tum primum, pro temporū ratione, paulo ante notata, institutus est, cum beatus Didacus nondum ex pueritia excesserat. Idq. a me dictum esse volo, vt ad illius ætatem, quam proposui, aliquid non modo quod certum, sed quod insignē sit, semper accedat. Verum Hispania, quæ non solum tantis ornamentis, sed magnis etiam rerum copijs circumfluit, quæ ad vitæ vsum, et cultum pertinent, hanc præter ceteras summam quoque laudem et domi, et foris habet, quod maximo exornata est Sanctorum numero. Neque hic longe repetenda sunt vltima illa tempora: cum proxime sint, qui eam collustrarint. Non multis ab hinc annis Vincentium Valentini ordinis S. Dominici Callistus Tertius, et nuper S I X T V S Q V I N T V S Didacum Complutensem ordinis seraphici Fræcisii, vtrumque hominem Hispanum, in sanctos retulit. Res est,

est, quæ post martyrum memoriam, diuino munere, soli tantum Hispaniæ successit, alij præterea nulli prouinciæ, vt duos habuerit, qui tam exiguo temporis spatio interiecto in sanctis adscriberentur. Beatus igitur Didacus, Hispanus fuit, in Bætica prouincia, oppido quodam natus, quod sancti Nicolai nomine appellant. Est id ditionis Hispalensis, inter Constantinam, et Casaliam situm. Bætica prouincia, a Bæti fluuiio vocata, quem Guadalquivir, nempe fluuium magnum Arabico vocabulo appellant, Granatæ partem intra fines suos continet, vrbesq. habet multis nominibus illustres: quarū caput ac metropolis est Hispalis, in cuius ditione beatus Didacus nascitur. Ea vrbs, quam Sibilliam Mauritano nomine hodie vulgo dicunt, scriptorum iudicio multis Hispaniæ ciuitatibus anteponitur. Est circuitu ampla, forma rotunda, aspectu pulchra, mœnibus et propugnaculis munita, plateis et vicis hilara, ædibus insignis, hortis et fontibus amœna, templo maximo nobilis, et ecclesiarum multitudine celebris, sacerdotibus exulta, ciuium plena, equitibus referta, mercatorum commercijs opulenta, liberalibus studijs affluens, artibus adornata, agri vberitate valde admodum fertilis, nauigiorum numero copiosa. Sed est ea laude florentior, quod perpetua habet monumenta Christianæ religionis et disciplinæ. Sunt Hispali beatissimi martyres: qui Daciano Præside et Diogeniano eius Legato, fortissimi pro Christi fide heroes, dimicationem tum susceperunt, tum confecerunt, Carpophorus et Abundius, Petrus et Florentinus, Iusta et Rufina virgines. Synodi duæ Hispalenses, vna prior, altera posterior, ad pietatis officia insignes. Episcopi autem extiterunt, doctrinæ et sanctimonix gloria præstantes: in quibus potissimum eminent duo, Leander, et Isidorus. Tanti autem Hormisdas Pontifex fecit Hispalensis Episcopi dignitatem, vt ei Sedis Apostolicæ auctoritatem delegarit, quam in omni et Lusitania, et Bætica gereret. Hæc sunt ornamenta Hispalis vrbs: intra cuius fines cum, vt dixi, positum sit Sancti Nicolai oppidum, e cuius visceribus beatus Didacus in lucem prodijt, sicut florentissimæ illius ciuitatis splendore obscurum esse nullo modo potest, ita maxime illustre factum est ortu illius tam magni viri, omni virtutum in ecclesia Dei prælucensium laude clarissimi. Neque quicquam opus est, cur de illius patria



patria pluribus scribam; cum sanctorum non hæc terrena sit, sed cælestis illa ciuitas, inquit Basilius Magnus.

*De parentibus. III.*

**B**EATI Didaci parentum nomina ignorantur, vt sancti Hilarij Episcopi Pictaueusis, et aliorum fortasse multorum, quorum nomina scripta sunt in cælis. Natus est autem parentibus etsi forte humilibus, ac certe Christianis, et antiqua, vera solidaq. pietate imbutis: quales fuisse conuenit, a quibus filius, tantus vir futurus, ad tam præclara pie agendi officia, primum incunte ætate informaretur. Non genus nobile, aut ignobile Deus spectat. In veritate comperi, inquit beatus Petrus, Apostolorum princeps, quòd non est personarum acceptor Deus: sed in omni gente, qui timet Deum, et operatur iustitiam, acceptus est illi. In omni ordine, gradu, et statu nouit Dominus, qui sunt eius, et miseretur cui voluerit, et misericordiam præstat, in quem sibi placuerit. At beatus Didacus, quamuis nobili forsan genere non esset, cum huius vitæ cursum sanctissime cōfecerit, egregiarum virtutum exempla documentaq. præbuerit, rerum admirabilem, ac diuine gestarum splendore eluxerit, ad magnum, vel potius summum claritatis splendorem ascendit. Hanc generis nobilitatem et dignitatem Christus Dominus hominibus attulit, qui illum sequerentur, vt filij Dei vocarentur, et essent. Si filij, inquit beatus Apostolus Paulus, et heredes, heredes quidem Dei, coheredes autem Christi. Qui spiritu Dei, inquit idem, aguntur, hi filij Dei sunt. Summo genere igitur est beatus Didacus, qui diuino spiritu impulsus, se totum ad Christi studium contulit, et illius crucem amplexatus est animo ardentissimo. Sed locis suis hæc omnia exponuntur. Nam, vt recte ad narrationis cursum progrediar, de eius nomine dicendum est.

*De nomine. IV.*

**P**ARENTVM autem pietatem indicat nomen, quod filio, vt ritus postulat, in baptismo imponi voluerunt. Iacobum enim dixerunt: quod nomen Apostoli est, cælestis Hispaniarum



niarum aduocati. Id ab ijs, qui religionem Christianam integre, pure, pieq. colebant, eo consilio factum est, vt suscepta proles frequenti nominis recordatione ad imitationem excitaretur virtutum tanti Apostoli: et quem imitari studeret, eum quoque precaretur, ac speraret sibi patronum ad salutem tum animæ, tum corporis defendendam futurum esse. Pium fuit ac sapiens parentum consilium: resq. præclare cecidit, vt maxime concupierât, atque optarant. Didacus enim filius, Apostoli virtute, et sanctitate accensus, spretis et contemptis huius vitæ rebus, quæ nihil solidi, nihilq. expressi continent, sed inanem quandam bonorum imaginem præ se ferunt, Christi Domini crucem vsque adeo secutus est, vt in omni vita diuelli ab ea non potuerit. Re igitur præstitit, quod nominis notione et significatione præ se ferebat. Nam Iacob Hebraice, supplan- tator Latine dicitur. Is autem quasi suppositis huic sæculo pedibus, ita ardenti cæli desiderio exarsit, vt mox infra narrabo. Eum Hispanice vulgo appellant Diegum, quem etiã plerique Didacum dicunt. Atque hoc ipso quidem nomine permulti sancti viri vocati sunt, quorum vnus est Didacus, Episcopus Vercellensis, sanctitatis laude clarus.

*De vita eremitica, quam beatus Didacus primo suscepit. V.*

**T**ANTA vis est amoris erga Deum, quantam non solum ex beati Pauli testimonio, sacrisq. litteris, sed ex omnibus alijs Christianæ pietatis monumentis intelligi licet. Diuina charitate accensi Christiani homines neque minis, neque terroribus, neque doloribus, neque supplicijs, neque mortis immanitate, nec hostis sempiterni truculentia, nec vllis denique rebus alijs vel maxime horribilibus labefactari, infringi, et a Christi Domini fide auelli, atque abstrahi vniquam potuerunt. Gladios spernebant, in ignes irruebant, cruciatus appetebant, in tormentis vitam abijcere cupiebant. Eo ipso cælestis amoris ardore inflammati Dei homines, postquam diuino beneficio omnis persecutionum tempestas esse desijt, Paulus et Antonius in Ægypto, Hilario in Syria, Macharius in Thebaide, Pachomius etiam, et alij deinceps, ab omni hominum conspectu remoti, vastas illas solitudines non horrerunt, sed vltro adie-  
runt:

runt: in ijsq. ab huius sæculi iucunditatibus alienam vitam secuti, ita crucem omni durius viuendi genere amplexati sunt, vt tota illorum mens, in Christi imitatione defixa, tantum cælestia meditaretur. Eodem amoris erga Deum studio exardescens beatus Didacus, mundi huius pericula fugiens, eorum sanctorum virorum exemplo vitam in solitudine, sibi primum delegit. Itaque ab ineunte ætate pijs operibus deditus, iam adolefcentis vna cum quodam sacerdote, diuinæ pietatis laude clarissimo, quem voluntariæ paupertatis, vigiliarum, ieiuniorum, abstinentiæ, continentiæ, innocentiae, orationum, omnisq. spiritualis exercitationis socium, ac testem habuit, ad eremum venit, quæ ab oppido sancti Nicolai, eius patria, prope aberat. Eo loci multos annos mansit: vbi cælestium meditationum pabulo animum alebat: corpus autem duriter, sanctorum eremitarum more, sustentabat eleemosynis. Otium, quod vitiorum omnium seminarium est, vitabat omnino. Itaque, quod salutare, ac vetus eremitarum institutum fuit in illis Ægypti præsertim solitudinibus, cum magnam temporis partem diu noctuq. in sancta contemplatione, et oratione posuisset: quod reliquum erat, ad opera manuum traducebat. Immo dum ore, aut mente Deum precabatur: interim etiam manus haudquaquam otiosas esse voluit. Idq. omne faciebat non ob victus solum necessitatem, sed ob animæ salutem. Ne perniciosæ cogitationibus vagaretur mens, otio languescens, et instar fornicantis Hierusalem omni transcunti diuarcaret pedes suos. Varia igitur vascula e iunipero contexebat, cochlearia conficiebat, et item exigua salina. Ea dono dabat ijs, qui in eleemosynam conferebant rem aliquam, vel minimam, victus sui tenuitati necessariam. Si quid autem, qui munuscula ab eo acceperant, dare præterea vellent, id summo opere recusabat, cum eius, qui in eremum se abdidit, diuitiæ tantum sint, tunica, cuculla, palliolum, et meditationum liber: id quod de beato Hilarione scriptum sanctus Hieronymus reliquit. Ex oppido sancti Nicolai cum aliquando ad eremum rediret: sacculum in viâ, plenum nummorum inuenit, quem ne manu quidem capere, ne dum sibi acquirere voluit, paupertate summa contentus, cuius studio mirum in modum deditus erat. Ad oppidum propterea continuo reuersus, quem fortuito primum

*S. Hieron.  
ss. l. op. 4.  
ad Rusi.  
Ecc. 10.*

*Id. ss. l. 2.  
in vit. Hil.  
laronis.*

offendit, ei certum locum demonstrauit, vnde cum sacculum nummularium acciperet. Humilitatis autem, quæ virtus Christianæ religionis propria est, ac virtutum omnium seminariū; officia ita coluit, vt ea, et charitate, qua omnes eximie in Christo diligebat, maximam excitaret admirationem sui. Sed de ijs ipsis alius erit enucleatiuè perscribendi locus. Quoniam igitur is, vt homo erat, qui in animo de se humiliter sentiebat, seq. præ ceteris contemnebat, ab illa nominis sui gloria; in patriæ, illiusq. regionis fines longe diffusa, valde abhorrebat: ab eremo discessit ad Conuentum Arrizafæ, qui est ordinis sancti Francisci, non procul Corduba distantem: vbi, diuina ope adiutus, maiores in via Domini progressiones habuit, vt mox narrabo.

*De ingressu in religionem S. Francisci. VI.*

**S**PIRITV diuino ductus Cordubam venit ad eum conuentum: vbi, artioris obedientiæ vinculis deuinciri cum maxime cuperet; in seraphici sancti Francisci adscriptus est ordine, quem vulgo Obseruantium nomine vocant. Mirifice illum ad omnem sancte progrediendi rationem adiuit Dei benignitas, si cuncta, vt par est, accurate perpenduntur. Est Corduba, quasi cor Bæticiæ prouinciæ, vrbs antiquissima, a Marco Marcello condita, vel potius instaurata, Patriciorum Romanorum colonia, ad Bætum fluuium sita, cuius totus ager frugiferus est, ac fructuosus, cum antea præclaris virorum ingenijs præstitit, tum rei militaris gloria circumfluxit. His alijsq. rebus nobilitata, at longe nobilissima extitit, cum pro Christi Domini fide, cuius mysterijs ab initio ferme Christianæ religionis imbuta est, præclaras illas dimicationes ac pugnas egregias suscepit et confecit. Cordubensium enim martyrum, quorum sanguine illa ciuitas consecrata est, ingens numerus putatur, fortasseq. maior multo, quàm ceterarum Hispaniæ urbium, quæ illustribus pro Christi nomine victorijs excellunt. Neque autem solum Diocletiano, et Maximiano Imperatoribus, a quibus cum vbique terrarum, tum in ipsa Hispania teterrimi belli incendium magnum contra ecclesiam Dei excitatum est Daciano, Dione, et Eugenio ducibus, contra fidei hostes Cordubæ summa

summa constantiq. contentione pugnatum est: verum etiam aliquot post sæclis aduersus Gothos, Arianæ hæresis furore inflammatos, nominis populiq. catholici hostes infensissimos, certamina ad sempiternam laudem insignia sunt, coronæq. maxime illustres Cordubensium martyrum. At in Arabicæ gentis, Mahumetanæ superstitionis facie contaminatissimæ, eamq. ob rem feritate immanissimæ dominatu, vix dici potest, quàm magnum, ac gloriosum sit pietatis nomen, quo ciuitas Cordubensis maxime illustris videtur. Ea vrbs, tantorum martyrum gloriosis trophæis ornata, magnisq. pietatis ornamentis locupletata, Dei hominem, qui ad Sanctorum imitationem se contulerat, potuit bene iuuant Deo, vt credibile sit, in dies magis atque magis accendere ad illas spirituales progressionem, quæ sibi diuinitus in cordis visceribus fixæ, infidebant. Inde enim vix mille et quingentis passibus procul eo in conuentu cum habitaret: multum adiumenti, auctore et duce Spiritu sancto, consecutus est non solum ex recordatione vrbs, sanctorum copia circumfluentis, sed ex anniuersarijs eorum natalibus diebus: quorum celebritas, quasi liber quidam, animos mentesq. hominum piorum, meditationis assiduitate vtentium, instruit ad eos ipsos imitandos, qui sunt nomine non tantum, sed memoria atque imitatione dignissimi. Iam vero aliquot annos in patriæ cremo beatus Didacus posuerat: diuina factum est voluntate, vt is vitæ eremiticæ exercitationibus præclare antea institutus, ad illum, quem dixi, seraphici Francisci obseruantium fratrum conuentum se reciperet: vbi pietatis ardore et progressionem disciplinæ asscutus est omnia, quæ sibi maxima proposuerat ad vitæ perfectioris imitationem. Nam, vt sapiens quidam vir, sanctorum institutionum vsu peritus, scite dixit, domus, religiosorum hominum conuentu referta, quædam quasi officina est exemplorum: quibus vniuersæ atque adeo sigillatim, quicumque in eo coetu numeroq. adscribuntur, instructiores fiunt ad recta summarum virtutum officia. Sunt in eo communi bene instituto domicilio, qui humilitate et mansuetudine, alij qui charitate, alij qui abstinentia, alij qui meditationis et orationis studio præsent, nonnulli etiam qui aliorum cælestium donorum splendore præluceant. Quo fit, vt in tanta bonorum quasi suppellectile et

copia, cum quis ab vno aliquid, ab altero aliud, ab alijs alia, et ab omnibus denique omnia capiat, opibus circumfluat documentorum, quibus in omnes virtutum partes conformari possit ad perfecte sancteq. agendum. Erat illis temporibus seraphici ordinis religio, quàm florentissima nomine sanctimoniae, cum praesertim ad antiquam illam disciplinam, ab auctore parenteq. beato Francisco institutam reuocasset paulo ante Bernardinus Senensis, cuius memoria in benedictione est. Numquam satis oratione explicari possunt illa virtutum curricula, quibus tunc beatus Didacus progressus est ad viam Domini: in qua iam diu impressa habuerat vestigia. Sed misericors et omnipotens Deus, qui disponit omnia suauiter, qua est immensa bonitate, illius recte progredientis cursum alia etiam ratione incitauit. Etenim is, rerum omnium auctor et conditor, vt solem, qui ceteris sideribus lucem praebet, principem locum habere voluit: sic beatum Franciscum, nimirum seraphici ordinis parentem, tamquam aliquem in stellis solem, maiorum nostrorum memoria dedit: vnde, qui illius disciplinae ac regulae se vmquam dedissent, clarissima virtutum omnium exempla haurirent. Didacus igitur beatus, ope diuina subnixus, seraphici illius patris imitatione, quàm miras ad sancte agendum progressionem habuerit, mox ordine exponam.

*De diligenti studio, quod adhibuit seruandis seraphica regula institutis.* V I I.

Mat. 11.

Rom. 12.

1. Pet. 1.

2f. 119.

**I**AM inde ab adolescentia is cum suaue Christi Domini iugum subierit: non huic saeculo, eiusq. desiderijs, quemadmodum dixi, in posterum alligatus, quaesivit aut egit, quae gentes inquirunt, sed quae Dei sunt. Vbi vero primum sancti Francisci regula, vitaeq. seraphicae institutis se deuinxit, vt verus obedientiae filius, paratus in omnes voluntates Dei, mirifice cucurrit viam mandatorum eius. Omnes igitur cogitationes suas in eo potissimum fixas habuit, in eoq. omnibus viribus contendit, vt, quam viuendi disciplinam sibi delegisset, eam singulari studio, atque omni officio exprimeret. Id quo rectius, et perfectius in ordine seraphico praestaret, illius regulas, constitutionesq. memoria complexus, eas ad vitae vsum et consue-

consuetudinem quotidianam adduxit. Nemo proculdubio illis seruandis diligentior, quàm is fuit: qui non tantum ne minimum quidem ab earum præscriptis discessit, sed zelo exarsit, vt si quem fortasse in illis aliquando quicquam offendere animaduerneret, ad earum obseruationem, cohortationibus, monitis, et præclaris exemplis reuocare studuerit perpetuo. Quare magnam in primis religiosi viri opinionem concitauit, et sustinuit apud omnes: qui aut in eodem conuentu permanerent, aut aliunde, etiam ex disiunctissimis prouincijs, illuc confluerent. Ij peragratis multis diuersisq. prouincijs, cum plurimorum hominum religiosorum vitas moresq. perspectos et exploratos habuissent, illud asseueranter in vulgus dictitabāt, se eorum, qui perfecte exequendis beati Francisci regulis omnibus Didaco par esset, vidisse vsquam neminem. Hoc autem in omni eius vita cunctis perspicue manifestum est, idemq. in obitu apparet: quandoquidem in ipso pene temporis puncto, quo animam Deo reddidit, non aliorum recordatione, sed sponte sua petijt, se vestitu rudi indui et cingulo funeo, vt ne moriens quidem negligeret, quod ad regulæ vsum pertinere norat. Itaque tam inflammati ad seraphici ordinis præcepta seruanda studij viam ille primum ingressus, non modo aditum quendam exiguum, sed latissimum sibi campum patefecit, in quo exercitationes, et curricula conficeret summarum et diuinarum illarum virtutum, quarum vestigia, ad sempiternam memoriam impressa reliquit, vt distincte, distributeq. omnia demonstrabo.

*De eius humilitate.*

*VIII.*

**A**D quem respiciam, nisi ad pauperculum, et contritum spiritu, et tremementem sermones meos? dicit Deus omnipotens. Paulo ante exposui humilitatem, quam beatus Didacus, cum apud sancti Nicolai oppidum in eremo vitam duxit, mirifice coluit. Neque propterea tamen narratio repetita videri debet: cum in ætatis suæ cursu maiores longe progressiones fecerit ad amplissimam illam, vel potius summam virtutem, cuius tanta vis est, vt cælum etiam penetret. Humilitatis, qua præluxit seruus Dei Didacus, argumento multa sunt, vita asperrime



asperrime acta, corporis cruciatus, sponte suscepti, singularisq. abstinencia victus, perpetuus fere ieiuniorum cursus, assiduæ in oratione pernoctationes, labores incredibiles, atque opera abiecta, ac demissa, quæ præ charitate magna præstitit. Sed hæc omnia facile intelliguntur, cum infra non curiose, sed pie commemorabuntur. Respexit autem Deus illum, pauperem spiritu, nimirum humili et demisso animo, pio metu in lege diuina ambulantem: et ita respexit, ut eius humilitatem etiam ex eo perspicere liceat magnam fuisse, Deoq. gratam, quia illum humiliter precantem, mirandis in rebus diuina benignitas exaudiuit. Non superbi, ut diuinis in litteris scriptum est, placuerunt tibi Domine: sed humilium, et mansuetorum semper tibi placuit deprecatio. Miraculorum vero, quorum splendore is claruit, magnitudinem ac multitudinem altera huius commentarii parte explicabo, ut initio proposui. Atqui testes extant grauissimi viri, quorum alij vnus virtutis, quidam ceterarum multarum testimonium ei præclarum dicunt, omnes autem vno ore humilitatem eximie laudant, qua illius memorie hominibus in ordine Minorum excelluit, nimirum in exercitatione, atque usu diu versatus meditationum vitæ Christi Domini: qui in terris primus tantæ virtutis scholam instituit.

*Phil. a.* Is filius Dei, cum in forma Dei esset, neque rapinam arbitraretur se esse æqualem Deo, se ipsum ad humilitatem nostram demisit, in similitudinem hominum factus, et forma inuentus ut homo. Is vitam in terris humilem, et ab omni cultu elegantiaq. remotissimam secutus est: insignes contumelias pati, grauissimas ignominias accipere, multis flagris cædi, et quod mortis genus olim erat maximo dedecori, in crucem tolli voluit. Humilitatis igitur, quæ virtutum omnium radix et custos est, auctorem Christum, rerum cunctarum Dominum, habuit: cuius in primis magistri cælestis exemplis instructus, frequentibus illis in meditationibus, quas ad eius crucem adhibebat, præclarissimam tantæ virtutis vim animo mentiq. suæ mirabiliter impressit. Et, ut erat, quemadmodum loco suo exponam, beatæ Mariæ virginis, Dei matris cultor egregius: in eius sacris festisq. anniuersarijs potissimum diebus, cum eam omni pietatis officio præcipue veneraretur: tum ad imitationem animo cernebat sibi propositas esse reliquas eius virtutes omnes,



nes, maximeq. humilitatem, quam Deus in ancilla sua respexit. In his sanctarum contemplationum scholis exercitatus beatus Didacus non potuit, vt humilitas in hominibus inueniri potest, non esse summe humilis: cum præsertim humillimæ vitæ ducem sibi delegisset seraphicum Franciscum: qui, diuina adiutrice gratia, cum ad Christi Domini exemplar se in omnes vitæ partes imitatione conformare studuerit, multa familiæ ordinisq. suo reliquit exempla humilitatis. Cuius virtutis vestigia in ipso Didaco, quem diligentissimum illius imitorem fuisse constat: eamq. ob rem a regularum, quæ omnes ad euangelicam paupertatem, summamq. humilitatem referuntur, præscripto, ne minimo quidem discessisse, paulo ante publicis Hispaniensibus tabulis obsignatis, et testimonijs demonstratum est luculentis. Itaque seruus Dei Didacus hoc proprium habuit, vt sibi omnes anteponeret, se autem nemini. Omnibus autem, vel minimis, inferuire cupiebat. Senes, pueros, adolescentes, omnesq. cuiuscumque ordinis ac loci homines iuuare studebat tanta humilitate, quanta quidem maxima animo comprehendi, aut oculorum aspectu cerni potest. Quicumque ad se veniret, consilium aut auxilium expetens: numquam aliquem reiecit. Immo quos pauperes, mendicos, atque ab omni re inopes animaduerneret, erga eos humiliter se gerebat, vt infra ex charitatis, qua illos fouebat, officijs intelligi licet. Iniurias, contumelias, et maledicta, si qua vnumquam in se ab impuris hominibus coniciebantur, humillime patientissimeq. ferebat. Præ humilitate etiam, vestitum induebat paulo asperiores, ac duriores. Sed huius virtutis, ad quam se egregie crudierat, argumento sunt alia multa, quæ infra commemorabuntur: cum illa, quæ præstitit, vel obedientiæ, vel charitatis opera, aut affligendi corporis studia, aliaq. eius generis ab humilitate profiscantur.

*De obedientia.**I X.*

**E**VANGELICAE paupertatis, quam vera solidaq. animi humilitate Didacus profitebatur, socia et comes, ac tamquam germana soror est obedientia: cui magnum præmium propositum esse, Basilius Magnus scribit. Ea cum sit, inquit

Climacus

*Bas. in cō  
cs præm.  
in Prou.*

Climacus, sepulcrum propriæ voluntatis : illius studio ita se ipse Didacus dedit, vt, voluntate sua quasi sepulta, eorum, qui præerant, iussis, sæpe etiam numero acerbissimis, obedientem se maxime omnium præstiterit. Præfecto alicui, ne nouitio quidem, parere recusauit : qui veræ obedientiæ disciplinam ex eo didicerat, quod olim beatus Franciscus scite dixerat. Is aliquando interrogatus, quis esset verus obediens : mortui hominis exemplo id explicauit. Tolle, inquit, corpus exanime, et quo loco volueris, repone : cernes, illud nec repugnare motum, nec reclamare dimissum, neque vilo modo indignari, quocumque feratur. Didacus igitur beatus, obedientiæ cultor eximius, cur e loco, vbi esset, moueretur, non dijudicabat : vbi locaretur, non curabat : vt alibi reponeretur, non instabat : cunctus ad Guardiani munus, seruabat humilitatem, quam professus erat : et quo magis ab hominibus honorabatur, hoc humiliter se gerebat, cum indignum honore se putaret. Quare paratus atque instructus ad obedientiæ leges, non attendit vquam, vt erat singulari animi simplicitate præditus, quale esset, quod præcipiebatur, eo solo contentus, quod sibi erat a superioribus iussum, quibus non obedire nefarium putarat. Quare religiosæ mentis incitatione ductus, sine vlla cunctatione, sed hilari promptoque animo mandata exequabatur iubentis. Eam ob rem potius humilia, quàm magnifica, aspera et difficilia, quàm iucunda et facilia sibi imperari cupiebat : cum sæpius auditione accepisset non modo obediendi normam, quam sancti monachi Ægypti tenuerant, sed Abrahæ exemplum : qui, filium charissimum immolare iussus, non expectata luce, sed intempesta nocte, ad id opus faciendum se parauit. Et vero, quod perfectæ obedientiæ est, ait Gregorius Magnus, non metu seruili, sed charitatis ardore, non poenæ formidine, sed recte agendi studio, maiorum præceptis obtemperabat. Erat illis temporibus nauigationis cursus ad Fortunatas insulas valde admodum difficilis, periculosus, ob eamque rem infestus, quod insulani, magna ex parte adhuc superstitionum scelere deuincti tenebantur. Appellantur illæ insulæ vulgo Canariæ : sunt autem septem, in mari Atlantico sitæ, veteribus Ptolomæo, Martiano alijsque et Latinis, et Græcis cognitæ, præsertim Plinio, qui illas suo quamque nomine vocat : Canariasque omnes dictas

dictas putat ob magnitudinem canum, quos illæ pariunt. Diu postea incognitæ extiterunt, fortasse quia nauigatio Canariensis multis ætatum sæclis intermissa erat. Demum anno millesimo, quadrigentesimo quinto a Christo nato, Ioanne I I. Castellæ Rege, quo tempore beatus Didacus puer erat, a Benthacorio, homine Gallo, qui tunc a tutoribus Regis, adhuc infantis, mare Athlanticum nauigandi facultatē acceperat, duæ inuentæ sunt, et ad Christianæ religionis cultum instructæ. Quo fit, vt aliæ, quæ deinceps in ditionem potestatemq. Regis Hispaniarum venerunt, non dum fidei mysterijs imbutæ essent, cum Didacus, a superioribus suis missus, eò mare transmisset. Is igitur non longa, neque noua, ob eamq. rem difficili nauigatione perterritus, nec insulanorum moribus, immanitate barbaris perculsus, sed veræ obedientiæ, cui se sancte addixerat, religioso officio ductus, nauim conscendens, ad illas insulas, sæpe ventis reflantibus, et infesto mari, demum ope auxilioq. diuino appulit. Est vna inter alias Canarias insula, quam Forteuenturam nominant. Eò venit ad seraphici ordinis conuentum, sibi a superioribus traditum in curam, et custodiam: quam gessit magna seraphicæ religionis laude. Non erant, qui eam insulam habitabant, adhuc omnes ad fidem conuersi. Hic vir Dei Didacus, messem multam nactus, admirandis exemplis, singulari vitæ sanctimonia, sermonum frequentium ardore incredibili, multitudinem insulanorum innumerabilem, idolorum cultu, et superstitionum tenebris circumfusam, ad fidei lumen perduxit. In ijs præter ceteros plurimos extitit etiam Ioannes Alphonsus, homo quidam, iam inde vsque e Canaria magna illuc profectus: qui, idola colens, a beato Didaco religionis Christianæ sacris imbutus, baptismum suscepit. Paulo autem post, filios duos eidem in disciplinam tradidit, qua ad pietatis studia atque officia a magistro tam religioso erudirentur. Magnas ob fidei propagandæ studium difficultates, et labores Didacus perpessus, varieg. etiam vexatus, et oppugnatus, multa quoque pericula adiit: quibus non modo perterrefactus, sed ardentius inflammatus, ad Canariam magnam item proficisci deliberauit, vt illius insulæ homines verbi Dei prædicatione ab impura idolorum superstitione ad fidem conuerteret, aut martyrium subiret, cuius desiderio vehementer

menter exardescerebat. Quamplurimos ordo seraphicus viros habuit, qui martyrij palmam assecuti sunt, quique eodem illius desiderio flagrant, parum abfuit, quin tanto bono fruerentur. Tam vehemens in beato Francisco ardor martyrij fuit, ut semel, et iterum, et tertio ad infidelium provincias eam ob rem ire contenderit. Hoc tam præclarum salutareque desiderium, illius, tamquam optimi parentis, imitatione accensum, ad sanctum Antonium Vlyssiponensem, quem de Padua dicimus, et alios seraphicæ religionis filios dimanauit. Illius ergo cupiditate ardens incredibili Didacus, egregius seraphici patris imitator, Canariam magnam cogitat, nauim conscendit, magnamque nauigationis partem confecerat: sed tempestatum fluctibus magnis, ac simul vectorum, et sociorum, quos eximia charitate diligebat, metu, cum ij barbarorum, omnia rabide agentium, in petum furoremque vehementer pertinere scerent: factum est, ut ad earum insulam nauis, qua vehabatur, etiam vndis afflicta, appellere non potuerit. Et, ita Deo volente, ad martyrium, quod tam ardentem desiderabat, non peruenit, etiam si alias multoties tam prope fuit, ut illud assequeretur. Quare ad insulam Forteuenturam reuersus, in magnis illis pietatis et charitatis officijs euigilare maximopere contendit.

*De eius charitate erga pauperes. X.*

**M**IRA eius charitas erga ægros et pauperes extitit, quibus semper in eleemosynam contulit, quicquid habere potuit. Beatus, qui super egenum et pauperem intelligit. Quotidiano is victui detrahebat, ut inde haberet, quod pauperibus in eleemosynam traderet: nihilque in dies singulos, vel in singulas potius horas, atque adeo in singula momenta quaritabat, quam vnde sibi aliquid superesset, quo aliorum inopiam sustentaret. Cum autem aliquando non esset, quod mendicis, pauperibus, atque egentibus hominibus pia eleemosynæ largitione daret, illorum commiseratione motus, miram lacrymarum vim effundebat, quibus intimum animi sui dolorem testabatur: cum præsertim neque ex conuentus parsimonia, neque ex sua abstinentia, neque ab amicis, neque priuatim a contubernialibus, nec a notis, nec ab ignotis tantum haurire potuisset,

set, quantum pauperibus Christi, quod minimum erat, subministraretur ad vsum in diem victitandi necessarium. Ægre aliquando conuentuum præfecti id ferebant, vt quidquid is vndique colligere potuisset, id omne in eleemosynam erogaret: quibus vt homo mansuetissimus erat, verbis respondit, lenitatis et humilitatis plenis. Ostendit enim, id viris, paupertatis euangelicæ colentibus, patientissime ferendū esse: cum Deum patrem cælestem haberent, omnium bonorum largitorem, qui vberius, et cumulatius daret omnia. Sed illud mirifice, diuinitusq; factum est, quod cum in sinu haberet magnam panis fragmentorum copiam, quam pauperibus conferret, forte obuiam aut Guardiano alijve fratribus factus est: a quibus eo nomine reprehensus, quod nimis valde conuentus censum profunderet: En, inquit sunt flores, quos non aliqua specie, sed re vera flores tunc ostendit. Cuius rei admirabilitate illi obstupefacti, non modo Dei hominem obiurgare pergunt, sed in veneratione habere incipiunt. Apud insulam autem Forteuenturam cum esset, studio, quo ardentissimo flagrabat, fouendæ paupertatis quosdam insulanos, qui præ egestate messem facere non poterant, sua aliorumq; consodalium opera messoria iuuit, cum aliunde tunc nequaquam haberet, vnde illis aliquid subsidij comparare potuisset. Eleemosynis in pauperes conferendis permulti, qui sanctitatis nomine celebrantur, summi Pontifices, Archiepiscopi, Episcopi, Reges, et alij omnis generis et ordinis homines innumeri, immortalem sibi laudem collegerunt. In eorum numero censi merito potest beatus Didacus, qui veræ solidæq; seraphicæ paupertatis studio accensus, visceraq; misericordiæ indutus, omnibus egestate afflictis omnem eleemosynæ aditum patefecit: neque parce dedit, sed magnam intimæ benignitatis viam effundens, plenis manibus liberalissime inopibus tribuit, quidquid habere vniquam potuit. Beatus igitur, qui intelligit super egenum, et pauperem. Vere beatus Didacus, qui egenti semper dedit, et hilariter dedit: cumq; nihil habuit, quod daret, ex paupertate inopis dolenter affectus, collacrymauit. Summi muneris loco est, inquit Chrysostomus, hilariter dare: si non habes, collacryma. Numquam admonitio diuina cessauit, numquam tacuit, quominus in scripturis sanctis tam veteribus, quam nouis semper

*Hom. 47.  
exlii. hom.  
50.*

et vbique ad misericordiae opera, Dei populus prouocaretur, et canente atque exhortante Spiritu sancto quisquis ad spem regni caelestis instruitur, facere eleemosynas iubetur. Haec omnia vt infra sanctus Cyprianus episcopus et martyr scribit: *Isaia* Deus, Frange, inquit, esurienti panem tuum, et egenos sine testamento induc in domum tuam. Si videris nudum, vesti eum: et domesticos seminis tui non despicias. Paulo post: Tunc exclamabis, et Deus exaudiet te: idu adhuc loqueris dicet: Ecce adsum. Magnum implorandae diuinae misericordiae praesidium posuit est in eleemosynarum largitionibus. Conclude, inquit Salomo, eleemosynam in corde pauperis, et haec exorabit pro te ab omni malo. Beatus igitur Didacus perpetuo ad misericordiam pronus fuit, dedit enim de panibus suis pauperi: ideo benedictionem accepit a Domino, cum multa admirabiliter, vt libro miraculorum exponam, in hac etiam vita operatus sit, diuina benignitate, quam sibi eleemosynae quoque abundantia conciliavit. Sed quod mirum est, iam narrabo, cum ad vicissitudinem referatur beneficii, quod is etiam, dum in terris vixit, diuinitus ob eleemosynas accepit. Feneratur etiam Domino, ait Tobias, qui miseretur pauperis: et vicissitudinem ei reddit ipse Deus. Quodam tempore is et socius alter, homo religiosus, in viam se dederunt: nihilque secum viatici, aut cibi attulerunt. Cum autem e conuentu Cerraja, qui ab Hispali multa millia passuum distat, vnde discedebant, longum iter esset vsque ad oppidum San Lucar de Barrameda, quo ire contendebant: de via fessi, et fame languescientes, ad pagum peruenerunt, quem Hispanice *los Palacios*, vulgo vocant. Eo loci eleemosynam quaeritarunt: qui daret tamen, inuenerunt neminem. Ieiuni igitur iterum se itineri committunt. Quarenti autem socio, quid tandem cibi eo die caperent, respondit ille, Deum vtrique prouisurum. Aliquot millia passuum inde progressi, cum iter leucarum quattuor reliquum esset, in solitudine quadam magna panem pisces duos, recens costos, et pomum cithraeum; quae omnia mantili mundo inuoluta erant, super herbam quandam conspexerunt, quae Maresma ab Hispanis nominatur: vasculumque vini plenum, proxime erat. Ibi cum neminem oculis in planitie aspexissent, quae tamen omnis in prospectu erat, cibum, diuinitus missum, sumpserunt. Interea socio Didacus ostendit,



ostendit, quàm mira providentia Deus richui vtriusque pro-  
spexisset: ita scilicet, vt olim in deserto filios Israel pauperat,  
Cibo recreati, gratias Deo egerunt: et quicquid superfuit, reli-  
querunt. Didacus autem, paululum se colligens, cum videret,  
se parum spei posuisse in providentia Dei, qui cuncta tuetur,  
intime dolore affectus, illius rei nomine reprehendere coepit.  
Et ita verbis de ea ipsa re, ac de vitæ euangelicæ puritate vtro-  
utroq. habitis, iter confecerunt. Sed tam religioso, sanctoq.  
viro, quem celesti gratia sua Deus prosequabatur, non modo  
quicquàm defuisse, sed omnia in summa rerum inopia mirifi-  
ce abundasse, perspicuū ex ijs fiet, quæ proxime narrabuntur.

*De charitate erga aegrotos. X I.*

**A**GRORVM curam eximia charitate beatus Didacus su-  
sccepit, et gessit. Nihil enim potius habuit, cum ab oratio-  
ne discesserat, quàm vt illos quotidie visceret, consolaretur, ijs-  
demq. cibum, et alia ad valetudinis curationem necessaria  
subministraret. Extant augustissimæ pietatis monumenta,  
magnificentissimo opere extructa, ad sempiternam memo-  
riam insignia, non solum ad peregrinorum hospitium, et ad  
pauperum mendicorumq. egestatem subleuandam hospita-  
lia, et domus ad alendos educandosq. infantes, ac præterea  
ad seniorum sustentationem et ad ægrotorum curationem,  
ædes, domiciliaq. ampla, magnifice ac laxè, Pontificum  
Cæsarum, Regum, Principum, summorumq. virorum sum-  
ptibus exædificata: verum beati etiam Didaci pectus, in  
quo tanta tamq. fixa insedit cura ægotantium, fuit veluti do-  
micihum multo amplissimu, vbi sibi struxerat ingentes  
illas sollicitudines, quarum ardentissimo conflagrauit studio  
curandi ægrotos. De adolescentibus quibusdam, qui in litte-  
rarum scholis versabantur, ex febris periculose laborantibus,  
sibi magnæ curæ fuit, vt conualescerent. Lectum illis stra-  
tuerat, quo loco nunc eius sepulcrum cernitur. Ijs ipsis autem  
curandis nihil eo patientius, qui nullis curationis laboribus  
pepercit. Immo eorum sordes mira charitate absterxit: excre-  
mentorum scaphium, vt vsu venerat, frequenter manibus suis  
amouit: ac labem, et cocnum, quo locus, vbi ij iacebant, et si  
screatu



screatu tetre ac male olebat, non moleste vñquàm, sed alacriter seduloq. diluit. Quæ vero ad omnem illorum curam, victusq. rationem opus erant: ea perinde præstitit, vt sollicita mater, quæ filiorum salutis desiderio languescit. Quare de eorum cura nihil quicquam præ charitate remittere vñquàm voluit, nisi vbi a morbo confirmatos plane vidit. Sed mira veræ christianæ dilectionis abundantia in eo etiam eluxit; quòd illos iam conualescentes, ac viribus omnino recreatos, rebus omnibus ad vitæ vsum necessarijs, maximopere iuuit. Quos autem aut morfu; aut morbi vi, aut aliqua plaga vlcerosos audiebat, ad quorum non modo ædes, sed etiam exigua tuguriola, vbi habitarent, ventitabat: eos tanta charitate complectebatur, vt illis vel consolandis, vel sanandis nullum officij pij locum relinqueret. Vlcus, quo ægre afficiebantur, oculis miserabilem in modum spectabat, aut manu tangebat, et abstergebat, subinde osculabatur: ac si quando cerata, implastra, et malagmata, quibus cicatricum purulentarum tabes abstergi solet, aliquando deerant, ipse lingua sua sanicm lambebat. Sanctum Basilium Magnum vùlnera leproforum osculatum esse, itidemq. seraphicum Bonauenturam fecisse, litterarum proditum est monimentis. Verum de Beato Didaco id, quod strictim attingi, exemplo singulari demonstrabo. Aspexit quodam die hominem elephantiasi, quam lepram dicimus, fœdissime exulceratum, tabeq. plenum, et adeo male olentem, vt alijs omnibus stomachum moueret. At homo Dei Didacus, enaritatis ardore flagrans, non puruleto, et vlceroso hominis vultu deterritus, neque tetrum odorem abhorrens; vlcera, quorum sanie ac tabo erat illius inquinatissima et deformata facies, lambit lingua sua. Tum cuidam, qui præsens aderat, rem admiranti: Sic frater, inquit, sic morbus hic curari debet. Iam locus postulat, vt curam etiam enarrem, quam omni dilectionis officio, ægrotis Romæ præstitit: idq. distincte faciendum existimaui, quoniam alia multa simul incidunt, quæ cum valde admodum commemorabilia videantur, ea silentio præteriri nullo modo oportet.

*De cura, et charitate, quam Romæ ægrotis adhibuit anno  
Iubilei, M. CCCCL. Cap. XII.*

**I**NSTABAT annus Iubilei, qui Nicolao Quinto Pontifice Maximo, incidit in annū a Christo nato M. CCCCL. Fuit Iubileum quintum: ad cuius celebritatem tantus hominum concursus Romam factus est, quantus nunquam antea. Totum fere illum annum Pontifex in solemnibus sanctisq. actionibus posuit: stationes quotidie ipse cum collegio Cardinalium frequentabat. Hoc anno beatus Didacus ab Hispania, quo ex insulis Canarijs anno proximo superiori M. CCCCLXIX. redierat, Iubilei causa ad urbem venit: socium habuit et comitem peregrinationis, alium sui ordinis virum, religiosum hominem, F. Alphonsum Castrensem nomine, præclarum et testem, et spectatorem, cultoremq. virtutum, in ipso Didaco prælucentium. Ambo Romæ ad sanctæ Mariæ monasterium diuerterunt, quod seraphica religionis est, vocaturq. Araceli. Hic spectare licet inflammatum illud puræ sinceræq. pietatis studium, quo sacras stationes humiliter sancteq. obierit ac frequentarit. Nemini dubium est, quin is multa magnaq. dederit exempla, quibus excitauit admirationem diuinæ suæ charitatis. Eo tunc vndique ad Iubileum fratres ter mille et octingenti numero conuenerunt: sed en ingens fere confestum eorum ægrotantium, et morbo varie languescentium numerus: ad quod etiam incommodum, quamquam pontifex cauerat, diligentissime, ne commeatus, et ne omnia ad victum necessaria in vrbe decissent, nihilominus tamen id accessit, vt magna annonæ difficultas, et penuria rerum omnium in vrbe ingrueretur. In tantis rerum angustijs, Guardianus curam ægrotorum Didaco credidit: qui, licet in eo munere solus versaretur, tanta tamen et diligentia et charitate illud gessit, vt omnibus præsto esset, nihilq. cuiquam decisset ad curationis rationem. Immo tanta rerum omnium abundantia cunctis ab eo subuentum est, vt ipse Guardianus, ceteriq. valde mirarentur, vnde ei in tanta aliorum tenuitate tam magna suppeditaretur rerum vbertas. Magna enim panis, et vini copia ex tota vrbe ad monasterium confluxit: magnus frumenti, aliarumq. rerum, quæ ad victum opus essent, numerus datus est. Magnum id elec-

id eleemosynæ subsidium, beati Didaci apud Deum gratiæ acceptum omnes ferebant : omnes illum, vt hominem Deo gratissimum, atque acceptissimum suspiciebant, et admirabatur. Sed eo anno illud contigit, quod hoc loco commemorare non alienum est, cum diuinitus factum videatur, vt Bernardinum Senensem, cuius in omni vita sanctitas iamdiu spectata erat, seraphici etiam ordinis religiosissimum virum, Nicolaus Pontifex in Sanctorum numerum retulerit. Diuine igitur cum beato Didaco actum est, qui illos spectauit honores, quos in aliud tempus sibi ob meritorum præmium reseruatos, hac ætate SIXTVS QVINTVS Pontifex, summo ecclesiæ catholicæ gaudio, in eum contulit. Id illi soli contigit, quod alij præterea nemini contigisse apparet. Tribus autem mensibus exactis, quo temporis spatio is in vrbe fuit, ad Hispaniam cum eo ipso socio Hispalim redijt. Quocumque iter faciebat, multos inuenit, qui illum hospitio gratis benignissimeq. exciperent; et vbi opus fuit, viatico iuuarent. Et vero præsertim apud Viterbium, Tusciæ ciuitatem, iter vnus dici, aut paulo longius ab vrbe Roma distantem, cum in oppido quodam esset, quod vulgo Abbatiam vocant: certatim oppidani omnes contenderunt victum aliquot dies abunde suppeditare. Id a Deo factum est, qui homini tam religioso, pauperibus omnia in eleemosynam conferenti, præcipua cura prouidit, vt ne in mera quidem solitudine, ne dum frequentissimis in locis, vt exposui, nihil quicquam, vitæ vsui necessarium deesset. Hactenus de charitate erga ægrotos satis dictum sit: nunc locus est dicendi de ea, qua vsus est erga alios omnes, præsertim illos, quos peccare, vel sine poenitentia ex hac vita decedere, animaduernerit.

*De charitate, qua erga omnes, præsertim peccatores, et impatientes vsus est.* X I I I.

SERAPHICVS idemq. beatus Franciscus singulari deuotionis affectu sanctum Archangelum Michaelē venerabatur, eiusq. diem festum ieiunio dierum quadraginta præueniebat, quod eius curæ esset credita animarum salus. Eam ob rem si quem de salute sua parum sollicitum esse vidisset, aut prauis consilijs, exemplisq. offendere animaduertisset, dolore acri

acri intime cruciabatur. Tanta erat sollicitudo et charitas, qua exardescēbat, aduersus operarios iniquitatis. Eo ipso spiritu beatus Didacus erat: ita ut de utroque dici recte queat: Quis infirmatur, et ego non infirmor? Quis scandalizatur, et ego non vror? Non ergo patiebatur, quantum in se erat, a quodam diuinæ legis præcepta violari, nec vero ordinis sui præscriptis detrahi: immo nihil negligenter agi, quod ad se-raphicæ disciplinæ rationem et vsum pertineret. Si quis contra interdum admittebat, etiam si mitis admodum esset, et in contumelijs patientissimus: tamen præ charitate, qua ardentissime diuina mandata, constitutionesq. ordinis colebat, doloris acerbitate ob infirmorum scandalum intime afficiebatur. Quare sancta quadam indignatione commotus, non potuit aliquando continere, quin aberrantium quorundam temeritatem reprehenderet, ita tamen, ut quis in eo facile animaduernerit nullam obiurgationis aut offensionis vel minimam grauitatem, sed summæ illius, qua ad diuinum cultum exardescēbat, dilectionis vim immensam, a cordis visceribus emanantem. Factum est aliquando, cum sub vesperum ipse et fratres vna cenabant, ut statâ hora per se campana ictibus nouem, de more signum salutationis Angelicæ dederit: quod sacrista, cuius munus erat facere, negligenter prætermiserat. Rei admirabilitate illi obstupefacti, ad ecclesiam accurrerunt, ut viderent a quo pulsatum campana esset: fores quidem clausas inuenerunt, intus vero neminem. Tum Didacus, alios adhortatus ad orationem, et disciplinam, ita ob poenitentiam, quam pro satisfactione negligentis sacrista subiit, virgis se acriter percussit, ut mirum esset omnibus, quo modo tam grauium vulnere acerbissimam vim ferre ipse potuerit. Doloris etiam ardore vehementer flagrabat, si quos, in huius mundi facie volutatos, malefactorumq. sordibus inquinatissimos homines, quique praua viuendi via alios a recto salutis cursu abducerent, sine poenitentia, et confessione mortem aut necem obiisse intelligeret. Eorum interitum lacrymis, suspirijs, gemitibusq. prosequēbatur: brachijsq. instar crucis formatis, proluxe, atque intime toto animo totaq. mente pro eorum salute Deum deprecabatur. Hæc eius erga istius modi homines charitas. Sed neque exi-

D

gua illa

gua illa censetur, qua vsus est in eos, qui ad Christi fidem recens venerant. Præcipuo et singulari quodam amore, vereq. paterno illos complectebatur, ac non modo fouebat: sed quibuscumque rebus poterat, tantum illis subsidij comparabat, vt, quæ ad vitæ vsum necessaria essent, nihil eorum quicquam, etiam in summa penuria, ipsis deesset. Nullum igitur charitatis officium, nullum benigne faciendi locum beatus Didacus reliquit, vsque adeo vt omnes tam sui ordinis homines, quàm externos, si minus aliquando re non potuit, consilij et consolando iuuerit. Neque has officij partes vllò vnquam tempore, ne tum quidem prætermisit, cum ianitoris in conuentu curam gessit, quam etiam in eo posuit, vt pauperum Christi aduentantium inopiam aliquo modo subleuaret.

*De abstinentia, ieiunijs, maceratione corporis, et  
castitate. XIV.*

**A**BSTINENTIAE virtutem, a sanctis patribus tantopere commendatam, beatus Didacus exercuit quàm diligentissime. Cum enim illius virtutis sit, omnes a se carnis delitias, incitamentaq. depellere: quàm valde ea in re totis viribus seipse exercuerit, perspicue manifestum erit ex ieiunijs ceterisq. operibus, ad corporis macerationem pertinentibus, quæ mox recensendo persequar. Is paupertatem, vt dixi, ad normæ et regulæ seraphicæ præscriptum, toto animo, totisq. viribus coluit: paupertatis virtute egregie munitus, omnia aspera, dura, difficilia, vilia, et abiecta quæque pro delitijs habuit: delitias autem, delicata, mollia, pretiosa, vt paupertatis, quam vnice dilexit, inopiæ infesta fugit, et horruit omnino. Sancti omnes hac mente fuerunt, de quibus scriptum est: Inundationem maris, quasi lac, sugent. Christi enim Domini amor amara omnia mirabiliter dulcia reddit atque suauia. Sunt in seraphico ordine, præter solemnita stataq. ecclesiæ ieiunia, et præter Quadragesimam, Christi Domini exemplo consecratam, alia ieiunia, et item quadragesimæ: quæ certis diebus conclusæ, totum pene anni cursum conficiunt. Primo ieiunium aduentus, deinde ieiunium

ab Epi-

ab Epiphania, quod diebus quadraginta conficitur: tum ieiunium a die natali Apostolorum Petri, et Pauli usque ad celebritatem Assumptionis beatæ Mariæ Virginis: postea ab Assumptione, dierum item quadraginta ieiunium ante diem festum Sancti Michaelis. In Apostolorum præterea honorem alia est quadagesima dicata. Itaque beatus Didacus verus Christi pauper, qui nihil aliud, nisi duo æra minuta, corpus Luc. 22. scilicet et animam habebat, hæc ipsa propter Christi Domini amorem ita offerebat, ut omni fere tempore spiritum ardore charitatis, et corpus abstinencia singulari immolaret. Tor enim quadagesimarum curriculum anniuersarium perpetuo ieiunij cultu cum conficeret: sanctorum etiam non modo statas vigilias, sed alias, quas sibi præscripserat, mirifica abstinencia, rituq. duriter ieiunandi obseruabat. Panem tantum, et aquam adhibebat, in vigilijs dierum omnium festorum beatissimæ Mariæ virginis, ut infra vberius scribam. Ad illam ieiunij austeritatem sæpenumero adiungebat verberationem corporis: qua ita acriter utebatur, ut a capite usque ad talos vehementer se flagris cædens, tam horribilem carnis cruciatum non humana, sed diuina potius virtute ferre posse putaretur. Summa præterea hieme gelidam item aquam ingredi non dubitauit, ut ipsius item carnis, quæ insensibilissima aduersaria est, vim restingueret, eiusq. sensus, dulcedine quadam quasi titillantes, coerceret. Miris igitur modis ab ea, qua, tamquam domestico satellite, mundus, et dæmon hostes utuntur ad spiritus virtutem labefactandam, præclarus athleta Didacus se tutatus est: cuius propterea pura castimonia, egregijs testificata testimonijs, cumulum quoque addidit ad reliquas omnes eius virtutes. Et quoniam abstinentiæ coniuncta est oratio: locus sequitur dicendi de illius oratione et deuotione.

*De eius oratione, et deuotione. X V.*

**O**RDINIS sui fratres beatus Franciscus, omni ratione semper cohortatus est ad orationis studium: idq. assueueranter dixit, neminem in diuino cultu, virtutumq. officijs magnas habiturum esse progressiones, nisi tantæ virtutis præsidio. Quare is ambulans et sedens, laborans et a labore va-



cans, domi ac foris adeo erat precationi intentus, vt non solum quicquid in se erat corporis et cordis, verum etiam operis et temporis orationi dedicasse videretur. Eius præclari ducis et magistri exemplo Didacus itidem fecisse dicitur: cum etiam opus faciendo, vt proxime narraui, diuinis meditationibus animum et mentem exerceret, a cuius otiosa euagatione longe refugere perpetuo contemplandi vsu contenderat. Media nocte surgebat ad laudandum Dominum: et in alijs statæ horæ vigilijs, precando excubabat, tamquam bonus Christi miles. Sæpenumero, præsertim solemnibus diebus, totam noctem sanctis illis mysterijs intima pietate meditando collocabat: sæpeq. e somno, religiosa excitatus contemplationum cura, e lectulo illo duro et vili, nocte intempesta exiliens, ad pedes imaginis Christi crucifixi iacebat, toto animo ad cælestium cogitationem raptus: sæpe item erecto vultu, manus supplices in cælum tendebat, et vt summatim breuiq. complectar, instabat obsecrationibus et orationibus nocte, ac die. Id ostendunt tam multa, quæ miranda precibus nocturnis, ac diurnis a Deo impetrabat. Orauit enim, et exauditus est: opem Dei implorauit, et a Deo desertus non est: et quo magis se stratum videbat, eo vehementius diuino amore exardescibat. Omnia facta, dicta, et cogitata referebat ad Christum Iesum: cuius nomen dulcissimum in corde, in ore, in opere semper habebat. Nominis Iesu, tamquam olei effusi, suauitate liquefcens, post diuturnum in oratione gemitum, exultare incredibili gaudio videbatur inter choros angelorum. Sanctissimam Dei matrem, virginem Mariam, post Christum filium præcipua veneratione coluit. Cuius rei argumento est insigne salutationis Angelicæ: quo ad preces vsus est perpetuo. Eam ob rem Hispania, catholicæ fidei nomine studioq. florentissima, illud in more positum habet, vt eius, pie precantis, imaginem exprimat non tantum oculis in crucem Christi sublati, et genibus flexis, sed manibus iunctis tanto pietatis ornamento potissimum insignitis. Laudat seraphicum Franciscum ea de re Bonauentura, sanctitate et eruditione clarissimus, quod Dei genitricem mira pietate veneretur, beatissimam scilicet illam virginem, quæ Dominum maiestatis, fratrem nostrum peperit, et per quam



quam fumus misericordiam consecuti . Quam ob rem ad eius honorem ordini seraphico Apostolicus ille vir ieiunium constituit: eandemq. sibi suisq. cælestem aduocatam in primis delegit . Hoc erga illam venerationis zelo itidem flagrauit beatus Didacus: qui et illud ieiunium seruauit , et quam vniuerso Minorum ordini patronam ille elegerat , eam singularem , ac præcipuam sibi aduocatam esse voluit ardentissimo illius colendæ studio . Immo seraphicam pietatem pietate cumulauit , cum ad statas illas ieiunij dies hoc sibi adiunxerit , vt omnibus singulisq. vigilijs festorum dierum , beatissimæ Dei matri sacrorum , qui postea plures numero fuerunt , pane tantum et aqua ad illum , quem sibi potissimum sumpserat , ieiunandi cultum præcipue et insigniter vteretur . Patrem autem suum Franciscum Bonauentura sedulo imitatus , piam Iesu matrem , cordis sui visceribus impressam , meditatione etiam assidua venerabatur . Vtrumque etiam Didacus consecutus , et quotidiana contemplatione , et frequenti coronæ vsu , omniq. pietatis officio illam colebat : neque ea tantum veneratione contentus , etiam cultu imitationis venerabatur , quo gratior esset eius deuotio . Actuosus enim illis , luminosisq. virtutibus , quarum exemplar clarissimum in beata Virgine cernitur , humilitate , charitate , misericordia , vitæ castitate , et alijs sanctitatem illius , operante Domino , pro virili sua imitari contendebat . Quo factum est , vt in omni temporum varietate , cum ad eam , vel sua , vel aliorum causâ ille confugiebat , confugiebat autem semper , cæleste singulareq. eius patrociniûm senserit summa cunctorum admiratione . Res in promptu est cum ex omnibus , tum ex illo ad sempiternam memoriam insigni miraculo , quod diuinitus factum apparet : cum femina , quæ pistoriâ agebat , filium e media morte , nimirum ex ardentibus furni flammis liberauit . Sed rem ipsam totam , loco suo dilucide explicabo . Beatus vir , qui timet Dominum : in mandatis eius vult nimis . Vere igitur pius , vere deuotus , ac religiosus Didacus , eamq. ob rem beatus : qui , Deum timens , nihil in vita antiquius , potiusq. habuit , quam vt Christi Domini amore flagrans , diuina eius mandata animo ardentissimo summaq. voluntate obseruaret : ac matrem eius beatissimam coleret  
Psal. 112.  
tanta

tanta et tam singulari deuotione, quantam verborum copia  
 affecutus non videor. Libuit tamen eam aliquo modo enar-  
 rare, vt potentissimus, maximusq. Rex Catholicus Philip-  
 pus I I. qui beati Didaci merita et virtutes tam grata ac pia  
 memoria prosequitur, immortaliter gaudeat, se non solum  
 in augustissima familia sua Austriaca olim habuisse religiosis-  
 simos benedictæ virginis Dei matris Mariæ cultores egre-  
 gios, Federicum Tertium, Albertum Quartum, Imperato-  
 res, et ceteros multos, eiusdem familiæ summos Principes,  
 quorum laudem eandem, pietatis imitatione, ipse iam sibi  
 collegit: verum etiam in Hispania, cuius regna obtinet, ex-  
 itisse potissimum, tum antislites, vt pote Ildephonsum Toleta-  
 num, luculentum de ipsius beatæ Virginis laudibus scriptorem;  
 Isidorum Hispalensem, et ceteros: tum etiam alios plerosque  
 innumeros omnis generis homines, qui eo nomine illustres  
 sunt, qui nimirum singulari magnæ deuotionis studio, ac mi-  
 rifica pietate, insigniq. veneratione illam coluerint. In ijs,  
 vt demonstraui, Didacus et est, et habetur: cuius et aliorum  
 Sanctorum in primisq. Sanctissimæ eiusdem virginis Mariæ  
 meritis sperandum est, Philippum Regem fore perpetuo feli-  
 cem, florentem et beatum. Sed redeo ad Didacum: qui crū-  
 cem Domini etiam præcipua atque insigni amplexus est ve-  
 neratione, ita vt non modo viuens, sed moriens de ea, quam  
 tantopere colebat, hymnum dixerit. Eius amore acriter in-  
 flammatus, toto animo ad meditationem attentissimus, cor-  
 pus verberibus mirabilem in modum affligebat. Illam au-  
 tem ob oculos fere semper habebat: vt assidua cogitatione  
 repeteret vulnura, conuicia, dolores, cruciatus, et sangui-  
 nem; tanta largitate profusum, Christi Domini, cui totum  
 se dederat. Crux in omni contra dæmonem certamine si-  
 bi præsidium erat, in mærore solatium, in omni vita firma-  
 mentum ac spes. Cui cum tantopere confideret, omnium  
 ægrotantium, quicumque ex oppido Compluto, et ab alijs  
 vndique locis ad eum confluebant, quorum erat multitudo  
 pene innumerabilis, morbos etiam insanabiles, curabat si-  
 gno crucis, quod lampadis B. Mariæ Virginis oleo efficiebat.  
 Hactenus de eius deuotione, nunc dicendum est de simplici-  
 tate vitæ et doctrina infusa.

*De vita simplicitate.*

## XVI.

**V**IR fuit Didacus simplex, nimirum a malitia purus, et integer. De nemine enim umquam se male sentire, aut opinari ostendit: sed aliorum dicta, facta, et cogitata, suis metiebatur. Quæcumque aperte mala non erant, in meliorem partem accipiebat omnia, ut homo diuinitus columbina quadam simplicitate imbutus, de qua Christus Dominus: Estote, inquit, simplices, sicut columbæ. Ex suspitione igitur haudquaquam temere quemquam reprehendit, cum eorum, quæ in occultis animi latebris latent, solus Deus scrutator sit ac iudex, alius præterea nemo. Simplici autem, et aperta via iter huius sæculi faciens, quod simplex, verum, sincerum et rectum videbatur, in eo totus euigilabat, ut maxime sequeretur. Simplici, et recta diuinorum mysteriorum fide contentus, illa tantum cogitabat, et meditabatur, quæ præceperat Deus. Eam ob rem a multiplici et varia illa curiositate, quæ vel nouis rebus audiendis, vel factis alienis indagandis ponitur, usque adeo abhorrebat, ut numquam in omni vita verbum, ne otiosum quidem, ne dum iniuriosum ab illo quisquam audierit. Si quid rursus detrahendi causa maledice, contumeliosque ab alijs dicebatur: id numquam passus est se auditione accipere. In simplicitate autem et puritate cordis recte ambulante[m] erudiuit illum Spiritus sanctus: qui in eo residens, legis diuinæ decreta in eius visceribus et animo descripsit. Verum tota res mox infra enarrabitur. Mat. 7.

*De doctrina eius infusa.*

## XVII.

**E**RAT is litterarum rudis, ideo nullis sacris ordinibus initiatus, simplicis religiosi, et fratris, ut dicunt, laici vitam in ordine Minorum egit. Sed Spiritus sanctus est, qui diuinis virtutibus animum eius imbuit, qui sapientem effecit, et eloquentem. Nolite cogitare, inquit Christus Dominus, qualiter, aut quid respondeatis. Dabitur enim vobis in illa hora quid loquamini. Non enim vos estis, qui loquimini, sed spiritus patris vestri, qui loquitur in vobis. Is omnis eloquentiæ ex- Mat. 10.

tiae expertus, tanta erat imbutus suauitate sermonis, ut illius vi omnes pelleret animi aegritudines: omnesque cuiuscumque ordinis homines, ad se confluentes, etiam varie affectos, recrearet, mirificeque consolaretur. Certis litterarum monumentis ad posteritatem proditum est, virum quendam melancholicum, qui vehementer animi cruciatu angebatur, quiq. etiam corporis morbo languescebat, atræ bilis vim, et doloris acerbiter sensisse mirabilem in modum minui colloquio, et congressu beati Didaci. E cuius manu etiam, cum aliquid vel exigui cibi sumebat: tanta se dulcedine perfusum esse, asseueranter dicebat, ut illud, tamquam pabulum quoddam caeleste sibi videretur. Luce diuini Spiritus cum fruere-  
 tur, christianæ doctrinæ præceptis et institutis, quæ ad vitæ salutem necessaria essent, cunctos imbuebat: mysteriaque ipsius fidei dilucide explicabat. Quo factum est, ut plerique, ab eo eruditi, normam viuendi meliorem in posterum susciperent. Non ab illis, qui sibi variam et multiplicem sapientiam olim arrogarunt, Gorgia, Platoneque aut ab Aristotelica schola scientiam hausit: sed a cruce Christi Domini, in qua omnes opes verissimæ sapientiæ consistunt. Ad illius disciplinam Paulus Apostolus omnes inuitat: neque quicquam se aliud scire profitetur. Ego, inquit in epistola ad Corinthios, non sum arbitratus me scire aliquid inter vos, nisi Iesum Christum, et hunc crucifixum. Didacus, qui litteras minime norat, etsi ad nullas disciplinas erat eruditus, miras tamen progressionem habebat in doctrina crucis Christi Domini, quam exemplo Apostoli profitebatur. Quare in illius studio cum omne vitæ tempus consumpserit, clarissimam admirandæ sapientiæ vim explicatam, atque euolutam et dictis, et factis ostendit. Cuius rei illud exemplo est, ut diuinis de rebus optime disliceret, et quæstiones longe omnium difficilissimas, mira scientia explicaret. Eius quidam amicus, homo Conchenensis, artium liberalium usu longe peritissimus, cum neque Salamanticæ, neque Lutetiæ Parisiorum, neque usquam, ubi academiae florerent, quemquam, vel præstantissimum eruditione virum, naetus esset, qui sibi aliquot partim de theologia, partim de alijs disciplinis locos, obscuritate inuolutos, explicaret: Didacum vnum inuenit, qui illos  
 diuine

1. Cor. 1.

diuine aperuit. Id testimonium ei præbent item alij non pauci, eruditi, et doctrina exculti viri. Sed vnde tantam non modo sapientiæ, sed eloquentiæ vim sit consecutus, iam ostendi. Nunc exponere pergam reliquum eius vitæ cursum.

*De reliquo eius vitæ cursu et obitu. XVIII.*

**I**AM ex ijs, quæ narrata sunt, facile intelligi licet Conuentus, et loca: vbi virtutum suarum vestigia beatus Didacus impressa reliquit. Cum autem ab vrbe Roma, anno Iubilei confecto, in Hispaniam vltiorem redijt: ad prouinciam Castellæ profectus, in Conuentu sanctæ Mariæ Saliceti exiguo breuiq. tempore mansit. Est ille antiquitate nobilis, et quasi seminarium, vnde vberrimi familiæ Franciscanæ fructus prodierunt vsque ad vltimos orbis terrarum fines. Sanctæ Mariæ autem Saliceti nomen accepit, quoniam illius nomine altare in Salicis arboris trunco duorum militum Hierosolymitanorum pietate iam primo extructum est. Plurès aluit et religionis, et doctrinæ laude claros viros Deoq. charos, quàm alius illius omnis prouinciæ conuentus. Inde vero tandem, socio et comite F. Rodriguezio Onnio Complutum beatus Didacus migravit ad conuentum beatæ Mariæ de IESV: vbi reliquum huius vitæ curriculum confecit summa cum sanctitatis laude. Eo tum primum tempore Alphonsus Carrillus, Toleti Archiepiscopus, ex Summi Pontificis concessu illum opere satis amplo exædificare cœperat, vbi postea fratres centum sustentabantur: quorum saltem quadraginta operam Theologiæ scholasticæ studio ex Sancti Bonauenturæ doctrinis darent. In hoc conuentu annos duodecim, vel tredecim Didacus vixit. Tantus autem sanctitatis odor, ex illo afflatus, tunc in omnes Hispaniæ partes se diffuderat, vt mirus factus sit ad hominem Dei concursus. Veniebant alij, vt rerum diuinarum, de quibus sermonem semper instituebat, cognitione imbuerentur: alij, vt sibi vel ad necessitates, vel ad morbos depellendos aliquid subsidij consequerentur: alij, vt eo adiutore, et deprecatore vterentur ad opem et misericordiam Dei implorandam. In ijs testis est, qui affirmat ac profitetur, se, quo tempore aliqua difficultate premebatur,

mebatur, numquam illum auxilij causa adijisse, quin, eo Deum precante, habuerit, quod sibi necessario tempore pie expetendum erat. Tam certa denique erat sanctimoniae opinio, quam in omnium animis conceperat, ut, cum pagos, vicos, aliaq. loca eleemosynae causa obibat, agricolae cum primum eum aduentantem aspiciebant, mutuum quendam clamorem excitando, inter se dictitarent: EN VIR SANCTVS ADEST. Hac eximia laude Didacus ubique florens, cum vitae huius stadium cucurrisset: tempus iam venit, quo ob merita reciperet coronam iustitiae, quam Deus repromisit diligentibus se. Itaque senio, ieiunio, abstinentia, vigilijs, omniq. corporis cruciatu, quem sibi frequentissime adhibuerat, maceratus, et pene confectus, morbo laborare incœpit ex suppuratione quadam, quam in brachio sinistro prope manum habebat. Et quamquam morbi purulenti, qui sanie tabescens acerbissimum inurebat dolorem, vi intima torquebatur: tamen usque adeo illius cruciatum tolerabiliter patiebatur, ut in summo dolore patientissimus, excitaret apud omnes admirationem incredibilis patientiae, qua illam suppurationem ferebat, difficilem toleratu. Id habebat proprium, ut ægrotationum, quibus pene assiduus in omni vita varie vexabatur, acerbitates perferret admiranda animi corporisq. tolerantia. Suppuratio autem, ex qua grauiter nimis ægrotabat, per medicamentum tandem rupta, magnam puris et saniei copiam effudit: quæ non male, ut solet, sed bene potius ac suauiter olere videbatur. Ea incommoda valetudine aliquamdiu afflictus. interdum ita e corporis sensibus ad animi contemplationem rapiebatur, ut mortuus putaretur. Deinde ad se rediens, eas voces emittebat: O QVAM SVAVES ILLI FLORES PARADISI. Tum fratres omnes accurrebant: eorumq. unusquisque, cum primum ad illum accesserat, hoc maxime petebat, ut pro se Deum ille precaretur. At ipse preces eorum summopere expetere non desistebat. Vbi demum horam instare vidit, qua ex hoc sæculo migraret, ut seraphicum patrem Franciscum etiam in ipso obitus momento imitaretur, vestem viliores, et cingulum sibi afferri petijt. Quibus mox indutus, omnes, qui aderant, suauiter pieq. alloquendo, of-

fensionum



fensionum ab ijs veniam profusis lacrymis petijt. Demum  
 utroque brachio sublato, etsi alterum antea vi morbi tabue-  
 rat, Crucem, quam ad caput habebat, amplexus, sæpiusq.  
 omni intimi animi pietate exosculatus, animam Deo reddi-  
 dit, cum illa hymni verba de Cruce Domini protulisset :  
 DVLCE LIGNVM, DVLCE CLAVOS, DVLCE  
 FERENS PONDERA, QVAE SOLA FVISTI DIGNA  
 PORTARE REGEM CAELORVM ET DOMINVM.  
 Obijt igitur Compluti in conuentu ordinis sui, anno a Chri-  
 sto nato M C C C C L X I I I. pridie Idus Nouembris,  
 die Sabbato, nocte sequenti. Peruulgato Sancti viri obitu,  
 ad eius corpus visendum concurrunt maxima multitudo po-  
 pulorum finitimorum, et praesertim ciuium Complutensium  
 omnis generis, ætatis, et ordinis. Hic mira pietas visa est  
 hominum, illud tangere et exosculari cupientium. Om-  
 nes certatim paululum vestis, aut cinguli habere : alij ca-  
 pillos carpere contendebant, vt reliquiarum hominis Dei  
 aliquid apud se retinerent. Nemo autem fere quisquam  
 tunc extitit, quin aut pileum, aut orationum libellum,  
 aut salutationis Angelicæ coronam corpori præ ardentis er-  
 ga illum pietatis studio admoueret. Postridie, qui dies Do-  
 minicus fuit, mane corpus in ecclesiam illatum frequentis-  
 simo populo sepultum est. Aliqua tamen pridie noctu di-  
 uinitus facta narrantur, ex quibus tanti viri Sanctitatis  
 splendor vbique collucescere videbatur. Verum iam locus  
 est, vt aditum ad miracula faciam, quæ et in vita et post  
 obitum in seruo suo operatus est Dominus.



# DE MIRACVLIS SANCTI DIDACI

## P A R S I I.



**D**ENI sunt sacri ecclesiasticiq. annales miraculis Sanctorum, in quorum laudibus perpetuus est catholicæ ecclesiæ cursus. Eliæ palio, Iordanis fluuij aqua diuisa est: ipseque aluum sicco pede transijt. Moyses, et Aaronis virgis non in Ægypto solum, sed in populi peregrinatione, miracula edita esse sacræ litteræ loquuntur. Constat sancti Iosephi Patriarchæ, qui iampridem obierat, corpus prophetasse: et solo reliquiarum Elisæi contactu, mortuum in eius sepulcrum illatum, a morte ad vitam esse reuocatum: et alia multa diuinis veteris testamenti monimentis consignata sunt. Nouum autem testamentum in ijs, quæ fecit Christus Dominus, exponendis, præter cælestem doctrinam, quam docuit, versatur. Multa quidem, inquit sanctus Ioannes Euangelista, et alia signa fecit Iesus in conspectu discipulorum suorum, quæ non sunt scripta in libro hoc. Miracula ab Apostolis longe etiam maiora prodierunt: quia ipse dixerat: Amen, amen dico vobis, qui credit in me, opera quæ ego facio, et ille faciet, et his maiora faciet. Resq. testatissima est ex actis Apostolorum. Dixit item Dominus: Si credideritis, dicetis huic monti, transi hinc, et transibit. Quod miraculum sanctus Gregorius Pontifex commemorat de monacho sui temporis, qui oratione rupem mouit: et item Gregorius Nyssenus de Gregorio Neocæsariensi: quem, ob rerum admirabilium magnitudinem, Græci Thaumaturgum, nempe miraculorum effectorem appellant. Probatissimi historiæ ecclesiasticæ annales abundant narrationibus

*lib. 4. Reg.*

*Ioan. vi.*

*Matt. 17.*

*Dial. lib. 1. c. 7.*

*Nysin or. de Greg. Neoc.*

miracu-

miraculorum . Eusebius , Palladius , Theodoretus , et alij Græci in ijs ipsis frequentissimi sunt, præsertimq. Chrysostomus in vita beati Babylæ martyris . Latini autem, sancti ecclesiæ Doctores, Hieronymus in vita Pauli primi eremitæ , et Antonij, Athanasium secutus, et in vita etiam Hilarionis : Augustinus in libris de ciuitate Dei, in sermonibus, in libellis de sancto Stephano Protomartyre , in libris confessionum : Ambrosius in vita beatæ Agnetis : sed vnus instar omnium esse potest Gregorius Magnus, qui libros confecit de rebus recens ætate sua mirabiliter gestis . Sed iam non est, cur rem longiorem faciam, cum nemo neque antea, neque postea, nec vero vlla vmquam ætate vitas Sanctorum hominum litteris mandarit, quin eorum miracula, monimentis consignata, esse voluerit . Sunt enim illa non modo, quemadmodum initio narraui, ad bonitatem Dei demonstrandam insignia : sed ad fidem corroborandam, et augendam valde in omnes partes vtilia, maximeq. accommodata . Si quis annalium de martyribus memoriam replicat, facile animaduertit infinitam hominum multitudinem ex miraculorum narratione fidem suscepisse . Ea enim, quasi voces præclaræ, plenæq. significationum, religionem Christianam prædicant, et resurrectionem mortuorum confirmant . Ob eam rem fuit olim id in more positum, vt miraculorum libelli frequentissimo populo ab Episcopis recitarentur : id quod ex sancto Augustino animaduerti potest . Neque autem illa sunt solum argumento, quanta Sancti pietate coli debeant, quorum nomine ea Deus operatur : sed maxime ad Christiani nominis populiq. gloriam ea ipsa pertinent : quæ quo latius propagantur, hoc magis boni gloriantur, et mali ignominie cruciatu, et labe quadam contabescunt . Cum igitur beati Didaci vitam, certis capitibus distinctam, superiori parte comprehensam, litteris mandarim : sequitur altera pars, quam totam in miraculis eius scribendis ponam, exemplo sanctorum Patrum ductus : qui tantam illorum rationem habuerunt, quantum ad gloriam Dei illustrandam, aliasq. publicas ecclesiæ vtilitates haberi oportere demonstraui . Qua in re hæretici, qui fidei catholicæ summam omni conatu conuellere student, cum antea semper iam inde vsque ab vltimis illis religionis

li. 22. c. 9.  
Ser. 91.  
Conf. lib.  
9. c. 7.

gionis Christianæ temporibus, tum maxime in hac recentium hæresum tempestate nos exagitare contendunt, in eoq. magnis euigilant lucubrationibus, ut fidem labefactent, atque infringant miraculorum, quorum splendore perpetuo collustrata est ecclesia Dei. Itaque eo studiosius in suscepti muneris curam incumbatur, necesse est, quo magis illorum insidiæ intentæ apparent. Fuerunt olim in eo frequentes, ut Sanctorum vitas, vel confictis argumentis ipsi conscriberent: vel ab alijs scriptas, veteratoria quadam, hæreticaq. deprauandi arte corrumpere, ac falsis narrationibus contaminarent. Quorum fraudi ac dolo obuiam itum est sacro præsertim canone, quem Gelasius Pontifex in concilio Romano tulit. Non defuerunt præterea, qui miracula præcise negant. Næ isti perspicue mendaces sunt. Ut enim mentiuntur, qui nullam in Oceano aquam, aut nullum in sole lumen esse dicunt: sic qui proiecta audacia negant in ecclesia Dei esse miracula, a re vera, et certa, quæ oculorum aspectu cernitur, plane aberrant. Est cum istorum male sentientium coërcenda impudentia, tum bonorum piorumq. hominum studium excitandum. Id iam nunc mihi faciendum censui commemoratione miraculorum beati Didaci, ab hac etiam laude felicissimi viri. Ea autem narrando persequar, non quæ aliquo modo apocrypha, quæq. in obscuro lateant, sed quæ omnis fere Hispaniæ vocibus in apertum prolata, et obsignatis publicis tabulis testificata, magnorum ac summorum virorum sermonibus prædicata, et omnium pene, præcipue Complutensium ac Toletanorum ciuium, iamdiu firmata consensu, nullam ancipitem afferre possunt scribendi curam. Mirabilis fuit Deus in Didaco sancto suo magnitudine et multitudine miraculorum, quæ edidit numero centum triginta, et amplius. Non mei muneris puto, omnia singulaq. recensere: sed quæ aliquo nomine illustria sunt, et quæ in primis, sacrosancta Sedis Apostolicæ auctoritate mature comprobata, animum meum exsuscitant ad ea, ut possum, luculente scribenda.

Primo, quod de beato Hilarione Abbate, sanctus Hieronymus scriptum reliquit, de beato itidem Didaco testatissimum est, atque compertissimum, ex eius mortui corpore miram-

odori

odoris suauitatem esse ita afflatam, vt, cum cubiculum totum repleuerit, tum omnes etiam qui præsentes aderant, delectatione perfuderit. Nemo autem diiudicare poterat, vnde tanta orationum vis dimanaret. Sed illud commemorabile est, atque admiratione dignissimum, eam odoris iucunditatem sensu percipi nequaquam ab ijs potuisse, qui tetrīs peccatorum sordibus sese inquinassent. Vbi vero de ijs recte confessi sunt: gratissimum inde odorem senserunt.

Eius corpus præ ieiunio, abstinentia, et inedia, nigroris speciem præ se ferens, candore post obitum reluxit: vultus illius non mortui, sed viuētis: artus, et articulorum, manuumq. commissuræ flexibiles, vt sequerentur, quocumque verterentur. Neque vlla corporis pars, cum mortua caloris est expers, obrigit, vt hominis cadauer obrigescere solet.

Quarto die corpus exhumatum, tantum abfuit, vt foede putresceret, vt mirificas orationes afflaret; etiam si nullis vnguentis delibutum, aut balsamo conditum, in sepulturam traditum esset. Multos autem post exhumationem dies insepultum odorum suauitate semper exhalauit. Aliquando itidem accidit, quo præsertim tempore ad eius sepulcrum fit aliquod insigne miraculum.

Sed cum ingens sit numerus rerum admirabilium, quas is diuinitus gessit, illas narratione contexam non sine ordinis ratione. Primum de miraculis dicam, quibus in vitæ huius stadio clauit: deinde vero de reliquis, quæ prece et meritis serui sui Deus facere non desijt, iam inde a qua die obiit vsque ad hæc tempora, quibus illius sanctitatem diuina benignitas illustriore reddidit tam admirandis operibus, quæ narranda sunt.

Pauit eum Dominus aliquando in solitudine, quemadmodum Elisæum, Paulum eremitam, et alios seruos suos. Sed rem totam scripsi, quo loco exposui iter eius Hispalense.

Morbos autem insanabiles, quos diuine curauit solo tantum crucis signo, difficile est, atque longum nimis enumerare. Sed illud assueuerant dici licet, eorum curatione vbique excitatam ita esse admirabilitatem nominis sui, vt magnus ad eum concursus fieret.

Hispalim cum iter beatus Didacus haberet, ad hominem  
diuertit

diuertit fratrum ordinis sui hospitem . Erat in vicinia mulier, quæ præ inopia furnariam exercebat, vt se suamq. familiam sustentaret . Habebat hæc filium, annos septem aut amplius natum : qui matris, iracundia exardescens, acerbitate metuens, sæpenumero aufugere solebat . Is quodam die verberibus cæsus, domo abiit : neque est ante diem Dominicum reuersus . Tum vero timens, ne a matre acerbius iterum vapularet : in furnum sese abdidit, vbi somnus cum artissime complexus est . Eo loci puerum iacere, cum illa ignoreret : postero die, qui dies feria secunda fuit, ante lucem surgens, ignem admouit furno. Qui tam celeriter flammis exarsit, vt simul et puer horribilem in modum clamitaret, et furnus ignesceret . Eo acerbissimo filij casu mater mæsta ac mærens, cum non esset, qui sibi opem ferret, gemitu eiulatuq. lugubri, et vociferatione muliebri viciniam replebat, auxilium expetens . Cui beatus Didacus, bene iuuante Deo, obuiam factus, re audita, mulierem consolatur : bono animo esse iubet, hortaturq. hoc maxime, vt ad ecclesiam quamprimum propere festinet, vbi ad beatæ virginis Mariæ altare supplex, filij salutem ei misericordiarum matri intime commendet . Recte monenti paruit illico mater, pueri periculo consternata : tum continuo beatus Didacus et socius, ad furnum profecti, lignis et sarmentis incensis, illum ab omni plane illo ardore incolumem inuenerunt . Ob rei admirabilitatem ad sacram ædem, vbi mater precabatur, illum perductum albis vestibus Canonici induerunt in honorem beatissimæ Virginis : nemoq. aderat e frequenti populo, qui illum curiosè non spectaret, tamquam e media morte mirabiliter ereptum . Sacellum autem, quo is, ab incensione liber, in omnium conspectum adductus est, magna in veneratione esse deinceps cœpit : cum multa præsertim miracula, beati Didaci gratia, Deus postea fieri ibi voluerit .

Miraculorum beati Didaci fama percrebuit, et in ore sermoneq. omnium cœpit esse . Sed non deerant, qui illa præcise negarent . Mire tamen, ac diuine factum est, vt iidem palam publice illa faterentur, et commemorarent . Idq. planum ex ijs fiet, quæ mox exponam .

Maria Barahona, Garsæ ciuis Complutensis filia, aliquot post



post obitum illius beati viri diebus, in sermonem vna cum alijs mulieribus de eius miraculis incidit. Forte præsens aderat Alphonsus quidam Gonçalez, sacerdos: qui illa cum audiret, se non credere dixit, etiam si eadem valde confirmaret Apostolorum princeps, Petrus. Dum hæc temere dictitabat, quoddam beati Didaci tunicæ fragmentum exiguum in manu habebat, quod multo sudore manans, manum aqua madefecit. Res admirabilis cum cerneretur: continuo in fragmento simul et in manu aqua sudoris aruit. Eius rei admirabilitate tum Maria et ceteræ mulieres obstupefactæ sunt: tum vero Sacerdos commotus, aperte asseueranterq. dixit, se plane credere, quæ de beato Didaco miranda narrantur.

Ioannes de Guadalajara, homo Complutensis, aliquando cum alijs ciuibus Complutensibus colloquium de miraculis habuit, quæ beati Didaci prece Deus operabatur. In ijs Ioannes cum hæsitaret: domum reuersus, dum noctu somnum capit, de repente in crure prope genu ita vehementer dolore cruciatur, vt clamores et gemitus ederet miserabilem in modum. Iampridem nimirum quindecim ante annis ea in parte vulnus acceperat: neque antea vmquam, ne leuiter quidem, nisi tunc primum doluerat. Eo cruciatu exarsit tota nocte, et postero die mane quousque ad Missæ sacrum accessit. Cum autem ad Chori altare stabat, tum repentini doloris impetu victus, non modo stare non potuit, sed necesse habuit, humi stratum iacere: tum in mentem statim venit causa, quamobrem plagæ, quæ tamdiu obducta erat acerbiter sentiret. Qua recordatione excitatus ad beati Didaci sepulcrum, vt ægre potuit, se contulit. Eo loci Deum hoc intime precatus, vt ob illius merita sui misereretur doloremq. sibi vniuersum adimeret, quo acerrime torquebatur: tum vbi paululum orasset, magnam in crure vim caloris sensit: quo diuinitus a doloris liberatus est cruciatu.

Aluarus Gaa, homo Lusitanus, Archiepiscopi Toletani familiaris, commiseratione ductus ancillæ, quæ domi suæ cum marito habitans filiam paucis ante horis mortuam, miserabiliter lugebat, eam consolando monet, vt ad beati Didaci, cuius tunc miraculorum nomen maxime increbrescebat, sepulcrum puellam deferret, id a Deo precans, vt ob eius merita

F                      ta filiam,

ta filiam, ad vitam reuocaret. Pie monenti, cum ilico obtemperasset, domum puellam, quam mortuam inde extulerat, viuentem ac validam reduxit.

Homo quidam, in oppido de Agreda natus, oculis omnino captus, omnium sermone diffusa celebritate miraculorū, quæ beati Didaci meritis et precibus Deus efficiebat, multis locis medicum, cuius virtute lumen recuperaret, se conquisiuisse dixit: hic tamen illum inuenio, qui a cæcitate me diuinitus liberauit. Ad sepulcrum igitur beati eius viri accessit, cuius manum oculis cum admouisset: eorum sensum, cuius omnino expers erat, diuinitus recuperauit.

Filios duos, cæcos, pater quidam, in pago de Corlon natus, ad illius monumentum adduxit: vbi paululum terræ e sepultura cum excepisset, lutum confecit, quo eorum oculos obliniuit. Id pura fide cum pater effecisset, liberi restituti sunt ad integrum oculorum sensum.

Constantia Mendocia, Didaci Lopez filia, menses quinque febris grauitur laborauit: a qua diuturna et periculosa ægrotatione liberari nullis etiam assiduīs medicorum curationibus potuit. Itaque cum beati Didaci miracula, quæ tum frequentia erant, auditione accepisset: ad illius monumentum, cum adhuc febris æstualet, aduēta ac Deum precata, ob viri illius beati merita valetudinem pristinam ita recuperauit, vt febris, cuius æstu, aut horrore vehementer vexabatur, ne commotiunculam quidem vllam, vel minimam in posterum senserit vnuquam.

Hieronymus, homo Segobiensis, quinto et decimo quoque die, ita grauitur morbo comitiali afficiebatur, vt mortuus putaretur. Fama ductus miraculorum beati Didaci, vouit se ad illius sepulcrum vigilias esse acturum. Quo voto pie nuncupato, statim morbum euasit: neque se in posterum ab eo tentari sensit.

Petrus Philippus, et Catharina, coniuges, in pago del Fresno natī, filium habebant febris grauitur ægrotantem. Qua febris is quodam die cum vehementer æstualet: præ æstu dum clamorem, gemitumq. magnum edidit, vocis vsum amisit: neque cibum deinceps capiebat, nec vero capere poterat. Quam ob rem desperata eius valetudine, parentes cum beato  
Didaco

Didaco commendarunt : cuius cælesti apud Deum auxilio confestim locutione recuperata , a feбри etiam conualuit .

Ioannes Sanchez , familiaris Principis oppidi Sancti Iuliani, tres ipsos menses ex tumore pedum laborabat : eamq. ob rem incedere , aut stare nullo modo poterat , nisi baculo nitebatur . Auditis rebus beati Didaci admirandis , quæ omnium sermone celebrabantur , ad illius sepulcrum se aduehi voluit . Ex voto triduum ibi mansit : in singulosq. dies eo nomine Missam celebrandam pie curauit . Dum autem fixus in oratione versabatur , a pedum tumentium morbo se mirabiliter liberum vidit , ac professus est .

Vir quidam , genere nobilis , elephantiasi morbo fœde infectus , ad beati Didaci monumentum delatus , multos ibi dies in lecto iacuit , potu aquæ vsus , qua manus ille ablucere consueuerat : factum est , vt contra omnium spem ab insanabili eo contagio conualuerit .

Henricus Quartus , Castellæ Rex , et filia , aliquo post beati viri obitum , spatio temporis , grauiter ægrotarunt . Factum est , volente Deo , vt , quoniam nullis medicorum remedijs præsentibus sanarentur , prece ac meritis beati Didaci valetudinem pristinam recuperarint . Cuius diuini beneficij Rex memor , illius nomine sacellum impense extruxit : vbi eius corpus intra arcam ferream pie recondi iussit .

Ioannes de Soto Catharinam filiam habebat , ex pustularum morbo periculose laborantem : cuius etiam morbi vi iam puella cum oculorum sensum amiserat , tum vero cibum sumere nequaquam poterat . Eius salute desperata pater , rerum mirandarum beati Didaci commemoratione excitatus , continuo supplex ab eo petijt , vt filiæ incolumitatem a diuina benignitate deprecaretur . Quod si impetraret , vouit se nocte vna ad eius sepulcrum vigilaturum . Abijt inde pater , vbi puella , morbo perculsa iacebat : postea vero quam redijt eam reperit a malo liberam , integreq. vtentem sensu oculorum : quo patrem intuens , hilari vultu illum salutauit .

Catharina Martinez , mulier Hispana in pago Duron nata , cum prope fontem quendam esset , repentina vi quadam morbi , paralytica , muta , ac surda euasit . Quo triplici morbo tres ipsos menses vehementer laborauit . Ad beati Didaci se-

pulcrum aduēta, dies nouem ibi vigiliis egit: Cum verò semel manu illius beati viri, instar crucis, signaretur: diuine factum est, vt membrorum omnium vsum continuo recuperarit. Pedibus suis incessit, aurium sensu audiuit, et absque vlla linguæ hæsitacione, aut impedimento, ne minimo quidem, locuta est. Immo libere primum, vicario præeunte, ea verba protulit: Laus Christo Iesu.

Adolescens quidam, annum vigesimum agens, ab improbo spiritu obsessus, ita horribiliter exagitabatur, vt, cum quotidie sæpius in terram caderet, se ad puteos præcipitem ferri clameret. Adductus igitur ad sacellum, vbi beati Didaci corpus pie asseruatur, aliquot post diebus, quibus eo loci mansit, ab illius vexatione astuq. est mirifice liberatus.

Didacus Lorca, spiritus impuri, quo miserabiliter vexabatur, impetu sæpenumero in terram ita abiciebatur, vt horæ spatio prorsus omni sensu careret. Quo cruciatu ægre afficiebatur: eamq. ob rem mallet se mori, quàm ita dolenter atque acerbe viuere. Ad sacellum igitur beati Didaci, cum nullum aliunde remedium inuenisset, se peregrinaturum diesq. nouem commoraturum vouit. Eo profectus illius spiritus nequitia, et impetu haudquaquam liberari potuit: id propterea ad conuentum beatæ Mariæ de Guadalupe redijt, vnde proxime discesserat. Tum a propinquo rogatus, an qua debuit fixa animi pietate, sinceraq. fide se beato Didaco commendasset, id minime a se factum respondit. Quare monitus, vt ardentiori deuotionis studio opem eius imploraret, pedibusq. nudis ad sacellum incederet, monentis propinqui consilio paruit. Quo factum est, vt, quodam die flexis genibus cum intime oraret, a spiritu nequissimo omniq. malo repente liberatus sit diuinitus.

Maria, vxor Ioannis Florès, diocesis Toletanæ, ex partu infanijt: ita a mentis statu depulsa, vt stulte et furenter ageret omnia. Eam ob rem mentes duos vinculis ferreis astricta tenebatur. Coniugis miseratione commotus Ioannes, votum nuncupauit, vt ad beati Didaci monumentum eam adducat. Cum autem voti sponsionem præstare maximopere cuperet: venit vna cum altero, quem sibi socium adhibuerat ad locum, vbi catenis constricta erat. Mirum, vt, voto facto, illam inueniret

nerit non modo non furenter insanientem, quemadmodum antea, sed quiete placideq. confidentem. Ad sepulcrum igitur beati viri ex voto perducta, dies decem ibi commorata, tandem illius prece ac meritis, ad mentis sanitatem rediit.

Antonius Frances, Isabellæ Reginæ familiaris, menses circiter octo, ita febris grauius vexabatur, vt totius corporis dolore misere cruciaretur. Tam diuturno morbo et cruciatu se medici na liberari non posse, experiundo cognouit: voto nuncupato, ad beati viri sepulcrum se adduci voluit. Vbi dies nouem cum vigilas egisset, per illius merita Deum de salute precatus, in dies singulos meliuscule se habere incepit, vsque adeo vt inde discesserit, bene a morbo confirmatus.

Igni sacro, morbo acerrimo, quem sancti Antonij nomine vulgo vocant, vir quidam acerbissime afflictatus, ad illius beati viri monumentum intima pietate ductus, venit: vbi cum arcam, in qua eius corpus reconditur, brachio tetigit, ab eo morbo statim conualuit.

Maria, in oppido dela Parra nata, puella ætate septē circiter annorum, oculis capta, ad sacellum beati Didaci a patre aduecta, triduo ibi cum mansisset, videndi sensum non recuperauit. Vbi vero inde cum patre abiit, dum torrentem transit, patrem sic affatur: Video pater mi: beatus enim Didacus oculos mihi aperuit: tumq. se cernere dixit et Complutum, et caminos fumum emittentes. Postea vero integre vsa est oculorū aspectu.

Beati Didaci precibus homines tres, qui præ maxima morbi vi obierant, a morte ad vitam reuocati, ad eius monumentum aliquamdiu euigilarunt: vbi sunt publice palamq. testificati omnibus tanti miraculi magnitudinem. Cuius rei illud certissimo est argumento, quod linteum idem induerunt, quo, vt in Hispania moris est, inuoluti, ex vita hac migrantes, in sepulturam inferuntur.

Alphonfus Martinez, nocte quadam, dolore cordis drepente affectus, cruciabatur maxime. Quo in cruciatu sibi corpus inflammari et intestina dilacerari videbantur. Itaque magnopere metuit, ne illa animi acerbitas, quasi rabies canis aliquando fieret. Confugit pie ad beati Didaci monumentum, cuius patrocinio cum intime se commendasset, continuo ab illo animi maiore conualuit. Ex capite autem cum deinceps  
magno-

magnopere doleret, eodem remedij causa se recepit: vbi genibus flexis opem per illius merita a Deo precatus, nullum deinceps dolorem sensit, odore etiam afflatus, quem inde suauissimum perceperat.

Mulier quædam Hispaniensis, annos triginta nata, iam septem et decem muta, ad beati viri sacellum perducta, vigilias nouem ad illius sepulcrum cum egisset, corpori demum proxime admota, vbi e linguis erat, confestim loqui cœpit. Tum omnes, qui aderant, rei admirabilitate obstupefacti, gratias Deo ingentes egerunt, quod rem tantam oculis suis spectassent.

Melchiora Aguilar, diuturno morbo languescens, demum in paralyfim incidit: quæ nullis medicamentis curari potuit. Ad beati Didaci sacellum euecta, qua primum nocte eo ingressa est, dum in matutina hora euigilabat, tanto sudore manauit, vt guttatim deflueret. Deinde quadam animi defectiōne cum mortua putaretur: paulo post ad se rediens, integram valetudinem mirabiliter recuperauit.

Dominicus Fernandez, in pago Dela Viñuela natus, cruribus debilitatus, nullam in partem se mouere poterat, nisi aliena ope adiutus. Ad beati viri sepulcrum iumento vectus, vbi quadriduo mansit, Deum de valetudine ob Didaci sancti merita precatus, subito conualuit.

Maria Garcia, femina nobilis, nurum Catharinam habuit, cui parturienti certum ex partu periculum impendebat, propterea quod infans, in vtero transuersus, vnum tantum pedem inde extulerat. In tanto puerperæ discrimine illa commemorat beati Didaci, qui tunc miraculorum claritate splendescibat. Recreata igitur aliquantulum ex spe, quam in illius beati viri meritis habebat, ilico vestis, qua is indutus fuerat, exiguum fragmentum, paulumq. terræ, qua corpus contegebatur, afferri iussit. Rem vnā et item alteram nurui admouit: quæ statim puellam peperit, mortuam illam quidem, sed ipsa periculo liberata fuit. Ex tanto autem miraculo socrus etiam puellæ vitam restitui præ fidei ardore a Deo petere confisa, vouit, si id impetrasset, in sacello beati Didaci se dierum nouem vigilias acturam. Voti compos facta, puellam, quæ horis quattuor mortua manserat, cum reuixisset, in sacro baptisimi



præfmi fonte Mariam suo nomine vocari voluit.

Martinus Fernandez, in oppido Alualate natus, febrî graui-  
ter ægrotans, in mortis periculum adductus, iam pene mor-  
tuus putabatur. In eo statu cum esset, linteo inuoluitur: cui  
coniunx tum flebili altaq. voce, Martine, inquit, de valetudi-  
ne tua votum feci, cuius sponsione obligor Deo, te peregrina-  
turum ad sacellum beati Didaci, ubi in oratione euigiles: quam-  
obrem cura, ut valentior fias. Hæc vix dixerat, quod ille lin-  
teo, quo inuolutus erat, se se explicans, voce respondit homi-  
nis, non animam agentis, sed viuientis: sicq. mirabiliter ex  
morbo conualuit.

Ex intestinis, doloreq. stomachi homo quidam Conchenfis  
grauissime laborabat, usque adeo ut mori metueret. Beati Di-  
daci, quem in hac vita olim familiariter norat, precibus se in-  
time commendauit: statimq. e graui morbo euasit. Illud præ-  
terea testatus est, neque se, nec vero quemquam familiæ suæ ad  
vllam corporis inualetudinem adhibuisse vnumquam medicum:  
sed si quando in febrim, aut in aliquem morbum inciderunt;  
beati Didaci precum ope se, suosq. ob omni ægrotatione li-  
beratos esse.

Leonora Conçalez, femina Hispanienfis, febrî periculose  
æstuans, votum nuncupauit peregrinationis ad sacellum beati  
Didaci. Quo voto facto confestim a morbo conualescens, ut  
illud solueret, eo venit: ubi, cum vix pedem illuc intulerat, in  
febrim incidit. Admirata mulier, quid causæ esset, cur sibi ali-  
ter, atque alijs, ex morbo laborantibus succederet: qui, tan-  
tum abest, ut malis recentibus afficiantur, ut veteribus omnino  
liberentur. Id aliqua culpa sua factum, animo cum reputaret:  
Arabice scriptam se quandam schedulam habere meminit,  
quam ubi legi iussit, dæmonum nomina, litteris consignata,  
in ea esse compertum est. Inflammari quamprimū eam man-  
dauit: sicq. continuo febris discessit.

Petrus Ramirez, ex pago Sancti Adriani, homo incuruus,  
et herniosus, ex utroque malo valde admodum laborabat.  
Ita enim curuus fuit, ut ab humeris aliquid prægrande instar  
capitis humani extaret. Hernia, quam Rotturam vulgo dici-  
mus, usque adeo ab inferioribus partibus intestina diduxit, ut  
matulæ vasis speciem præ se ferret. His ambobus corporis  
malis,

malis, et deformitatibus ægre affectus, præ doloris molestia, quam sentiebat, somnum, aut quietem capere non poterat. Tum beati Didaci miraculis omnium sermone celebratis adductus in viam se dedit, vt ad illius sepulcrum iret. Eo antequam peruenit, nocte quadam ob eius merita a Deo auxilium valetudinis recuperandæ omni summa pietate suppliciter petijt. Diuinitus factum est, vt precatione facta, se non incuruum esse senserit. Vbi vero ad illius monumentum venit, in oratione, cum semel pernoctasset, ab hernia statim confanescit.

Ioannes Martinez, ex vrinæ difficultate laborans, triginta ipsos dies mingere non poterat intolerabili cum cruciatu. Vrinæ autem loco sanguinem guttatim effundebat ægerissime. Noctē quadam precando cum ad beati viri sacellum vigilaret, derepente calculum ita grandem emisit, vt natura exire non posset. Ita diuinitus factum est, vt cum morbum depulerit omnino.

Alphonfus Garcia, homo Complutensis, lumborum dolore vehementer cruciatus, cum neutram in partem moueri haudquaquam posset, ad Didaci beati sepulcrum se ex voto aduchi voluit. Ibi per sancti viri merita Deum precatus, cum ad lumbos sibi manus illius admota esset, ilico miram caloris vim sensit, quæ dorsum inuascerat. Is calor ita dolorem depulit, vt deinceps a malo conualuerit in perpetuum.

Ioanna Mendocia, Gomezij Manriqueij coniux febris æstu, et horrore grauius afflicta menses duos, cum nihil sibi quicquam prodesse videret, quod a medicamentis proficisceretur: de valetudinis recuperatione id consilij cœpit, vt ad beati Didaci sacellum veniret. Eo perducta, ad eius sepulcrum supplex accidens, antequam e supplicatione surgeret, a se febrim ita discessisse sensit, vt nullis eius commotiunculis affecta sit in posterum.

Didacus Garauito, cum pilæ ludum spectaret, ictu supra oculum vehementer percussus, præter capitis dolorem, quem ex eo intolerabilem traxit, nihil quicquam, oculi fracti, et sanguinem fundentis aspectu cernere poterat. Oculo igitur captus, cum aliunde non inueniret, vnde sibi remedium adhiberet: Dei opem implorauit, qui ob Didaci beati merita illum respexit. Nam beato illo viro deprecatore, ad cuius cæleste patrocini-

patrocinium confugerat, vsus cum nullum capitis dolorem sensit, tum oculi amissi sensum recuperauit plane diuinitus.

F. Antonius Aguayo ordinis Minorum, media nocte cum matutini signum campana dabat, tam acerbum dolorem in latere sinistro accepit, vt præ cruciatu horribiles clamores mensium circiter trium spacio ederet. Eo cruciatu etiam tortus, cum somnum neque diu neque noctu capere posset, ad beati Didaci precationem diuinam confugit: cuius ope quamprimum sanatus est.

Ferdinandus, Ioannis Ferrandez, et Catharinæ filius, morbo languescens, viribus labefactatus capitis, quod nullo modo, neque a dextra, neque a læua parte sustinere poterat: et manu debilitatus, quæ, quasi exarescens, diduci, et contrahi nequibat, ad beati viri sacellum perductus, illius meritis restitutus est ad integram valetudinem.

Petrus Martinez, cæcus ab amico ad beati monumentum adductus, visum, cuius expers fuerat, illius ope implorata, continuo recuperauit.

Isabella Sanchez, Gonçalij coniunx, Mantuæ Carpetanorum, quam Madrid vulgo vocant, nata, toto corpore tumescens, omnibus partibus deformata, et vultu decolorata, numquam vllis exquisitis medicamentis sanari potuit. Vbi primum ad beati Didaci sacellum aduecta est, cum vigilias tres precibus egisset, a tumore conualescens, pristini decoris speciem præ se tulit mirabiliter.

Gonzalus, Lopij Garcíæ filius, febris quartana annum ægrotabat. Ad beati viri monumentum pietatis causa profectus, cum Guardiano egit, vt sibi illius corpus ostenderet. Quod cum impetrasset, vbi illud pie spectauit, diuinitus factum est, vt ex febris quartana deinceps neuiquam laborarit.

Ioannes González, ciuis Mantuæ Carpetanæ in Regno Toletano, filium Didacum habebat ramicosum, nempe ex hernia laborantem. Annos duos filio curationem ex medicorum solertia cum adhibuisset, nihil ei profuit tamen ad valetudinis recuperationem. Confugit tandem ad beati Didaci auxilium, cuius cælesti prece a Deo salutem filij et incolumitatem mirifice impetrauit.

Lopezius Enzinas ex equo deciderat: quo casu brachium dextrum fractum ita exaruit, vt ad rem nullam eius functione ac munere vti deinceps posset. Miraculorum beati Didaci fama commotus, magna erga cum veneratione et spe exarsit. Nocte quadam sibi ille in somnis adesse visus, ab eo petijt se ipsius apud Deum deprecatione, sanum fieri. Tum Didacus, manu imposita, Abi, inquit, quia sanus es. Somno expergefactus, cum somnium inane putaret, tamen aliter euenit: propterea quod brachium prorsus validum et sanum diuinitus factum est, vt in posterum facile eo vteretur ad omnia.

Laurentius Martinez, decem ipsos annos brachio erat fracto, beati Didaci sacellum cum pie adiret, ad integram illius restitutus est valetudinem, magna omnium, qui cum norant, admiratione.

Ioannes Martinez, de vico, quem Castillejo Hispanice vulgo dicunt, annorum duodecim spatio manibus mancus ac debilis, pedibusq. ob paralysem captus, ad sacellum beati viri iumento vectus, vigilias nouem ibi orando cum egisset, sanus factus, manuum, pedumq. vsum in posterum adhibuit.

Ioannes alter Martinez, ab latere vno totus paralyticus, ac diu mutus, ad beati Didaci monumentum perductus, vbi primum vigilias duas in oratione egit, diuinitus est ab ægrotatione confirmatus.

Ioanna, Catharinæ Diez filia, omnibus fere membris capta, ore obtorto et deformi, lingua hæsitanti: beati Didaci patrocinio a matre intime ac pie admodum commendata, membrorum vsum, oris decori formam, locutionis naturale munus statim recepit.

Didacus de Guadalupe, morbo comitiali in dies singulos sæpe quinquies, aliquando sexies grauissime exagitabatur. Voto nuncupato ad beati viri sacellum dies nouem in oratione euigilauit. Die autem nono longe grauius, quam antea, vexatus, ab hac vita migrasse videbatur. Sed diuina ope ob illius viri beati merita factum est, vt in posterum nullam tam vehementis morbi molestiam vel leuissimam vmquam senserit.

Franciscus Fontius, vas testaceum, amplum ac ponderosum, in cellam vinariam deorsum immittere cum vellet, ad hoc opus faciendum vsus est opera Francisci cuiusdam Sanchez,

chez, qui illud fune constrictum, et suspensum, extrinsecus paulatim demitteret. Hic tam graue onus cum sustinere nequaquam posset: continuo ex illius manu vas lapsum, multis partibus infractum, Franciscum, qui subter erat, sursum spectantem, maximopere læsit. Ea igitur confractioe varie percussus, et animo sensuq. omni consternatus, in lectulo quasi mortuus collocatur. In quo cum esset, se a dæmonibus præcipitem per quosdam montes ferri, idq. illos triumphare, ac lætari vidit. Vbi ad summum montem tenebricosum tandem ventum est, cum ipsum præcipitare inde velle ij viderentur: tum beati Didaci, cui se commendauit, recordatione recreatus, nihil aliud per visum aspexit, nisi illustrem claritatem, auditioneq. vocem hominis accepit, iubentis eum bono fortiq. animo esse, ac sequi, quo iret. Tum Francisco visus est illum comitari vsque ad vicum quendam, quem Pozuelo vocant vbi ille habitabat. Eo cum ambo venissent: tunc, Abi, ille inquit, domum tuam, et de mulieribus percunctare, quæ earum a beato Didaco precum suarum opem tibi implorauit. Id ab ijs cum quæsisset: mulier quædam Mencia respondit, Ego illi Dei viro te commendauit. Hæc verba Franciscus vbi primum audire visus est, statim a morbo integer et sanus factus est, ac liber ab illa dæmonum impressione.

Lopius, et Isabella, coniuges, Mantuæ Carpetanorum in Regno Toletano nati, filium habebant, annos circiter octo natum, ex febris biennio laborantem, ventrisq. tumore languescentem. Pater votum nuncupauit de eo ad beati Didaci sacellum perducendo. Vbi primum vouit, tum puer statim bestiolas duas euomuit instar testudinum, et magnam simul copiam sanguinis emisit, vsque adeo vt vitam vix ducere posse videretur. Tantam pestem posteaquam ex intestinis foras proiecit, ad hominis Dei monumentum allatus, ab omni morbo mirifice quadridui spatio conualuit.

Alphonfus Cardero, bello Nauarriensi, hasta in facie vulneratus, luculentas etiam duas plagas in eadem accepit: quibus adductus est in mortis discrimen. Vbi autem menses octo et amplius ob vulnere curationem domi se continuit: nihilominus tamen vultu erat deformato, quia cicatrices obductæ cum os contraxerant, tum oculum alterum peruerterant.

Ea oris, vultus, et oculi distortionem, foede affectus, ad beati Didaci sacellum ex voto pie peregrinatus, posteaquam vigilias nouem precando egisset, ilico integra forma, pristinaque specie fuit et oris, et oculi: quo utroque præ cicatricibus distorto, et peruerso antea utebatur.

Petrus Arze de Auila, quattuor abhinc annos oculis captus, atque omnibus corporis membris debilitatus dolorumque cruciati ægre affectus, nulla umquam cura sanatus, res Didaci beati mirificas, cunctorum vocibus celebratas, cum primum audiuit, ad illius sacellum se perducere voluit. De aspectu oculorum, et valetudine recuperanda ob eius merita Deum deuote, humiliterque deprecatus, nocte quadam, dum somnum capiebat, se conualescere sensit. Quo sensu expergefactus, lampadis quæ in sacello prælucebat, lumen oculis aspexit. Eius rei mirabilitate obstupescens ingentes Deo gratias agere non desijt.

Alij duo homines, ad Didaci corpus venerant. Quorum alter ex manuum corporisque tremore ita vehementer laborabat, ut neque cibum, neque potum sumere posset. Alter medio latere mancus et debilis, ægre vexabatur. Ambo ad illius corpus proxime admoti, continuo sanati sunt.

Pater quidam, ex oppido, quod Tamajon Hispanice vocant, ad beati viri sacellum filium adduxit: qui, sextum annum agens, crus habebat altero breuius, et contractius digitis tribus. Dies septem cum in oratione euigilasset: octauo tandem die, voti compos, filium ilico vidit sanum, pedibusque suis recte incedentem.

Petrus Gonzalius, loci de Vzeda, sacerdos Capellanus, qui sanctorum martyrum Iusti et Pastoris ecclesiæ cura præerat, lumborum dolore ægre affectus, dies quindecim in lecto iacuit. Miraculorum, quæ Didaci beati meritis Deus efficiebat, magnitudine ac multitudine audita, cum iacebat, ad eius sacellum se aduehi voluit. Quo postquam venit, illud a Deo supplex humiliter petijt, ut sibi in tanto cruciati illius viri beati meritis succurreret. Id deuote aliquantisper precatus, eius manu sibi in dorso signum crucis fieri voluit: quo factum est, ut a lumborum dolore sit diuinitus liberatus in perpetuum.

Alphonsus, pagi de Hontanar ex dolore laborabat, quem  
acerbum



acerbum in crure dextero sentiebat . Ad quem multa medicamenta vsque adeo adhibuit , vt plaga quædam sese aperuerit : cuius etiam dolorem cum lenire non posset, ad beati viri sepulcrum venit . Tum illius manu vulnus contactum , vbi sanguinem emisit, ilico obductum est : neque postea Alphonsus vquam dolorem vllum sensit .

Mulier quædam Hispaniensis , octo et decem annos muta , cum sanari medicamentis non posset , ad beati Didaci sacellum perducta est . Tum F. Ioannes Tolosanus, ordinis Minorum, qui præsens aderat , mulieri manum beati viri admouit , simulq. cum nesciret, ex quo præcipuo malo laboraret, ab ea quæsiuit, quo morbo afficeretur : mox alia mulier præsens respondit, illam iam diu mutam esse . Id vbi Tolosanus audiuit, mutæ dixit : pronuncia salutationem Angelicam , Ave Maria : quam totam pronunciauit, itidem ordine orationem Dominicam, symbolum Apostolorum et præcepta fidei . Sicq. deinceps linguæ munere vsa est ad omnem loquendi functionem .

Ferdinandus Martinez, triennium sinistro et dextro brachio, et crure debilitatus , auditis beati Didaci miraculis, quoniam incedere non poterat, baculis nixus, ad eius sepulcrum venit . Deum de valetudinis recuperatione humiliter deprecatus, sudariolum fratri cuidam ordinis Minorum tradidit, quo beati viri corpus attrectaret . Ille pie obsecutus, tum sudariolum restituit, quo manum Ferdinandus arescentem vbi inuoluit, statim consanescere sensit : itidem crus meliuscule habuit, vsque adeo vt inde omni morbo liberatus abierit .

Longum nimis esset, singulos narrando percensere, qui morbis varie affecti, humiliter ac deuote ad beati viri sacellum profecti, sperantes in eo, qui sanat contritos corde, per illius hominis Dei merita ad integram restituti sunt valetudinem . Iam vero ex ijs, quæ breuiter commemorata sunt, perspicuum fit, omnes quacumque vel ægrotatione languescentes, vel periculo expositos, illius precibus et meritis a malis omnibus, etiam e mortis faucibus ereptos, sensisse, vel potius sentire præsentem virtutem Domini nostri Iesu Christi .

Ad tanti viri sanctitatem præterea magis atque magis colu-  
lustran-

lustrandam accedunt etiam miracula, non ea scilicet tantum, quæ ad eius sepulcrum facta narraui, sed quæ ex eius vestitu, cingulo, sepulcri terra, externaq. eius re alia Deus extare voluit.

Ex tunica vestibusq. sancti Martini admirandas virtutes prodixisse, narrat Sulpitius Seuerus. Ex beati Hilarionis rebus externis aut monumentis miracula extitisse testatur sanctus Hieronymus, qui illius vitam litteris mandauit. Rursus ex sancti Hieronymi sacco res mirificas diuinitus consecutas esse, vitæ illius annales loquuntur. Nolo ceteros, qui innumeri sunt. Iam nunc, cum exempli causa eos tantum tres meminerim, dicendum mihi est de beato Didaco, e cuius rebus, etiam externis, miracula eminent.

Mulier quædam Vacienſis, quam urbem vulgo Baeça dicunt, erat: quæ pietatis causa fratres ordinis Minorum hospitio gratis excipiebat. Hæc filiam habuit, annos circiter octo natam: quæ tanto morbi cruciatu afficiebatur, vt obrigescentibus membris, moreretur. Ad filiæ autem morbum depellendum mater experta omne medicamentum, tandem piorum hominum consilio vestem eius collo imposuit beati Didaci. Quo facto mirabiliter confestim puella sanata est.

Ioannes Fernandez, intolerabili lateris dolore cruciabatur: ad cuius curationem cum remedia multa conquisisset, hoc vnum diuinitus inuenit, quod cinguli, quo beatus Didacus vsus erat, fragmentum quoddam vbi primum lateri, doloris acerbitate perculso, admouit, plane conualuit.

A monasterio Complutensi homo quidam religiosus ordinis Minorum, Idubedam, vbi aliud coenobium est, cum iter instituisset: relicta veste, qua diu vsus erat, alteram mundam induit. Diuinitus factum est, vt ea esset, quam beatus Didacus olim vestierat. Idubedæ is vir religiosus dum morabatur: interea cuiusdam Idubedenſis graue ac mortiferum vulnus in aluo accepit, vnde intestina effluebant. Huic, animam prope agenti, mater, femina præclaræ pietatis, ab illius conuentus fratribus vestitum seraphici ordinis petijt: quo vestitu amictus filius moreretur, et humaretur. Sed nimirum Deus effecit, vt eam ipsam vestem traderent, qui Compluto proxime allata erat. Illam vbi ægrotus induit, præter omnium opinionem

nem meliuscule se habere incœpit, atque adeo ex vulnere conualuit. Cum autem cognitum atque exploratum est, illam fuisse tunicam, quam beatus Didacus olim induerat, omnes miraculum tam magnum eius meritis virtutiq. acceptum retulerunt.

Ioanna Gomez, canis rabiosi morfu percussa furenter vsque adeo insanijt, vt vijs publicis præceps rabie ab omnibus, qui obuiam ei fierent, prorsus vitaretur. Tanto furore cum mulier horribilem in modum æstualet: illius sanandæ homo quidam valde cupidus, aliquid pusillum terræ e beati Didaci sepulcro ad eam asportauit. Propius ad eam accedere metuit: propterea quod capillis horridis et diuulsis, oreq. spumanti rabiem et crudelitatem præ se ferret. Terram vero sacerdoti cuidam tradidit, qui aderat. Is illam partim aqua liquefactam, mulieri propinauit: partim aridam, panno inuolutam, collo eius alligauit. Tum vero confestim ad mentis sanitatem redijt.

Ioannes quidam, corpore toto tumescēs, præsertimq. tibijs: ita tumens, vt incedere non posset: ad beati Didaci sepulcrum delatus, paululum terræ ex eo ad collum cum adhibuisset, tumore depulso, valetudinem diuinitus recuperauit.

Maria Alphonſa, Roderici Alphonſi vxor, diœcesis Toletanæ, ex gulæ inflatione laborans, pectore turgens, humeris, collo, facieq. tumescens, ita vt oculorum aspectu non cerneret, ac præ tumore non posset neque cibum, neque potum sumere: eius commiseratione motus Didacus parochus, intra cuius parochiæ fines illa habitabat, ad remedium ei attulit paululum fragmenti vestis, et exiguum aliquid terræ sepulcri beati Didaci. Vtrumque Mariæ, quæ beati illius viri pietate exardescibat, collo admotum, et alligatum, quam inde pie expetebat, valetudinem integram statim attulit.

In singulos fere annos, serui sui Didaci, posteaquam is ex hoc etiam sæculo migrauit, merita sempiterna Deus, gloriosus in sanctis suis testata esse voluit miraculis: quorum duo, paucis ab hinc annis præclare edita, maxime insignia sunt, vt in præſenti exponam.

Anno a Christo nato millesimo, quingentesimo, quinquagesimo quinto, Maria de Pinilla, virgo Hispaniensis, paralyſi

ralysi et morbo comitali simul grauiter vsque adeo afficiebatur, vt horas duas, aut tres interdum sensuum expers esset omnium. Acri assiduoq. capitis dolore cruciabatur: febribus nimis admodum molestis æstuabat: ex quodam lateris cruciatu vehementer torquebatur. Aliquando autem vis resolutionis neruorum ita illam inuasit, vt, cum multarum corporis partium vsum amisisset, aspectum præ se ferret foedissime deformatum. Aliam ei similem medici testantur se vidisse numquam. Multis alijs afflictabatur ægrotationibus: quibus menses vndecim pene confecta et consumpta, vbi exquisitissimis remedijs sanari nullo modo potuerat, ad beati Didaci sepulcrum aduecta, eius precibus ac meritis continuo salutem a Deo impetrauit: qui omnem illius morbum depulit, ac suam cuique membro vim restituit. Cuius beneficii memor suam Deo virginitatem vouit, virginalemq. vitam in monasterio sancti Ioannis, quod de la Penitentia vulgo nominant, egit sanctissime.

Anno M D L X I I. Hispaniarum Princeps, Carolus, Philippi II. filius, Caroli V. Imp. nepos, patris auiq. amor et delitiæ, Compluti in Regia cum luderet, e scalis quibusdam supinus cecidit. Quo casu tam vehementer offendit, vt letiferum in capite vulnus acciperet. Graue id vulnus ac mortiferum etiam medici putarunt: cumq. propterea Principis potentissimi, amplissimorum regnorum heredis futuri, ac summa indole pueri salus ageretur: non potuit Philippus pater non esse ingenti ac summa animi sollicitudine de filio, quem singularem vnice amabat, et in oculis ferebat. Quare nihil non attigit, nihil non egit, nihil non intentauit, vt in tanto vitæ periculo adiumentum Carolo filio charissimo afferret. Medicos peritissimos atque optimos ad pueri curationem vndique adduci iubet. Medicamenta, quæcumque excogitari, et conquiri solertissime poterant, vulneri præsto fuerunt. Verum omnia exquisitissima remedia vicerat morbi vis et grauitas: nisi Regem Catholicum, et eximium catholicæ religionis non modo cultorem, sed propugnatorem maximum, ac singularem, de filio mæstum et mærentem Deus pater misericordiarum, et Deus totius consolationis respexisset. Desperata igitur a medicis, et ab alijs

res cum esset, pater Rex secessit. Tum vestes lugubres, panni ad Palatij vestitum funebres, funestaq. apparantur omnia: et exequiæ denique, tanto Principe dignæ, diligentissime curantur. Dum in eam funeris curam incumbitur: ilico extitit a Deo salutare consilium, auxilium, et gaudium. Repente enim viri quidam, qui in luctu et mærore erant, cælesti aliquo et diuino instinctu ad beatum Didacum mentem conuerterunt. Postulatumq. tunc summopere est, vt eius corpus ad Principis cubiculum quamprimum adueheretur, et prope eum collocaretur: Quod singulari pietate, celeritateq. incredibili factum est. Corpus ad se pia veneratione delatum, Princeps, qui, morbo ingrauescens, et quasi spiritum agens, per se non poterat, ab alijs subleuatus, humiliter deuoteq. veneratus tetigit: sincera in primis et maxima fide Deum ob illius beati viri merita intime de valetudinis recuperatione precatus. Itaque eo ipso momento, quo Principem medici ex hac vita migraturum prædixerant, meliuscule se habere incoepit: tum, paucis horis elapsis, mirabiliter sancti eius viri precibus sanatus est, summa Philippi patris lætitia, et maxima omnis Hispaniæ gratulatione.

Nec præterea silentio prætereundum est, quod etiam ad beati Didaci sanctitatem spectat, eius corpus, quamquam centum ante annis et amplius in sepulturam traditum erat, tamen quo tempore ad Principem aduectum est, totum, excepta naris particula quadam, incorruptum atque integrum vsquequaque conseruabatur: eamq. ipsam, quam antea, odoris suauitatem iucundissimam retinebat.

Iam demum res illius mirifice diuineq. gestas scribendi finem faciam hoc præclaro miraculo: quod, tabulis publicis obsignatum, vniuersæq. Hispaniæ prædicatione celebratum, Princeps etiam, dum in hac vita fuit, gratissimi animi pietate testatissimum fecit: palamq. et litteris, et nuncijs, et vocibus, tanto Principe vere dignis, professus est, se illius viri Dei precibus ac meritis salutem atque incolumitatem esse consecutum. Reliqua autem, quæ ante, et post hoc maxime illustre miraculum, facta sunt, ad posteritatem annales Ordinis Minorum, et Hispanice, et Italice produnt: præsertim cum non solum populi Hispani vocibus in vulgus dicantur,

H tur,

tur, sed sermonibus, pijsq. officijs celebrentur Principum virorum: qui maximo concursu beati illius viri sacellum pie in omni aetate frequentarunt: quiq. voti compotes facti, donaria, auro, argento cæolata, vestes serico et item auro intextas, aliaq. eius generis opere pretioso ornamenta, ibi quasi impressa ad sempiternam memoriam extare voluerunt, tamquam publica monumenta miraculorum, quæ ipsi iam experti scierunt, et viderunt.

Multa autem miracula tam in vita, quam in morte beatum Didacum edidisse; amplissimus Cardinalis, Episcopus Prænestinus, summa laude dignissimus, Marcus Antonius Columna scribit luculenta grauissimq. in relatione sua, quam ad SIXTVM QVINTVM, Pontificem sapientissimum et religiosissimum, magna Cardinalium frequentia, habuit. Ex ijs pauca quædam se de amplissimorum collegarum assensu selegisse ostendit: ita tamen vt, quæ, Hispaniensibus monumentis obsignata, inde Romam ad Pontificem missa sunt, centum ac triginta esse, eaq. probari affirmet. Oratione item, quam Pompeius Arigonius, Aduocatus Consistorialis, iurifconsultus disertus, et legum vsu egregie peritus publico in consistorio dixit, ex ijs miraculis nonnulla recensuit: quorum vix milesimam partem se attigisse fateatur. Itaque ea longe plura ego complexus, cum illorum auctoritatem, quæ mihi fuit maximo vsui atque adiumento, secutus sum: tum certissima et clarissima habeo testimonia, non solum publicis litteris, publicis votorum tabulis, publicisq. documentis instructa, sed perpetuo firmata consensu omnium pene populorum Hispaniensium. Quare quæ de beati Didaci miraculis ad posteritatem prodidi, ea, vt dixi, luculentissime testificata, cum certo sciam, nihil habere, quod fictum, quod commentitium, quod apocryphum sit, ea spero vtilia, grata, iucunda, ac salutaria fore omnibus, de fide catholica bene sentientibus. Nunc tandem ad beati Didaci Canonizationis acta venio.



DE BEATI DIDACI  
CANONIZATIONIS

A C T I S.

P A R S I I I.



**A**NTI, tamq. singularis ac diuini beneficii magnitudinem Philippus Hispaniarum Rex Catholicus, Caroli pater, grata piaq. memoria prosecutus, iam inde ab eotempore, quo illud beati Didaci meritis a Deo acceperat, summum Pontificem rogare non destitit: vt is, cuius sanctitas vno omnium ore iamdiu celebraretur, et indicijs non obscuris, sed clarissimis miraculis in dies illustrior fieret, rite de more matris ecclesiae in sanctorum numero adscriberetur. Id tum primum a Pio Quarto, deinde a Pio Quinto, qui successit, post a Gregorio Decimotertio, demum a SIXTO QVINTO, Pontificibus Maximis, tum litteris, tum nuncijs etiam atque etiam maximopere supplex petijt, vt rem totam infra mox ordine enarrabo. Est sapientis scriptoris, ad recte scribendi studium diligentissimi, qui praesertim de Regibus, et Principibus aliquid habet, quod commemorabile, nomineq. dignissimum, litteris mandet: accuratissime perpendere non modo illud totum vniuerse, sed speciatim singula eius momenta. Ita enim fiet, vt, quarum virtutum exempla ad alios, ac potissimum ad posteros imitatione dimanare vtiliter possunt, earum nihil quidquam non modo tacitum relinquat, sed luculenta admodum oratione celebret. Nunc igitur locus postulare, vel potius efflagitare videtur, vt de praestantissima Philippi Regis vere Catholici pietate dicatur: quae quoniam cum perpetua rei propositae

narratione maxime consentiens est, cum breui strictimq. tantum attingam; ut cetera deinceps, quæ inter se consentanea sunt, quæq. ad huius meæ narrationis rationem atque usum pertinent, ordine persequar. Dei dono beneficioq. singulari Philippus I. Regnorum magnitudine et multitudine Rex maximus, opum abundantia amplissimus, copijs potentissimus, prouinciarum et ciuitatum nobilium clientelis florentissimus, nullis fere belli offensionibus, sed victorijs clarissimus, et ab omni denique laude domi militiæq. felicissimus, ea vna gloria longe antecellit, quod perpetuo cunctis in rebus tum secundis, tum aduersis, atque in tota regia administratione, quæ longe ac late patet, ad infinita negotia pertinet, operam præstat pietati catholicæ et religioni. Si belli motus inerèpat, ad id fortiter suscipiendum comparat omnia: nullum tamen officium prætermittit pie agendi. Si rerum, quæ maxima; ac difficillima; afferunt in summa regia potestate anticipem deliberandi curam, occupationes vndique circumfluunt, prospicit et consulit rationibus earum omnium: at non deserit studium illud, neque negligit, quo exardescit ad sanctissimæ religionis cultum, atque ad bonorum operum pietatem. Summis belli pacisq. curis implicitus, templamaxima extruxit, ædes cathedrales erexit, Legatos ad sanctorum martyrum monumenta perquirenda misit, eorum sacras reliquias transferendas, resq. ab illis itidem gestas ornatæ ac splendide scribendas, impensè curauit, collegia litteraria noua instituit, vetera restaurauit, bibliothecas mira librorum, quos vndique conquisiuit, copia instruxit. Lectissimorum virorum, pietate virtuteq. præstantium, colonias ad vltimos vsque orbis terrarum fines deduxit. Sed cetera omnia, quæ longe plura sunt, quæq. vberrimos commentarios, vel potius magnarum vigiliarum opus desiderant, missa iam facio, ne longius digrediar: cum in primis hæc ipsa de beato Didaco in sanctis adscribendo cura perpetua, quam neque in tanta temporum varietate, neque in maximis bellorum incendijs vnumquam Rex deposuit, satis per se ipsa est ad id, quod proposui. Non motus Batici Regni, non tumultus Belgici, non arma Turcica, non belli contentio de Regno Lusitanix, non alia denique summa et incredibilia negotia, quæ

quæ vel ad iuris administrationem, vel ad belligerandi rationem, vel ad vniuersam tot regnorum gubernationem spectarent, potuerunt tam longo temporis intervallo religiosum animum Regium, pietatis ardore incitatum, retardare, aut impedire; quominus rem, de beati Didaci Canonizatione susceptam, recte conficeretur. Immo in multis varijsq. occupationibus, in quibus ingentior sollicitudo esse solet, non modo non intermisit, sed vsque adeo rei conficiendæ studium incendit, vt nullo vmquam tempore conquieuerit, nisi ea perfecta. Negotium Pio Quarto Pontifice Rex suscepit: Pio Quinto, et Gregorio Decimotertio, ad ecclesiæ gubernacula sedentibus, diu sustinuit: demum SIXTO QUINTO Pontifice, ad quem illud diuino consilio prouidentiaq. reseruatum erat, pie confecit, vt proxime exponam vberius. Valetudinis incommodæ, ex qua Carolus Princeps periculose laborarat, recuperatio admirabilis in Pontificatum incidit Pij Quarti: ad quem binas litteras, vnas Philippus pater, alteras Carolus filius, pridie calendas Martij, anno M D L XIII. scriptas, easq. pietatis plenas dederant. Significabant enim ijs singulare beneficium, quod beati Didaci precibus a Deo Optimo Maximo, proxime acceperant: eamq. ob rem supplices summo petierant, pro Dei ipsius gloria cum, cuius meritis illud sibi concessum erat, in sanctorum numerum referri: cum alijs quoque quamplurimis esset miraculis collustrata, et plane perspecta illius sanctimonia vitæ, quam in terris cælestem egerat, diuinis virtutibus. Religioso igitur desiderio Canonizationis, Rex Catholicus, ardentissime inflammatus, voluit item ea ipsa de re tota ad Aloysium Requesens, oratorem regium suum, litteras vberiores Romam mittere: quibus ad rem conficiendam diligentissime instructus, cum Pontifice coram ageret nomine regio ita sapientissime et studiosissime, vt maxime restanti ponderis geri ab eo potuisset. Postero autem anno, qui annus fuit millesimus, quingentesimus, et sexagesimus quartus, vt negotium, quod tantopere, incensoq. pietatis studio ad exitum perducere, vterque pater, et filius concupierat, demum recte ac rite conficeretur, speciatim Aloylio oratori mandatum per litteras dederat, eodem anno scriptas VIII.

Idus Februarij . Vbi mandatum Regium , recte obsignatum , Orator accepit : in Consistorium proximum ad Pontificem venit , a quo summa prece id postularat , vt fidei , vitæ , sanctitatis , virtutum et miraculorum beati Didaci causam , quam summatim cognoscerent , quibus mallet , Antistitibus Hispaniensibus delegaret . Beatus autem Didacus vt in sanctorum numero ascriberetur , crebris id litteris efflagitatum est : quæ diuersis temporibus cum ab alijs , tum ab ecclesiâ Toletana , a magistratibus Complutensibus , Complutensiq. vniuersitate , et ab omni ferme Hispanja scriptæ sunt quàm diligentissime . Sed vbi , lecto mandato Regio , Pontifex Pius Quartus , iustæ petitionis causas ab Oratore cognouit , rem non differendam censuit .

*De causa delegatione facta , a Pio Quarto Pont.*

*Cap.*

*I I.*

**I**Taque Calendis Maij anno M D L X I V . amplissimis Cardinalibus , Ioanni Morono , Episcopo Prænestino ; Ioanni Michaeli Saracenio , tit. S. Anastasiæ , Michaeli Alexandrino tit. S. Sabinæ , Clementi tit. S. Mariæ in Aracali , Presbyteris , et Vitellotio Vitellio Diacono S. Mariæ in Porticu , id negotium tanti ponderis delegauit : eamq. facultatem præterea adiunxit , vt ex delegationis illius Apostolicæ auctoritate alios , quoad opus esset , ad causæ cognitionem subdelegare possent . Cuius rei nomine litteræ Pontificiæ instar Breuis confectæ sunt . Ij vero prompta voluntate , animoq. ad obediendum paratissimo , delegatam sibi causam susceperunt : verum maxima locorum distantia , et grauissima negotia , quorum occupationibus impediti , ab vrbe abesse non poterant , fecerunt , vt facultate Apostolica vsi , illam subdelegarint . Tertio igitur Nonas Maij , eodem anno , re mature deliberata , hos tres Episcopos , Seguntinum , Segobiensem , et Conchensem , delegerunt : quibus per litteras , quarum exemplum in actorum canonizationis tabulas publicas relatum est , illam commiserunt , et mandarunt , facta etiam potestate , vt ipsi tres simul , vel saltem duo eam cognoscerent . Allatis ijs subdelegatæ causæ litteris , Episcopi Complutum

venc-

venerunt, vbi centum ante annis beatus Didacus decesserat. Eo loci cum de illius sinceritate fidei, vitæ religiosæ consuetudine, virtutum meritis, miraculis, populiq. in eum pietate, accuratissime riteq. ad præscriptum a probatissimis viris perquisissent, et cognouissent: acta cognitionis, summatim confecta, recte obsignata, Romam miserunt.

*De altera delegatione a Pio Quinto, facta. 111.*

**F**ACTVM est interea, vt Pius Quartus Pontifex diem suum obierit, nec potuerit rem conficere, quam Rege, et Principe Hispaniarum efflagitantibus, aggressus erat. Proxime in Pontificatum ei successit Pius Quintus sanctæ memoriæ: qui causæ huiusce statum publice in consistorio ad se referri voluit. Quo audito illam ijs ipsis Cardinalibus iterum delegauit, tum præterea Ioanni Baptistæ tit. S. Clementis: quem in locum suum subrogauit, vt quod ad acta recte conficienda reliquum esset, ab ijs perficeretur. Itaque ij, procuratore fisci, vt moris est, citato litteras compulsorias et remissorias rite decernunt: quas illis ipsis Episcopis scripserunt, quorum fidei, integritati, et sapientiæ demandata antea causa fuerat. Eam autem ob rem cum Philippus Rex, et Carolus Princeps Ambrosium de Morales, presbyterum Cordubensis diocesis, virum bonum, et hominem doctum, procuratorem constituissent: is illas litteras v. i. i. Idus Februarij anno M D L X VII. Episcopis legitime reddidit. Tum subdelegati iudices, causam ordine iudicij, persecuti, vocato procuratore fisci Sedis Apostolicæ, Petro Martinez, Canonico Seguntino, qui speciatim ad hoc negotium delectus erat, rem totam, certis quæstionibus præscriptam, a tribus et octoginta testibus, spectata fide et integritate viris, accurate inquisierunt: testimoniaq. eorum certa atque explorata, et item scripta, quæcumque ad rei, de qua quærebatur, testificationem opus esse videbantur, diligenter conquisita, quæ inueniri potuerant, recte obsignata, et cetera rite confecta, Romam miserunt: vbi pridie idus Augusti, anno M D L X VII. reddita sunt omnia, ea. more iudiciali recognita et interpretata. Omnibus igitur quæstionum actibus absolutis, reliquus

quus erat actus canonizationis, ad quem integrè sancteq. conficiendum etsi desiderio incredibili Pius Quintus beatæ memoriæ Pontifex exarserat, tamen incidit deinceps in tempora reipub. Christianæ turbulentissima, difficillimaq. negotia: quibus toto Pontificatu dissentissimus ad exitum rem perducere non potuit, quam totis in Christo visceribus ardentissime concupierat. De repente enim Galliæ tumultus extiterunt, quodam hæreticorum furore, quasi repentino incendio excitati: tum subito inflammatum est etiam bellum formidolosum Turcarum: aliaq. simul mala, magnopere pertimescenda, populi Christiani ceruicibus vndique imminebant, quibus præcauendis ac propulsandis occupatissimus optimus Pontifex, vix, vel potius ne vix quidem aliquando respirare potuit. Plurimis demum laboribus pro ecclesia Dei Pius Quintus perfunctus, ex hac vita cessit: cui in Pontificatum Gregorius Decimustertius subrogatus est. Et quamquam aliquot ante annis Carolus, Hispaniarum Princeps, obierat: nihilominus tamen eius obitu tantum abest, vt Philippi patris desiderium in re conficienda refrikerit, vt ardentiori voluntate incitatus, eandem inflammatori studio procurasse videatur. Sed tam accenso per se Regis animo, multisq. rationibus ad rei optimæ procuracionem inflammato, cur Gregorio Pontifice nihil confectum sit, non video, nisi factum hoc esse a Domino, vt canonizationis huius actus ad SIXTI QVINTI Pontificis tempora reseruaretur.

*Diuina consilio ad SIXTI QVINTI Pontificis tempora actus canonizationis reseruatus est. IV.*

**N**IHIL immensa sua sapientia Deus efficit sine summo consilio, æquitate, ratione. Cum igitur aliquid a Deo fieri perspicimus, causa indaganda est, si possumus: si non possumus, nihil tamen ab eo sine causa agi, nobiscum ipsi constituere debemus. Iam tanto temporis intervallo, tam ardenti studio, incredibiliq. regia pietate procuratum est, ac maximopere efflagitatum, vt beatus Didacus, sanctitatis et miraculorum laude clarus, nomine, imitatione, et memoria sempiterna dignissimus, in sanctorum numerum referretur: id num-



id numquam factum est tamen, sed diuinitus **SIXTO QUINTO** reſeruatū eſſe videtur. Diuini huius conſilij cauſas omnes fateor me nſcire: hoc vnum autem ſcio, a Deo non ſine ratione factum eſſe, vt canonizationis actum his præſertim temporibus Pontifex religioſiſſimus, et eccleſiæ non ſolum ædificandæ atque comuniendæ, ſed propagandæ cupiditate diuina flagrans, **SIXTVS QVINTVS** demum celebrarit, non ſine ſumma, vereq. Pontificia, ac perpetuo commemoranda pietate: quam lacrymis etiam profuſis expreſſit, vt, cum locus erit, ordine perſcribam. Verum etſi in rebus diuinis temere perſcrutandis curioſus neque ſum, neque eſſe volo, quoniam video me certis finibus circumſcriptum, quos tranſilire minime licet: nihilominus non tam excors eſſe debeo, vt extimeſcam, ſi quas videre poſſum, explanare cauſas eius rei, in qua tantus diuinæ prouidentię, diuiniq. ac ſingularis beneficii ſplendor vndique eluceſcit. Omnibus enim fere temporibus Deus Optimus Maximus Hiſpaniam reſpexit: quam ſi ſæpenumero florentem intuemur; aliquando rurfus plurimis laboribus afflictam, et immanium nationum barbarie percuſſam, et prope depoſitam cernimus: Id omne factum eſt diuino conſilio. Quo primum tempore Euangelium diſſeminari cœpit, tum a Iacobo, et Paulo Apoſtolis religionis Chriſtianæ illa ſata ſemine, poſt a ſanctiſſimis illis viris ſeptem, quos beatus Petrus, Apoſtolorum Princeps, de fide paceq. Legatos, ab vrbe Roma miſerat, exulta etiam diligenter, radices in agro Domini alte agere cœpit: vt, quod diuino conſilio effectum eſt, deinceps Pontificum Romanorum, Anteri, Lucij, Melciadis, et aliorum, qui per litteras et doctrinæ, et diſciplinæ Chriſtianæ præcepta diſſeminarunt, cultura propagaretur egregie. Sed nefarium ſuperſtitionis ſemen Marcus quidam Ægyptius intulit, itidem Vigilantius hæreticus fecit, gensq. præterea Gothorum, omni barbarie immanis, et hæreſis Arianæ crimine contaminatiſſima, vaſtatem inuexit. Neque id in tanta illorum temporum calamitate ſine cauſa factum eſt, vt Hiſpanorum hominum ſcilicet et pietas exploratior eſſet, et virtus illuſtrior, et ſynodorum celebratibus prouincia non modo clariſſima fieret, ſed inſtructiſſima tum ad retinendam religionem ca-

tholicam, tum ad propulsandas hæreses. Non defuerunt enim illis formidolosus temporibus. Reges, et Antistites, qui sanctæ sedis Romanæ auctoritate concilia quàmplurima coëgerunt: quibus actum est diuinitus, vt, si qua per hostium vim et iniuriam suscepta est, macula deleteretur. . Eam aliquando labefactatam, et pene collapsam nouorum hominum colluue videmus: breui tamen eandem instaurauit Deus salutaribus epistolis, omni præsidio cumulatis, quas sanctæ memoriæ Pontifices, Siricius, Hormisdas, et Gregorius, illuc necessario eius tempore miserant. . Arabum subita tempestate pene illam euersam restituit Deus, qui Pelagium Regem dedit, summa virtute præstantem, qui hostem ex turbauit, profligauit, deleuit. . Ac præterea voluit Deus Hispaniam difficillimo quoque tempore tam barbarorum hostium impressionibus sæpius afflictam, magnas perferre calamitates, vt diuturno laborum vsu exercitata, et sacrosanctæ sedis Apostolicæ auxilio, quod in tanta temporum varietate experiundo cognouit, communita, demum floreret, non opibus solum, sed laude cum omnium virtutum, tum gloria religionis catholicæ. Sed hæc vniuerse, illud iam speciatim dicendum est, quod rem propositam maxime attingit, in singula tempora, quibus Pontifex aliquis nomine SIXTVS ecclesiæ gubernacula tenuit, Hispaniam accepisse, quod magni beneficii loco putandum est. Neque ab vltimis illis Sixti Primi, et Secundi ætatibus id altius repetam, cum longum nimis esset: sed ad sæcula, quæ recentiora multo sunt, venio. Nam Sixto Tertio Pontifice, Attilæ, Gothorum Regis, omnia diuina et humana permiscentis, audaciam Turismundus Hispaniæ Rex fregit, copiasq. eius deleuit. Catholici nomen, quod augustissimum est, quodq. fidei et pietatis regis insigne, olim in synodis Toletanis institutum, Apostolica auctoritate renouatum, Sixtus Quartus Pontifex Ferdinando et Elizabethæ Regibus ob præclara rerum pie gestarum merita tribuit. Et vero, quod diuinum atque immortale munus extitit, sanctæ Inquisitionis officium salutaribus consilijs in ea instituit ad orthodoxam fidem tuendam, hæresumq. tempestates depellendas: quarum fluctibus multæ deinceps aliæ prouinciæ, olim religionis catholicæ studio nobilitatæ, naufragium

fragium fecerunt et opum, et veræ Christianæ pietatis, cuius sanctissimo nomine gloriabantur. Est igitur diuino consilio factum, vt canonizationis huius actum optimus religiosissimusq. Pontifex SIXTVS QVINTVS rite conficeret, cui non sine ratione causaq. ille reseruatus videtur, cum ob alia multa, tum etiam, vt Hispaniam aliquo singulari beneficio condecoraret: quod itidem diuina prouidentia alios singulos, qui præcesserant, Sixti nomine Pontifices fecisse demonstraui. Hoc a Deo factum est, vt ordinis Franciscani beatum Bonauenturam, sanctitatis nomine illustrem, Sixtus Quartus, eiusdem ordinis in sanctorum numerum referret: itidem de beato Didaco, illius ipsius ordinis obseruantissimo viro, et sanctimonix laude claro a SIXTO QVINTO, qui seraphica etiam religionis est, statui ac fieri voluit. Ille Federico Tertio Austrio, Imperatore efflagitante, hic Philippo eiusdem augustissimæ familiæ Principe, et Rege Maximo petente summopere, in sanctis ascriptus est. Hæc, atque adeo longe plura si quis recta reputabit via, facile intelliget, quod proposui. Verum SIXTI QVINTI sapientia, pietas, consilium, æquitas, et rationes spectandæ iam sunt, quibus canonizationis huiusce actum confecit.

*De pietate, æquitate, consilio, et rationibus, quibus SIXTVS QVINTVS canonizationis actum celebravit. V.*

**D** I V I N O igitur consilio motus SIXTVS QVINTVS, rem tamdiu expetitam concedendam statuit. Enixe enim eam, vt narraui, Philippus Rex tamdiu petebat: et item Toletana ecclesia, Magistratus Complutenses, Collegia piorum hominum, denique Hispani omnes, Regis optimi exemplum secuti, maximopere obsecrabant. Rem eandem, quæ postulabatur, Pontifex sapientissime vidit: utq. est actionum æstimator acerrimus, iustam illam quidem, piam, ac sanctam perpendit. Plurimi igitur ponderiserant, et Regis in primis postulantis ratio, et rei tam sanctæ petitio, plena iustitiæ, et æquitatis. Nam id æquissimum erat, vt quem vita omnis sanctum significauit, et quem tanta miraculorum vis in cælis sanctorum consuetudine frui declarauit, eum in

illorum numero Apostolica auctoritate ascriptum, in terris ecclesia debito honore coleret. Sed hic non possum tacitam præterire sapientiam Pontificis, qui tam multa simul prospexit, cum canonizationis actum suscepit. Seruiendum enim erat gloriæ Dei, quæ in ea actione maxime splendescit: seruiendum præterea consolationi ecclesiæ, quam, tamdiu turbulentis hæresum tempestatibus agitatum, tantisq. malis varie perculsam prospiciebat, et omnia denique doloris plena, videbat, cum vulnera, reipub. Christianæ undique inflata, cerneret. Eo vno facto, quam animo conceperat, miram omnibus alacritatem addidit. Mærore debilitatas prouincias, et ciuitates, quasi in mæstitia iacentes, recreauit: hominum religiosorum collegia, tamquam diuturno languore obtorpescentia, ad pietatis Christianæ exercendæ usum, studiumq. alacrius excitauit: ordinis autem seraphici conuentus, pene diu feriatos, ad præclaras illas et præstabiles beati Didaci virtutes hilariter animauit: bonorumq. omnium animos, prope fractos, atque afflictos erexit: et malorum, præsertim hæreticorum, temere ac perditè gestientium furorem, rabie quadam exultantem repressit. Ad hos vberrimos pietatis fructus, qua est summa charitate, diuinaq. sapientia, Pontifex cum solemne canonizationis officium referri iam inde ab initio viderit, magno exarsit desiderio rei conficiendæ. Non defuerant tamen, qui rem differri suadere conabantur, nescio quibus rationibus, quæ inanes sunt, ne dicam, aniles et supersticiosæ. Non enim verum est, neque cum pietatis officio consentaneum, quod vulgo dicunt, Pontificem breui moriturum, vbi aliquem in sanctorum numero ascripserit. Imo contra perspicue manifestum fit exemplis plurimorum Pontificum. Alexander Tertius Pontifex in sanctorum confessorum ordinem anno millesimo centesimo sexagesimo quinto Bernardum Claraualensem retulit: postea tamen vixit annis quindecim, cum alios etiam quattuor, et in ijs præsertim Thomam Cantuariensem anno millesimo centesimo septuagesimo quarto in beatorum martyrum numero ascripserit. Idem affirmari licet de Gregorio Nono Pontifice: qui annis postea tredecim obiit, quàm beatum Dominicum, ordinis Prædicatorum auctorem, et parentem,

tem, in sanctis annumerarat; cum seraphicum Franciscum etiam, et item alios quattuor deinceps in eorundem numerum posuerit. Res ex Pontificijs annalibus in promptu est, ac præterea rationes multæ sunt, quæ liquido constant: ideo iam nihil attinet, cur pluribus demonstretur. **SIXTVS** igitur **QVINTVS**, qui pietate, religione, sanctissimisq. pastoralis suæ sollicitudinis rationibus omnia metitur, religiosi animi sui ardore inflammatus, cum cetera, quæ mox narraui, sibi ad animum in re efficienda proposuerat; tum illud etiam potissimum, ut et Hispaniam tanti muneris lætitia exhilararet, et in primis Philippum Regem Maximum, de ecclesia Dei optime meritum, tam immenso studio canonizationis actum, tamq. diu pie efflagitantem. Profitebatur Rex, summis in negotijs, difficillimisq. conatibus, se, beato Didaco cælesti patrono et deprecatore, a Deo maxima adiumenta, beneficiaq. plurima esse consecutum. Instabat bellum Anglicum, et illud quidem difficile ac periculosum, quod contra perditissimam et profligatissimam feminam, omni imbutam scelere, omniq. hæresis labe inquinatissimam, Elizabetham, dominatu tyrannico illud Angliæ regnum diu nimis opprimentem, ac nefaria quæque contra ecclesiam catholicam bonosq. omnes molientem, Rex pietate ductus, et iustissimis causis motus, sibi gerendum statuerat. Belli instrumenta innumera cum Rex parasset, classem ingentem ornasset, atque instruxisset, et classicorum militum copias magnas coegisset: tum Pontifex **SIXTVS QVINTVS** ad iustissimum bellum, quod iam affectum, diuina in primis ope recte confici breui posse sperabat, opus etiam esse vidit cælestibus potissimum defensoribus: quos beatus Ambrosius Mediolanensis, cum ab impia Iustina vexabatur, se in tanta perturbatione ambire dixit. Oportuno igitur tempore, ut est egregia, diuinaq. sapientia, Pontifex in sanctorum numero beatus Didacum constituendum censuit, in cuius meritis Rex tantopere confidit. Et quoniam canonizationis actus plenus est mysteriorum, ac rituum, eamq. ob rem maxime solemnis, et proprie Pontificius: quàm rite, et recte, atque ex instituto moreq. sanctissimo cum Pontifex celebrarit, id planum fiet commemoratione rerum, quæ mox ordine explicabun-

cabuntur. Verum aliquid me summatim oportet præfari de canonizationis antiquitate et celebritate: cum qua omnis reliqua deinceps narratio apte cohærebit.

*De canonizationis instituto, usu, et rationibus. VI.*

**I**AM inde ab initio nascentis ecclesiæ, institutum canonizationis esse cœpit, ut a falsis veri martyres internoscerentur. Tum enim primum sanctus Clemens Pontifex et martyr, Notarios septem creavit, quos in eam curam incumbere iussit, ut res gestas martyrum litteris mandarent. Viros autem esse voluit, qui et spectata fide, et probitate, et doctrina antecellerent: quique omnem in munere commissio diligentiam adhiberent. Anterus præterea Pontifex deinceps hoc statuit, ut eorum acta non modo conscriberent, sed etiam conquirerent quam diligentissime. Et vero Fabianus Notariis illis septem adiunxit Diaconos totidem: quorum etiam testimonijs niteretur rei gestæ veritas. Eadem plane omnia decrevit Urbanus Primus, atque reliqui, qui proxime successerant, Pontifices. Quam ob rem ij Notarij ad summum Pontificem referebant de singulis, qui ex actorum veritate ponendi essent in martyrum numerum. Commemorabant autem res gestas, cruciatus, fortitudinem, constantiam, dimicationes, vere pro fide susceptas, et necem, quam pro Christi Domini gloria obierint. Hæc igitur tria, nimirum gravitas virorum, quibus de martyrum factis scribendum erat, investigatio diligens, et testimonium Diaconorum septem, considerabant, ut veri tantum martyres, reiectis ceteris, qui pseudomartyres erant, in martyrologij tabulis ascriberentur. Principio enim orientis religionis Christianæ non defuerant homines hæretici, nec vero schismatici, qui cum tormentis ac mortem Christi nomine subire viderentur, eos tamen a fide orthodoxa, et communione catholica alienos, non recepit ecclesia Dei: quoniam ex Patrum sententia quidquid aliquis, qui extra ecclesiam est, patitur, non martyrium, sed perfidiæ poena censetur. Erant verò aliæ etiam causæ, atque rationes, quare necessaria erat omnis vel diligentissima indagatio, ut re vera quis in martyrum numerum poni rite posset. Nam in Africa ex Diocletiani edicto, qui sacros codices

trade-



trādere noluerunt, cum eam ob causam martyrium subierint; eos martyrum cultu atque honore dignos censuit Mensurius, *in Brenie. coll. 3. di. ei. 4.* Episcopus Carthaginiensis, vt rem totam sanctus Augustinus enucleate perscribit. Alios autem facinorosos filicq. debitorum, qui, illius vexationis occasionem nacti, quoniam vitæ acerbissima priuari mallerent, propterea quod grandi ære alieno obstricti essent, vltro sponteq. sese persecutoribus offerebant, sacraq. volumina, quæ tradere recusabant, se habere mentiebantur, in martyrum numero censeri, idem Mensurius vetuit. Eamq. ob rem Optatus Mileuitanus Lucillæ factiosæ *Opr. li. r. cont. Par.* feminæ narratione demonstrat nefas esse venerari reliquias alicuius martyris, non vindicati, nimirum non probati et recepti. Itaque pernecessaria fuit de martyribus etiam, eorumq. fide et charitate perquisitio. Ab ijs autem initijs profectus sanctorum canonizationis vsus, in dies progressionibus suis auctus, magnam requirit solemnitatem, omni vel diligentissimo indagandi studio exquisitam. Elapsis enim beatissimorum martyrum temporibus fuerunt multæ canonizationis causæ. Neque in præsentī necesse habeo commemorare omnia sæcula sanctorum, quos sine dubio gloriæ Domini participes effectos, catholica veneratur ecclesia. Sed cum aliquando hominum fraudibus, vt mox narraui, dolisq. occurrendum fuerit: tum etiam superstitioni prospiciendum erat imperitæ multitudinis, quæ facile interdum falli decipiq. potest assimulata quadam specie sanctitatis. Hermanus quidam, iam annorum viginti spatio sanctus vulgi opinione putabatur, venerationeq. propterea colebatur. Sed habita de eo inquisitione diligentissima, Bonifacius Octauus Pontifex exhumari iussit, cum, quem sanctum vulgo opinabantur, eum hæreticum comperisset. Accessit etiam alia causa, quæ maximi momenti est. Obuiam enim eundem sæpenumero fuit quarundam familiarum ambitioni, humanoq. affectui: quo factum est nonnumquam, vt hic parentis, ille filij, alius fratris, alius amici, ex hac vitâ pie decedentis, tamquam sancti, patrociniū publice imploraret. Quæ res tum ambitioſitatem, tum confusionem ac perturbationem sæpius peperit: cum idem a quibusdam, vt sanctus, coleretur, ab alijs irrideretur. Hanc igitur priuatam, et ambitiosam licentiam, quam

quàm sibi homines arrogarant, diuine sapientissimeq. cōer-  
 cuit sancta ecclesia Dei. Ac præterea, vt et sanctis honorum  
 accessio fieret, et fidelibus certa, explorataq. veritas de co-  
 rum gloria afferretur: mos ritusq. solemniss, Spiritu sancto au-  
 ctore ab ea introductus est canonizandi sanctos statim cærimo-  
 nijs, quæ in præsentī inuiolatæ obseruantur ad præscriptum  
 librorum ritualium. Neque enim tanti ponderis negotium,  
 quanti est sancti canonizatio, cuiquam vel Patriarchæ, vel Pri-  
 mati, vel Metropolitano, Episcopove, sed soli Pōtifici Romano  
 commissum est: qui summam diuinamq. ecclesiæ regendæ et  
 gubernandæ potestatem habet. Quo in munere is, vt Pontifex,  
 Vicariusq. Christi, neque fallere, neque falli potest, quia  
 non prudentiæ suæ innititur, sed regitur prouidentia Dei: qui  
 ecclesiam spiritus sui lumine illustrat, ac dirigit, vt non er-  
 ret, sicut promisit ijs verbis: Spiritus Paraclitus, quem mit-  
 tet pater in nomine meo, docebit vos omnem veritatem. Cu-  
 ius singularis prouidentie argumento certissimo satis illud  
 est, quod numquam labefactata, neque infirmata est fides,  
 ab hominum testimonijs, semel in ijs canonizationis iudicijs  
 suscepta, vt disertissimi viri rem totam non probabiliter so-  
 lum, sed necessario demonstrant. Præterea canonizationis  
 munus, quoniam maturæ deliberationis est, non ilico per-  
 agitur, sed mora interposita, vsque adeo vt in annos pluri-  
 mos diutius differatur. Nam quo maius negotium est, eo ma-  
 turius deliberari debet. Christus Dominus cum Lazarum  
 ad vitam reuocauit, non confestim id fecit, sed multas prius  
 cærimōnias adhibuit. Pontifex igitur in canonizatione  
 quàm sapientissime agit: qui, etiam atque etiam sæpe a Re-  
 gibus, Principibus, alijsq. primarijs viris, aut a ciuitatibus,  
 nationibusq. omni summa prece rogatus, quo splendidius  
 veritas elucescat, eam aduocem in longius tempus ducit.  
 Id quod Eugenius Quartus fecit, cum de Bernardini Senensis  
 solemnī adscriptione ageretur: itidemq. Innocentius Quar-  
 tus de Stanislao martyre. Hic annis post eius martyrium  
 centum et septuaginta, ille longe diu post obitum in sancto-  
 rum numero est ascriptus: cum a ceteris etiam, qui præcesse-  
 rant, Pontificibus res antea prolata sit. Ac præterea illius,  
 qui verbo et opere Christum Dominum confessus, rerum di-  
 uine

cap. 1.  
de Rel.  
et ven.  
sanct.

Ioan. 14.

Ioan. 11.

uine gestarum laude clarus, in sanctis dignus est qui annumeretur, vitæ innocentia, morum sanctimonia, virtutes, miracula inuestigantur diligenter. Idq. inuestigationis officium, non omnibus committitur, sed religiosissimis ecclesiæ Antistitibus, viris sapientissimis, rerumq. gerendarum usu peritissimis. Et quo exploratius sit id, quod quæritur: aliquando factum est, ut quæstionum, quæ ad canonizandi rationem, usumq. attinent, acta fidei et diligentia eorum potissimum Cardinalium concredita commissaq. sint, qui illius sancti, de quo ageretur, canonizationi maximopere refragarentur. Iam vero Innocentius Quartus de sancti Stanislai vita inquirendi curam delegauit Rinaldo, Cardinali Ostiensi, illius canonizationem valde admodum impediendi: qui deinceps, re tota perspecta, suffragatus est mirifice. His solemnibus institutis et alijs, quæ ordine infra perspicua erunt, de beato Didaco, in sanctorum numerum referendo SIXTVS QVINTVS Pontifex egit, ut omnia solet, tum religiose, tum sapienter.

*De actis huius causæ, in vrbe recognitis, et comprobatis. VII.*

CANONIZATIONIS autem huius causa, quemadmodum ante narraui, cum in eo statu versaretur, ut illius acta, quæ iudices delegati in Hispania confecerant, recte ob signata, inde Romam perlata essent: Philippus Rex, qui tamdiu non assecutus erat, quod summopere expetierat, per ora torem suum Regium, Henricum Gusmanium, Comitem de Oliuares, virum genere illustrem, et virtutum laude clarum cum sanctissimo D. N. SIXTO QVINTO Pontifice precibus agi voluit, ut res, diutissime dilata, tandem rite conficeretur. Id supplex orator regio nomine, maximopere petijt, quod pro pietatis, æquitatisq. ratione Pontifex, qua est summa benignitate, libenti gaudentiq. animo concessit. Itaque ut recte atque ordine res tanti ponderis, ac momenti gereretur: optimum factu putauit, eam sapientibus, usuq. peritis hominibus speciatim delegare. Eamq. ob rem e Rotæ Auditoribus duos delegit, Roscium Decanum, et Robusterium, ambos iuris scientia cruditissimos viros, iudi-

cesq. integerrimos . Iis præcipuo , vt moris est , rescripto Pontificio , cui manu sua Pontifex subscripserat , quarto Calendas Iulij , anno M D X X C V . dato , negotium mandauit : vt huius causæ acta , ab Hispania Romam allata , viderent , cognoscerent , atque expenderent in primis , an quæstiones rite habitæ essent , an item legitima testimonia , idoneaq. ad probationes , decernerentq. item inter se de ijs omnibus , tum referrent . Qui vbi aliquot post mensibus magna cum diligentia , quam adhibuerunt , omnia perspexerunt , et considerarunt , maturaq. deliberatione inter se statuerunt , ad Pontificem singula retulerunt , certis capitibus distincta , vt mox infra exponam .

I. Causæ acta esse legitime tum recognita , tum interpretata .

II. Testes ex litteris remissorij , recte riteq. interrogatos : et quæstiones de ijs legitime habitas esse .

III. Eos testes nulla exceptione summoueri , sed maxime idoneos ad faciendam fidem .

IV. Testes præterea , litterarum remissoriarum auctoritate adhibitos , fuisse legitime atque ex præscripta ratione , recte interrogatos : et præterea quæstionum aliarumq. scripturarum monumenta , recte exscripta esse , fidemq. et probationem asserre .

V. Librum , de miraculis inscriptum , quo scilicet beati Didaci miracula centum et triginta explicantur , ex archiuio Complutensis conuentus S. Mariæ Iesu desumptum , probationum vim præbere , et recognitum , vt per exemplaris vetustatem fieri potuit , fidem facere : et reliqua item duo , et quinque foliorum fragmenta , e pago sancti Nicolai , patria beati Didaci , perlata .

VI. Constare item , beatum Didacum , in eo pago natum , ordinis sancti Francisci laicum professum , ex hoc sæculo migrasse anno M C C C C L X I I I . vitam egisse piam , religiosam , sanctam : illum morum sanctimonia , castitate , humilitate , charitate , eleemosynarum largitione , commiseratione , et egregia , mirandaq. erga pauperes Christi liberalitate , aliarumq. virtutum splendore diuinitus illis sæculis præluxisse : multa pro gloria Dei perpassum esse , eamq. ob rem et in vita , et post obitum , omnium , qui illum

illum norant, opinione sanctum putari, piaq. veneratione coli: eius corpus in ecclesia sanctæ Mariæ Iesu loco recondi, quod facellum appellant beati Didaci nomine.

VII. Constare item illum, multa ætate prouectum, diem suum obiisse pridie Idus Decembris, anno a Christo nato MCDLXIII.

VIII. Omnium sermone, et prædicatione illum, dum in hoc sæculo fuit, sanctitatis nomine celebrari.

IX. Idem testatissimum fieri libro miraculorum, idq. testimonijs quàm plurimorum, qui illum de facie norant, eiusq. fere assidua vñ sunt consuetudine.

X. Testificari multa miracula, et beneficia diuinitus hominibus diuersi generis et loci facta meritis et precibus beati Didaci.

XI. Præcipua etiam, atque singularia miracula testata, et probata esse, præsertim, quod narratum est de serenissimo Carolo, Hispaniarum Principe, et item de Maria Pinilla, paralytica.

XII. Alia multa nota, et testata esse ex libro miraculorum, quem mox commemorauimus.

Hæc Auditores Rotæ iudices delegati ad Pontificem ordine retulerunt: tum quæcumque præterea ad canonizationis actum pertinerent, recte ac legitime instructa parataq. esse omnia exposuerunt.

*De Cardinalibus, delegatis etiam iudicibus recognitionis actuum huius causæ.* V I I I.

IS omnibus auditis, SIXTVS Pontifex, quo maturius cuncta peragerentur, in consistorio, quod decimo Calendas Februarij anno MDXXCVII. habuit, amplissimis octo Cardinalibus, Alexandro Farnesio, Collegij Decano, Episcopo Ostiensi, Marco Antonio Columnæ, Episcopo Prænestino, Michaeli Bonello Alexandrino tit. S. Mariæ supra Mineruam, Iulio Antonio Santorio tit. S. Bartholomæi in Insula, Antonio Carafæ tit. SS. Ioannis et Pauli, Constantio Sarano tit. S. Petri in monte aureo, Presbyteris, et Ferdinando Mediceo, Diacono S. Mariæ in via lata, Hieronymoq. Mar-

theio, Diacono item sancti Adriani, id præcipue mandauit, et delegauit, vt quæ ab Auditoribus relata essent, omnia singulaq. accuratissime cognoscerent: itidemq. perspicerent, et considerarent, quàm diligentissime possent, quæcumque in negotij huius grauissimi rationibus considerari oporteret. Tum ij causam delegatam statim aggressi, vt viri sunt summa sapientia, iudicioq. præstantissimo, in ea quemadmodum ceteris in rebus solent, et religiose, et pie, et æquissime se gesserunt præclara cum laude. Farnesius igitur Decanus, tertio Nonas Februarij, congregationem delectorum Cardinalium habuit, in qua primum de re delegata agi coeptum est. Rotæ Auditores, Roscius, et Robusterius, præsto fuerunt ad causam: de qua retulerunt, se illius acta vidisse, recognouisse, et perpendisse omnia diligenter, prout summam, de more canonizationis, certis capitibus comprehensa, singula contineri dixerunt. Hæc breui cum coram exposuissent, actorum exemplaria Cardinalibus tradiderunt, et summam itidem capitum, quam ipsi confecerant. Postea vero quàm illi abierunt, in eam deliberationem, matura consultatione agitatam, Cardinales venerunt, vt et omnia illa acta denuo recognoscerentur ordine, quo Rotæ Auditores vsi erant, et singula præterea positiones, quas, inde desumpta, illi attulerant, studiose cum actis collatæ, examinarentur. Quare actorum et summariorum exempla confici, singulisq. Cardinalibus tradi: eorum autem exemplar a Notario recte asseruari iussum est.

*De Congregationibus eo nomine habitis.*

*I X.*

**D**EINDE statas alias congregationes delegati iudices, Cardinales habuerunt: quibus de tota causa ordine actum est. Fuerunt autem eæ omnes numero tredecim, in quibus præsertim iurisperiti, grauitate et doctrina præcellentes, cum vsu venit, præsto fuerunt ad consilium. Primum acta cause, in Hispanijs confecta, quæ Auditores Rotæ, certa, ad fidemq. faciendam idonea decreuerant, aliaq. ea diligenter recognita, et alia quæcumque id generis, ad canonizationis actum pertinentia, Cardinales cum rata, firma diu-  
turnis



turnis consultationibus habuissent, omnia maturissime comprobantur. Postea singulas positiones illas, summatim exscriptas, et collectas, quas Auditores attulerant, etiam atque etiam cum aduocatis consultatas, ex omni parte recte contrare decreuerunt. Tum varia miracula, de quibus diu consultatum ac deliberatum est, cognita atque explorata usque adeo habuerunt, ut nihil deesse statuerint ad rem perficiendam. Quare vltima congregatione decretum in sententiam confecerunt, sequenti capite explicatam.

*De vltima congregatione et decreto comprobationis  
actorum. X.*

**D**EMVM rebus omnibus agitis, cum nihil dubij reliquum esse videretur, in congregatione, quæ ob eam causam vltima apud Farnesium decimo Calendas Iulij anno millesimo, quingentesimo, octuagesimo octauo habita est, Cardinales censuerunt, nihil omnino ob stare, quominus sanctissimus D. N. SIXTUS QUINTUS ultra progredetur ad canonizationis actum. Itaque magna consensione, intimaq. animi lætitia de re tota deliberarunt in hanc sententiam. Diligenter perspectis attestationibus, probationibus et actis omnibus, de beati Didaci canonizatione confectis, accurateq. cognita scripturarum fide, et consideratis Auditorum Rotæ positionibus, cognita etiam illa constanti deuotione, ac veneratione, quam beato patri Didaco centum et viginti abhinc annis omnes Hispaniæ populi votis, vigilijs, donarijs, omnibusq. pietatis officijs perpetuo tribuunt: Nos illius fidei puritatem et integritatem, vitæ sanctitatem, egregias virtutes, præclara miracula optime probata comperimus. Quocirca vno animi assensu decernimus ob clarissima eius merita Sanctissimum D. N. si eius sanctitati placuerit, cuius correctioni et iudicio omnia subiicimus, posse ad illius canonizandi actum ultra progredi, riteq. eundem in sanctorum numero ascribere.

*De consistorijs canonizationis causa habitus. . . . .* XL.

**R**E a Cardinalibus ita explicata, optimus Pontifex SIXTVS QVINTVS, vt religiosissimo desiderio exarscens, ita attentissimus et diligentissimus ad rem perficiendam, consistorium secretum quàm primum habere voluit: quod duodecimo Calendas Iulij habuit frequentissimo Cardinalium conuentu. Erat vnus, vt dixi, e Cardinalibus delegatis iudicibus, Marcus Antonius Columna: qui, a collegis delectus, mirifice causam perorauit graui et illustri oratione vereq. digna amplissimo Cardinale. Eam huic commentario adiungam ad extremam partem. Sed magna omnium attentione cum auditus esset: tum a Pontifice in primis attentissime, qui id negotium, quod totum Dei est, summa pietate amplexus, et luculentissima oratione dicentis, et cogitatione meditationeq. rerum, quæ præclaræ ac diuinæ narrabantur, magnopere delectatus, intimum animi gaudium vultu atque adeo lacrymis ostendit. Erat enim oratio plena officijs pietatis, referta exemplis sanctitatis, et splendescens lumine illustrium miraculorum, quibus vir Dei Didacus maxime claruit. Iis omnibus auditis Cardinales, sententias rogati, canonizationi suffragati sunt magna pietatis significatione. Tum Pontifex, de eorum consilio, et assensu omnia rite recteq. acta, et gesta, ac legitime probata esse decreuit: et pergere iussit ad reliqua, quibus canonizationis actus omnibus partibus absolueretur. Septimo igitur Calendas Iulij, die sabbato consistorium publicum fuit. In eo Pontifex, vt in solempni id generis actu moris ritusq. est, amictu Pontificio rubro, et mitra pretiosa ornatus, folio præcelso sub umbella eiusdem coloris sedit, magno Cardinalium confessu, magnaq. Antistitum frequentia, et celebri virorum omnis ordinis multitudine. Tum Pompeius Arrigonius, Aduocatus consistorialis, et regius, iuris scientiæ, atque eloquentiæ laude florens, oratione Latina, et in omnibus partibus elegantissima, primum exposuit augustissimum perpetuumq. Philippi Regis catholici desiderium, quo tam diu maxime exarsit ad beati Didaci canonizationem: deinde ordine narrauit

uit eiusdem viri beati integritatem fidei, sanctimoniam, et simplicitatem vitæ, admirabiles virtutum progressiones, et miracula aliqua præsertim insignia: tum demum perorauit. In qua peroratione cum in primis eiusdem Philippi Serenissimi Maximiq. Regis, tum vero Toletanæ ecclesiæ, vniuersitatis Complutensis, et denique totius Hispaniæ nomine. Sanctissimum D. N. Sixtum, quam maxime potuit, id rogauit, atque obsecrauit, vt, qua est ardentissima pietate, beatum illum virum, in domo Domini tot meritorum splendore elucentem, in sanctorum numero referre velit. Hæc Arrigonius cum dixit: tum Antonius Buccapadulius, Secretarius Apostolicus, vir doctus et eruditus, non modo ad eloquentiam, sed ad omnes liberales ingenuasq. disciplinas, ex præscripto Pontificis apposite, ornate, splendide, ac grauissime respondit. Pietatis namque regię studium, diuturnamq. rei tam piæ postulationem, præclare commendauit: canonizationis actus rite solemniterq. conficiendi voluntatē summi Pontificis propensam ostendit, eamq. ardentius inflammata narratōe vitæ sanctissimæ, virtutū, et miraculorum, quæ Arrigonius Aduocatus dilucide explicauit: sed ob rei grauitatem dixit, Pontificem velle diutius deliberare: interea Deum in primis orare id omnes oportere, vt diuino lumine mentem illustret Sanctitatis suę, quo rectius actionem grauissimam dirigat cum ad Dei ipsius gloriam, tum ad ecclesiæ amplitudinem, Christianæq. pietatis fructus vberrimos. Sed, vt res tota tamquam ob oculos posita, planius cernatur, et responsum hoc, et orationem commentario in extrema parte ascribam.

*De consistorio, quod eius rei causa postremo habitum est, ac de præstantissima Pontificis concione. XII.*

**Q**UONIAM res agebatur maxima, semper aliquid reliquum fuit, quod in consultationem, ac deliberationem venit. Sed præterea ritus ratio id postulabat, vt postremo consistorium haberetur, in quo causa tota, non solum Cardinaliū, id quod in more positum est, sed Patriarcharum etiam, Archiepiscoporum, aliorumq. Antistitum, qui præsentibus adessent, suffragijs permitteretur. Dubitatum est, an Cardinales simul, et reliqui

reliqui ordine Præsides suffragium ferrent. Res diu incerta, et obscura, ita discussa est, vt omnes eo ipso in consistorio suffragium ferrent: cum in œcumenicis concilijs id fieri solemne sit, tum etiam in causis grauissimis, quemadmodum Innocentiũ Quartum in causa Federici Imperatoris, Clementem Quintũ in Concilio Viennensi de re quorundam Principum maxima, Pium secundum in canonizatione item beatæ Catharinæ Senensis, et Leonem Decimum itidem fecisse, cum Franciscum de Paula in sanctos retulit, ex actorum monumentis comperitissimum fuit. Quia vero in eiusmodi consistorio ius suffragandi præter Cardinales omnibus etiam Antistitibus, vt dixi, permissum est: semipublici nomine illud appellatur in commentarijs quotidianis veteribus rituum Pontificalium. Id consistorium quinto Calendas Iulij, feria secunda, habitum est. Vbi autem omnes, suo quique loco, confederunt, Cardinales et item ceteri Prælati, qui frequentissimi aderant, miro silentio, cum rei grauitate, lociq. auctoritate consentaneo, tum Pontifex, amictu pontificio rubro, fimbrijs aureis ornato indutus, cum mitra simplici, auro contexta, e folio concionem habuit, sententiarum diuinarum pondere grauissimam, doctrinæ vbertate eruditissimam, omniq. argumentorum maiestate, et sapientiæ admiratione maxime decoratam. Qua in concione a rei, quæ agebatur, magnitudine exorsus, primo de potestate Pontificis, auctoritateq. ecclesiæ, quæ a Deo tradita est, illuminate diuineq. dixit: tum demonstraui et sacris litteris, et rationibus, ex intima Theologia depromptis, omniq. argumentorum genere, Romanum Pontificem, verum successorem beati Petri Apostolorum principis, pro quo orauit Christus Dominus, ne eius fides deficeret, eundemq. verum caput ecclesiæ, quæ est firmamentum et columna veritatis, quæq. a Spiritu sancto regitur ac gubernatur, in sanctorum canonizatione errare, et falli non posse. Adque non modo pie, sed necessario, et certissima fide credendum affirmauit omnibus summis rationibus diuinitus in medium allatis: cum illud etiam perspicue manifestum sit, ecclesiæ Pontificisue decreta, certa, et firma esse, quæ ad fidem, aut morum disciplinam pertinentia, certis et firmis principijs fundamentisue innitantur. Pluribus cum eam in sententiam dixisset, ad horæ spatium concionem duxit: quam cuncti, qui

qui interfuerunt, summa attentione, atque admiratione audierunt. Deinde Pontifex de beato Didaco, in sanctorum numerum ascribendo sententias dici iussit: tum suo quique ordine, Cardinales, postea Patriarchæ, Archiepiscopi, Episcopi, Auditores Rotæ, Protonotarij, Abbates, ceteriq. omnes, qui aderant, vno consensu, ac libere dixerunt, illum, cuius vitæ sanctitas, ac miracula nota, et testata erant, dignum esse, qui in sanctis ascriberetur. Singulorum sententias vbi Pontifex benignissime audiuit, diem actus canonizationis certum statuit ac decreuit vj. Nonas Iulij: qui dies beatissimæ Virginis Mariæ visitationis sacer, in sabbatum incidit. Hoc factum est a Domino. Quo enim die, nimirum sabbato, beatus Didacus e corporis ergastulo solutus, in cælum abiit: postea tot elapsis annis, sabbato itidem in sanctorum numerum ponitur. Die præterea, ex ecclesiæ vsu, atque institutis in venerationem dicato Sanctissimæ Virgini, Dei matri, quam ille in hac vita, vt narraui, eximia pietate coluit. Festo etiam die eiusdem Virginis, quem ab eius infantia coli coëptum est, vt ceteros alios eiusdem semper præcipue in honore cultuq. habuit. Omnes igitur Dei viro cum suffragati essent ad canonizationis causam: mox fisci Apostolici procurator de summi Pontificis decreto, ac de assensu Antistitum, Protonotarios præsentés rogauit, vnas pluresve tabulas confici ad rei gestæ fidem faciendam.

*De basilica Vaticana S. Petri, eiusq. solemnī apparatu ad canonizationis actum.* X I I I.

**I**LLUD in more iamdiu positum est, vt, cum Romæ Pontifices manent, in sacrosancta basilica Vaticana beati Petri, Apostolorum Principis, actus canonizationis ab ijs celebretur: quemadmodum celebritatum eiusmodi, quæ multis abhinc ætatum sæculis ritu solemnī actæ sunt, commentarij rituales veteres demonstrant. Eam basilicam Sanctissimus D. N. SIXTVS QVINTVS ex antiquissimo instituto delegit, ac decreuit, vbi maxima illa solemnitas ageretur: quæ rite religiosq. celebrata, exemplum ex omni parte præclarissimum attulit mirificæ pietatis. Pontifex enim, qui omnia

L cogi-

cogitata, optata, et facta ad gloriam Dei, ecclesiæq. amplitudinem dirigit, eius rei recte conficiendæ curam ac facultatem Cardinali Gesualdo dedit, quem paucis ante mensibus sacrorum rituum congregationi præfecerat. Is, ut vir est summa ingenij solertia, et prudentia magna, ad Pontificis mandata exequenda attentissimus, nihil non egit egregijs consultationibus, ut canonizationis, cuius sollicitudo in animo Pontificio insidebat, modus et actus ad exitum perduceretur, qui maxime a pijs omnibus expectabatur. Sed ut ea res, plena mysteriorum, et sacris referta ritibus, ex Pontificis voluntate in primis succederet, omnemq. solidæ, ac perfectæ laudis cumulum haberet: nihil Cardinalis consultaui, aut deliberaui, quod ad Pontificem non retulisset: ex cuius non solum voluntate, sed sapientia singulari, qua diuinitus excelsit, actio omnis gerenda erat.

In basilica igitur primo suggestum, firmissima contignatione, et opere amplissimo, decoroq. extructum, intra mediam illius naui continetur: quæ pulcherrimam formam ac speciem, aspectu iucundissimam præ se ferebat. Longe id patebat pro mensuræ Romanæ ratione, palmos sex et nonaginta, late septem et quadraginta. A pavimento autem altitudinē erat cubitorum circiter quinque: totum constratum decentissime pannis colore viridi: a parte vero ubi solium Pontificis collocatum perspiciebatur, stragulo purpureo.

Super suggestum a fronte, quæ ianuam primariam basilicæ spectat, altare egregie extructum cernebatur, in quo Pontifex Missam solemniter celebraturus erat. Hæc suggestu pars vndique splendescēbat ornamentis, et aulæis, peristromatisq. conchiliatis, auro argento intextis, ac pretioso opere confectis: quæ, duplici ordine appensa, erant præclara ad aspectum. In media hac parte extabat peripetasma, mirifico artificio contextum, Spiritus sancti, instar linguarum ignis, super Apostolos aduenientis, memoriam et imaginem repræsentans, maxime insignem, canonizationis actui apte riteq. conuenientem.

Super altaris illius umbella, crucis amplissimæ signum eminebat, textili stragulo expressum, clauibus duabus, lumine  
artifi-



artificioſo eluſcentibus hinc inde ornatum, præclariffimum aſpectum exhibens . Proxime autem ſub hoc ornamentum pendebat culcitra, hoſoferico purpureo amiſta, crucis item magnæ imagine auro intexta, qua beati martyres olim ſepeliebantur, vt ex veteri perpetuaq. traditione conſtans eſt opinio .

A quattuor ſuggeſti lateribus ſuſpenſa erant vexilla totidem : quæ ſingula, ſancti Didaci effigiem exhibebant, S I X T I Pontificis, et Philippi Regis inſignibus ornatam . Tum vero, cum vniuerſus clerus, ſupplicationis cauſa ad baſilicam, procedens, aduentauit, quintum, ceteris quattuor longe maius, eiſdem imaginis ornatu ſplendescens, in medio ſuggeſto quàm decentiſſime pendebat : ita vt omnia quinque ſimul, inter ſe ordine reſpondentia, ſpeciem præ ſe ferrent, mirificam aſpectu .

Aſcendebatur ſuggeſtum commode aliquot gradibus : ingreſſioq. eo fiebat ianuis duabus, quarum vna in ſummis, altera in imis gradibus, ab Heluetijs præſidarijs militibus cuſtodiebatur, ne hominum, quorum ingens concurſus fuit, turba illuc præ ſpectaculi deſiderio irrumperet . Erat autem ſuggeſti locus vndique ornatuſ, atque inſtructuſ omni ſacra ſupellectile, veſte, et ceteris rebus ſelectiſſimis ad rem confiſciendam neceſſarijs . A dextera altaris Pontificij, nimirum a latere Euangelij, loco editiori collocatum erat ſolium Pontificale, umbella, vt moris eſt, in celeberrimo actu ornatiuſ conſectum . Quo de ſolio Pontifex functiones, ad canonizationem pertinentes, ceteraſq. actiones executuſ eſt : quaſ illum, Miſſæ ſacrum ſolemniter celebrantem, exequi ſolemne eſt . A ſiniſtra, nempe a latere Epiſtolæ, poſitum cernebatur ſolium humiliori loco : vbi is, Miſſæ ſacrum factuſ, ſacris veſtibus, de more, indutuſ eſt : Vndique a ſuggeſti partibus diſpoſita erant ſubſellia, aulæis inſtructa, atque adornata ad Cardinalium conſeſſum : a quorum tergo ſedilia extabant, quibus Archiepiſcopi, Epiſcopi, et reliqui Antiftites conſiderent . Extrinſecus autem Cleruſ Romanuſ omniſ, qui ſuam quiſque candelam ceræ albæ, manu geſtabat, locum cum crucibus habebat, e quo ſolemneſ actum ſpectaret . Prope ianuam, quæ in ſummo ſcalæ gradu erat a ſubſelliorum ter-

go, in quibus Cardinales confidebant, instructa mensa extitit pretiosis donarijs, quæ offerenda erant.

Basilica amplissimo ornatu, apparatuq. longe omnium sumptuosissimo mirifice fulgebat, luminibus vbique densissimis, et funalibus ceræ candidæ, a superiori parte ordine collocatis, vndique prælucentibus. Proxime autem ornamentum, subter illa erat, phrygiano opere pulcherrimum, palmos aliquot longe lateq. patens, præclare intextum, insignibus sancti Didaci, SIXTI Pontificis, et Philippi Regis maxime decorum, topiarijsq. floribus, partim pictura, partim herba adumbratis, aspectum præbebat iucundissimum. Ab hoc phrygio ornatu ex omni parte pendebant aulæ, artificio admirabili contexta: a latere autem, vbi sanctissimum Sacramentum asseruatur, stragula spectabantur, opere attalico, filisq. aureis collucentia. Omnis denique tum basilicæ, tum fuggesti apparatus, vt ex commentarijs quotidianis rerum Pontificalium perspicui potest, omnes alias canonizationis celebritates, vel apparitissimas, ante actas, longe superauit.

*De processione, ac supplicatione solemnī.*

XIV. E

**R**EBUS his omnibus recte apparatis, pridie diei canonizationis maximus factus est concursus ingentis multitudinis: quæ prima, secunda, tertiæq. noctis vigilia, et summo mane frequenter confluens, non tantum basilicam, sed porticum, atrium, limina, forumq. Vaticanum amplissimum, vndique repleuerat. Immo via Alexandrina, quæ recta ab arce Adriani ad Vaticanum ducit, conferta erat vndique hominibus omnium ordinum. Magna frequentia concurrat, mirificiq. etiam non solum ciuium Romanorum, sed peregrinorum coetus, fuerunt canonizationis voce excitati, actum tam solemnem frequentabant. Omnia spiritalis gaudij plena, vt parietes ipsi præ lætitia gestire viderentur. In tanta autem, tamq. innūmera hominum turba, quæ sæpenumero, vel leuissimis commota rumusculis, maximos tumultus de repente alias concitare aliquando consueuerat: sine vllō motu ac perturbatione, immo vero summa tranquillitate sunt acta, et transacta omnia. Postridie igitur, qui dies canonizationi

zationi decretus erat, hora octaua Cardinales, sacris vestibus, pro suo quique ordine induti, in sacellum Palatinum, quod SIXTI nomine vocant, frequentes conuenerant: coq. item loci præsto erant Patriarchæ, Metropolitani, ceteriq. Antistites, mitris et pluuiialibus vestiti: Pœnitentiarij basilicæ sancti Petri, cafulis amicti: tū subdiaconi, et Rotæ Auditores rochetis, et superpelliceis: Protonotarij, vt moris est, cappis et rochetis: Tum Pontifex, ab aliquot Cardinalibus, Legatis Principum, Rōmanis viris primarijs, et Prælati familiaribus deductus in sacellum descendit: vbi in altari vestes sacræ Pontificiæ, quibus indueretur, apparatus erant: vtpote Amictus, alba, cingulum, stola, et clamys purpurea Pontificalis, opere textili aureo, fimbrijs item aureis. In qua clamys ab vna parte assuta erant insignia Pontificis, ab altera Philippi Regis. Ijs vestibus decore indutus cum esset: tum in coronam Cardinalium astantium, a Petro Deça Cardinale Hispano, quem is iusserat, in oratoris locum, præsto esse Regio nomine ad canonizationis actum, tres cereos colore albo accepit, eosq. auratos, atque elaboratos signis Pontificijs, et Regijs. Horum duo prægrandes erant, quorum vnum oratori Reipublicæ Venetæ, alterum item oratori Ducis Sabaudia, tradidit, tertium, qui tenuior erat, in processione manibus ipse prætulit. His rite gestis, Pontifex exorsus est hymnum, AVE MARIS STELLA, quem non modo, propterea quod dies festus Visitationis beatæ Mariæ Virginis erat, sed quia ob canonizationis celebritatem in supplicationis, processionisve initio cani, ritus postulat. genibus flexis ad altare fuit, dum hymni versus primus est absolutus, inde surgens, mitram pretiosam accepit, in sellaq. gestatoria sedit, quoad processionis ordo e SIXTI sacello ad palatij ianuam Pontificiam directus est. Interea pia tacita supplicatione omnes, et solemnī modulatione cantores hymnum profecuti sunt. Pontifex autem, qui est religiosissima pietate inflammatus, quiq. in seraphico ordine tamdiu celestium illarum contemplationum curricula præclare confecerat, secum animo reputans canonizationis actum, quem celebraturus erat, omni mentis cogitatione ad supplicationem attentissimus, tum in processione, tum in omni canonizationis

nis officio sanctissimam illam pietatem, vereq. Pontificiam, quam cordis sui visceribus conceperat, non modo religiosæ precum vocibus, sed vultu, qui animi imago est, facie, ore, oculis indicauit: cum lacrymarum, quas præ eximia sua erga Deum charitate expressit, sint plerique omnes spectatores, ac testes. Omnis autem Clerus Romanus tum sæcularis, tum regularis, cuius maxima frequentia erat, in atrio palatii amplissimo morabatur: vbi vero primum procedendi signum accepit, e ianua primaria ordine egressus, totum forum Vaticanum processione circuiuit, hymnisq. et canticis, litanijs, omniq. sanctarum precum modulatione supplicando, demum venit ad atrium et porticum basilicæ sancti Petri: ibiq. pro ritus ratione constitit, dum Pontifex, qui sella gestatoria de more, solemniter euectus, sequebatur, in eius medio ad eandem basilicam processit. In actu processionis mirum silentium fuit, mira quoque omnium veræ ac solidæ Romanæ pietatis significatio. Res enim ita administrata est, quo diligentius tumultibus prouisum esset, vt ad suburbium Vaticanum, quo temporis spatio canonizatio agebatur, curribus, pilentis, quadrigis, essedis vehiculisq. cuiuscumque generis, ac iumentis omnibus aditus vndique præcluderetur.

*De ordine processionis. X V.*

**A**D basilicam Vaticanam via, quam proxime dixi, processum est hoc ordine. Primum familia Pontificia, vestibus rubris amicta, antecedeat: deinde Secretarij Apostolici: post, Aduocati Consistoriales, vestibus violaceis, induti incedebant: tum tubicines, qui certis stans locis simul inflantes, suaui tubarum sono canebant. Proxime sequebatur procurator Generalis obseruantium ordinis Minorum, homo Hispanus, sacerdos, planeta albi coloris vestitus: qui insignis vexillum, sancti Didaci effigie religiosa præclare ornatum, ferebat. Hunc prope consectabantur quattuor eiusdem ordinis sacerdotes vestitu albarum. His propinqui erant Cantores: qui varijs modulate, numerosq. canendi modis, ac pio hymnorum cantu, omnium animos alliciebant ad spiritale gaudium. Mox procedebant Abbreviatores, Acolyti Apostolici,

ſtolici, Auditores Rotæ, Subdiaconi item Apoſtolici, omnes ſuperpelliceis et rochetis veſtiti. Erat in ijs autem Subdiaconus eodem ornatu, cruce Pontificiam præferens: cui miniſtri duò virgæ rubræ aderant, vnus a dextero, alter a ſiniſtro latere. Crucem Pontificiam prope comitabantur Poenitentiarij baſilicæ ſancti Petri, deinde Abbates: tum Epiſcopi, deinceps Archiepiſcopi, Patriarchæ, Prælatiq. Sanctiſſimo D. N. aſſiſtentes, pluuialibus et mitris ornatī. Iis proxime Cardinales Diaconi incedebant, dalmaticis, et mitris: mox Cardinales preſbyteri, planetis, et item mitris: poſt Cardinales Epiſcopi, pluuialibus, itidemq. mitris induti. Hos ſtatim ſequebantur Diaconi Cardinales tres, quorum vnus erat Aſcanius Columna: qui, quoniam muneris ſui functio tunc erat, Euangelium legere; medium inter alios duos locum tenebat, quorum vnus fuit Cardinalis Sfortia, alter Cardinalis Montaltus, ambo tamquam Pontifici aſſiſtentes. A lateribus eorum duorum Cardinalium progrediebantur Oratores duo, vnus Reipublicæ Venetæ, alter Ducis Sabaudia: qui vterque cercos illos duos prægrandes manu portabat.

Iis omnibus ordine præcedentibus, ſummus Pontifex, ſella geſtatoria, ſublimis euehebatur ſub vmbella: quæ primo ab Oratoribus, poſt ab alijs Principibus, tum ab alijs primarijs viris ferebatur, qui viciffim hoc munus ſubierunt. Sequebantur deinceps Cubicularij intimi duo Pontificis, qui præſto eſſent ad aſſiſtendum: in horum medio erat Seraphinus Oliuarius, Vicedecanus Rotæ: qui Dècani abſentis vicem gereret ad mitræ Pontificiæ functionem. Vltimo loco erant Prætonotarij eodem, vt ſupra, veſtitu atque ornatu: tum præterea frequentiſſima multitudo ciuium Romanorum, et aliorum nobilium virorum. A Pontificis et Cardinalium lateribus præſidiaria Helueticorum còhors magna præſto erat ad ſum mouendam repellendamq. tam infinitæ multitudinis turbam. Totum autem forum Vaticanum, quacumque parte ſupplicationibus procedebatur, prætorijs equitum turmis erat vndique ſeptum et communitum.

Pontifex autem, Cardinales, Patriarchæ, Archiepiſcopi, ceteriq. omnes Antifites, qui in proceſſione frequentes aderant, cercos albos accenſos manu geſtabant: quos eorum vnicuique pro

pro dignitatis ratione large liberaliterq. distribuerant ministri Philippi Regis, cuius rogatu celebritas canonizationis agebatur.

Vbi ad Basilicæ porticum Pontifex venit: ei Canonici, clerusq. illius basilicæ vniuersus, obuiam fuerunt suauissimis musicæ modis et cantibus.

*De actu, et solemnitate canonizationis.*

XVI.

**B**ASILICAM Pontifex ingressus, suggestum, canonizationis causa apparatus, ascendit: tum e sella gestatoria descendens, in faldistorio genibus flexis, ad altare versus orauit. Inde solium Pontificium, excelsio loco positum, conscendit: in quo, vt moris est, Cardinales obedientiæ munus ei præstiterunt. Qua absoluta re, Franciscus Mocantius, cærimoniarum magister, Cardinalem Deçam accersuit, qui cum Arrigonio Aduocato ad Pontificem venit. Ambo vbi debitam Pontificiæ maiestati reuerentiam adhibuerunt: tum Cardinalis stabat, aduocatus autem genibus flexis, ac supplex paucis verbis dixit, Deçam Cardinalem præsentem, id regio nomine summopere rogare, atque obsecrare, vt beatus Didacus, in sanctorum numerum rite ascriberetur. Tum Buccapadulus secretarius Pontificio nomine, grauiter breui respondit, illud negotium maximæ deliberationis fuisse: eamq. ob rem diuturnis necessarijs consultationibus diligenter a Pontifice tractatum: et cum, quod ad canonizationis actum pertineret satis probatum esse videretur, tamen quia oratio iusti assidua multum apud Deum valet, Pontificem hoc maxime exoptare dixit, vt omnes vna precarentur, quo magis, res a auxilio diuino inchoata, adiuuaretur etiam diuina illius benignitate.

Hæc vbi Secretarius respondit, continuo e folio Pontifex ad faldistorium descendit: vbi genibus flexis, mitra indutus, orauit: interim sacre litanie in choro canebantur, et alie preces dicebantur. Quibus absolutis, ad solium redijt.

Magister autem cærimoniarum iterum Cardinalem Deçam cum aduocato ad Pontificem euocauit: ad quem confestim cum ambo accessissent, itidem iterum summopere inflarunt. Apposite et breui Secretarius dixit, rem tam grauem pos-  
sulare



stulare vt ardenti iterum oratione preceq. imploretur auxiliū et gratia Spiritus sancti, vt in re grauissima suo diuino lumine eum dirigat. Tum rursus Pontifex e folio in faldistorium venit ad orandum, vt supra, genibus flexis, et item mitra adhibita. Mox autem Cardinalis Sfortia Diaconus, ad populum versus, alta voce dixit: ORATE. Ilico mitra e capite Pontificis deposita, ceteri etiam omnes Cardinales et Antistites deposuerunt: genibusq. flexis simul cum Pontifice taciti orarunt summa intimi animi prece, quoad Cardinalis Montaltus Diaconus, a sinistra Pontificis stans, alte pronunciauit: LEVATE. Qua voce pronunciata Pontifex, Cardinales, et reliqui surrexerunt. Libro tunc a Prælatiſ assistentibus allato, Pontifex inchoauit hymnum: VENI CREATOR SPIRITVS. Statim ad genuflexionem redijt, itidemq. omnes fecerunt, tamdiuq. in ea permanſerunt, quoad primus versus finitus est. Tunc ad solium Pontifex inde abiit, ceteri steterunt. Hymno absoluto, Cantorum chorus cecinit, versum: EMITTE SPIRITVM TVVM. Postea dixit Pontifex orationem hanc: DEVS QVI CORDA FIDELIVM, et cetera. Qua pronunciata oratione, Deça Cardinalis vna cum aduocato, Philippi Regis nomine tandem tertio instetit, summeq. efflagitauit, negotium canonizationis confici. Respondit Secretarius: Pontificem credere Dei voluntate, ac benignitate id fieri, propterea deliberasse, beatum Didacum, vitæ sanctitate, et miraculorum splendore clarissimum, in sanctorum numerum referre.

*De canonizationis decreto. XVII.*

**A**LLATVS est confestum ab assistentibus Prælatiſ liber: de quo canonizationis sententiam Pontifex, in folio sedens, mitraq. ornatus, pronunciauit verbis grauissimis, maximeq. significantibus. Is illa Pontificia sententia beatum Didacum in sanctis Confessoribus constituit, et adscripsit: decreuitq. propterea ab omnibus illum veneratione coli: diem eius festum pridie Idus Nouembris officio sancti Confessoris celebrari: ecclesias, et altaria, quibus Deo omnipotenti sacrificium fiat, illius nomine ædificari licere. Indulgentias,

M et pri-

et priuilegia omnia, quæcumque sanctorum eiusdem ordinis seraphici ecclesijs concessæ sunt, concessit fidelibus, vere poenitentibus et confessis, die illius festo sacellum, vbi Compluti eius corpus reconditur, aut visitantibus altaria ecclesiæ, quæ ad eiusdem honorem erigentur.

Sententia rite solemniterq; pronuntiata, Cardinalis Deça, et Arrigonius Aduocatus, qui ambo præsentés aderant, Pontifici debitas gratias regio nomine egerunt, et habuerunt: simulq; supplices petierunt; a Pontifice decerni, canonizationis bullam confici. Tum is dixit: DECERNIMVS. Illicoq; vt moris ac ritus est; signo crucis benedixit. Quo decreto facto, Aduocatus Protonotarios, Notariosq; præsentés rogauit, publicas rei gestæ tabulas confici ad memoriam perpetuam.

His rebus actis omnibus, lætitiæ, et gratulationis publicæ signa facta sunt, tubarum clangoribus, campanarum sonitu solemnissimo, maximis sclopetorum explosionibus, et bombardarum, quæ in foro Vaticano, et arce sancti Angeli sunt, reboatibus summo, et diuturno fragore tonantibus, spiritaliq; ecclesiæ gaudium significantibus.

Ad solemnitatis actum progrediens Pontifex hymnum, TE DEVM LAUDAMVS exorditur, quem Cantores canere pergunt. Hymno absoluto, Cardinalis Sfortia Diaconus, versiculum cantauit: ORA PRO NOBIS, BEATE DIDACE. Cantores responderunt: Vt digni efficiamur promissionibus Christi. Tum Pontifex sequentem Orationem de Sancto dixit.

OMNIPOTENS sempiternæ Deus, qui dispositione mirabili infirma mundi eligis, vt fortia quæque confundas: concede propitius humilitati nostræ; vt pijs beati Didaci confessoris tui precibus ad perennem in cælis gloriam sublimari mereamur. Per Dominum nostrum, et cetera.

*De Missa solemnî canonizationis. XVIII.*

POST orationem, Ascanius Cardinalis Columna, Diaconus Euangelij, canora voce dixit: CONFITEOR DEO, et cetera. In qua confessione cum sanctos Apostolos Petrum

Petrum et Paulum nominasset mox beati Didaci commemin-  
nit. In absolutione itidem Pontifex fecit. Deinde Ponti-  
fex tertiam inchoavit, quam choro prosequente ad alteram  
sedem accessit: in qua illum ministri vestes sacras Pontificias  
induerunt ad Missam celebrandam. Erant illæ vestes omni  
pretioso opere, præclaroq. artificio maxime insignes, ad cano-  
nizationis huius usum confectæ. Dum Pontificem induerunt,  
Tertiæ officiū Chorus cecinit. Quo finito, Missam de Visitati-  
one beatæ Mariæ Virginis, cum commemoratione beati Didaci  
Pontifex celebrauit. Sed in offertorio hæc ex ritu acta sunt.  
Dum Pontifex offertorij antiphonam de folio Pontificio di-  
cit: Cardinales quattuor e sublellijs suis ad res sumendas ve-  
nerunt, quæ in abaco, offertorij causa, paratæ et dispositæ  
erant. Ij fuerunt, Marcus Antonius Cardinalis Columna, vt  
Episcopus Cardinalis: Michael Cardinalis Alexandrinus, vt  
Cardinalis Presbyter: Hieronymus Cardinalis Matthæius, vt  
Cardinalis Diaconus: qui tres delegati iudices canonizationis  
extiterant. Quartus fuit Cardinalis Deça, quem in  
Oratoris Regij locum, vt dixi, Pontifex delegerat ad huius  
solemnitatis actum. Dona, ad offerendum apparata, ordi-  
ne tulerunt eorum domestici nobilissimi suarum quique fami-  
liarum viri: quæ dona, ac munera Cardinales ipsi obtulerunt  
admirabili cærimonia, mysteriorum plena. Cardinalis  
Columna, cereos duos, sancti Didaci imagine, et Pontificis,  
Regisq. insignibus pictos, maiores aliquanto illis, qui ad  
processionem ferebantur, hac cærimonia obtulit, vt singulos  
cereos primum oscularetur, tum Pontifici offerret: quos vbi  
Pontifex tangebatur, eius manum et genua oscularetur. Car-  
dinalis Deça, eadem cærimonia, cereum vnum obtulit, et  
canistrum exiguum auratum, in quo turtures binæ erant vi-  
uæ. Deinde Cardinalis Alexandrinus panes duos prægran-  
des obtulit, vnum auratum cum insignibus Pontificis, alte-  
rum argento calatum insignibus Regis. Mox iterum Cardi-  
nalis Deça alterum cereum obtulit, et item alterum canestel-  
lum cum binis turturibus albis. Cardinalis autem Matthæ-  
ius eodem ritu cados exiguos duos, vini plenos obtulit, vnum  
inauratum in cuius fundo erant insignia Pontificis, alterum  
argentosum cum insignibus Regis. Illico Deça Cardinalis

tertio obtulit cereum tertium, et canistrum, coloribus variè pictum, auiculis diuersi generis plenum. Quod, dum offertur, eius reticulum magister cærimoniarum incidit, vt auiculæ volucres, quemadmodum fecerunt, hac atque illac volitarent. Ceteri tres Cardinales, delegati iudices, donis oblatis, ad suum quisque subsellium, redierunt: Deça solus remansit, quoad omnium oblationum suarum, quas narraui, functionem est exequutus.

Offertorio rite peracto, Pontifex statis solemnibus cærimonijs Missam celebrare pergit cum propria Sancti commemoratione, Secreta, et Postcommunione. Tum Missæ solemnibus celebratis, Cardinalis sancti Georgij, Episcopus Portuensis, cum Farnesius Cardinalium Decanus abesset, nomine Pontificis plenariam Indulgentiam, forma ecclesiæ consueta, omnibus præsentibus, indixit. Req. omni demum rite acta Pontifex de more a Cardinalibus ad aulam, quam paramentorum nomine vocant, deductus, inde omnes dimisit benedictione.

*De sacrorum vestimentorum apparatu, et supellectile ad canonizationis huius celebritatem. XIX.*

**N**E vero quid ad rei bene præclareq. confectæ narrationem desit, exponam etiam vestes, quæ canonizationis causa confectæ sunt mirifico pretiosq. opere.

Vmbella altaris Pontificij, aspectu speciej. omnibus ex partibus pulcherrima, ex auri pufulati tela, egregio artificio intexta, et amplitudine admodum magna fuit, lacinijis pendentibus ornata, in quibus apparebant imagines sancti Didaci, insignia Pontificis et Regis, vexillum ecclesiæ, et facies Seraphinorum. Omnia hæc ornamenta fuerunt locis suis varie distincta, ac dispersita, cum ex laciniarum fragmentis triginta totum id opus constaret.

Pallium altaris, eadem tela pretiosa, lacinijis et penicula-mentis auro vndique collucentibus. Erat in medio pallio effigies beati Didaci, a latere dextero insignia Pontificis, a sinistro autem, Philippi Regis: omnia acu picta, auroq. argento varie copiosq. contexta.

Inte-

Integumenta bina sacrorum codicum ex eadem tela , auro pufulato splendescenti , cum suis etiam fimbrijs , opere aurato illustribus .

Puluinar Missalis codicis ex eadem sumptuosa tela , ornatu aureo obductum , et globulis ac lemniscis sericis , auro intextis , præclaro opere enitens .

Sacculus corporalis admodum amplus , vt in sacello Pontificio consuetudinis est , ex illo ipso telæ opere , eodem ornamento , cruceq. actû putâ ex filis aureis .

Ornamentum suggesti lignei ad vsum lectionis Euangelij , totum ex illa pictura textili aurea confectum , fimbrijs aureis et sericis , sanctiq. Didaci effigie , atque insignibus Pontificijs et Regijs sumptuosissime elaboratum .

Faldistorij ornamentum , eodem opere , et artificio , insignibusq. vt supra , perfectum .

Puluinaria bina ampla admodum , vt moris est in sacello Pontificio , ad vsum genuflectionum ex eodem textili opere aureo globulis , et lemniscis oblongis , sericis , aureis , vt supra , ad ornatum appositis . Eorum alterum , quo Pontifex nitebatur , effigie sancti Didaci ornatum erat , ac præterea Pontificijs Regijsq. insignibus .

*De vestium Pontificalium apparatu .*

*XX .*

**C**LAMYS Pontificia , attalico opere aureo intexta , purpureo colore apparata fuit , amplissimo ornatu laciniarum ex altera textili tela aurea , opere vt vocant , passamano item aureo circumfluens , vncis ternis , et fibulis senis , ex puro putâ auro , collucens .

Planeta cum stola , et manipuli bini , ex eadem magni pretij tela , toto opere aureo intexta , lacinijs ex holoserico villosa , operis attalici . In extrema parte a tergo effigies sancti Didaci , hinc inde Pontificia , et regia insignia , a cu omnia picta filis aureis , refulgebant .

Dalmatica , et tunicella , ambæ sericæ , colore candido , circumuestitæ opere passamano aureo .

Gremiale ex illa aurei operis tela , cui crux intexta erat , ornatu fimbriato serico aureo .

Caligæ ex serico albo, ornata opere passamano aureo.  
Sandalia e tela aurea : quibus cruces binæ ex auro as-  
sutæ erant .

*De ornamentorum apparatu ad usum ministrantium  
Pontifici.* XXI.

**P**LUVIALE ex illa magni pretij tela, opere phrygio, quo  
Cardinalis Episcopus Assistens induebatur, ornatu erat  
lacinioso auro contexto, passamanijs circumdatum: quod  
vncis et fibulis argenteis annectebatur. Huic vesti a tergo  
pendebat insigne, quod Capucium vocant, satis amplum,  
ex opere attalico: in quo medio sancti Didaci imago, ab  
vnaq. et item altera extrema parte erant insignia Pontifi-  
cis, et Regis, acus opere confecta.

Tunicellæ Diaconales binæ, eodem opere, et ornamen-  
to, globulis præterea, et lemniscis auro splendentibus,  
cum stola, ac manipulis, tunicellarum vestitu respondentibus.  
In earum vnaquaque effigies Sancti, et insignia,  
ut supra.

Tunicellæ aliæ item binæ, e tela item aurea, sed operis  
plani, non auro eminentis, eodem ornatu, eadem effigie,  
ijsdem insignibus. Quarum vnas induit Diaconus, qui  
Græce Euangelium: alteras, qui itidem Græce Epistolam  
legit. Atque hæc de supellestili, apparatuq. sacrarum ve-  
stium: quæ cum vix, aut ne vix quidem præ operum ar-  
tificio ornatuq. vario explicari satis potuerint, re ipsa  
præbuerunt augustissimum, summaq. pietate refertissimum  
spectaculum, ad perpetuam tam solemnem actus gloriam  
maxime insigne.

*De Cardinalibus qui canonizationis solemnitati inter-  
fuerunt.* XXII.

**C**ARDINALES, qui canonizationis actui præsen-  
tes aderant, numero erant quadraginta. Quorum  
quattuor Cardinales Episcopi, triginta Presbyteri, sex  
Diaconi.

*Cardi-*



*Cardinales Episcopi ij intererant.*

**I**OANNES Antonius Sorbellonius, Mediolanensis, Episcopus Portuensis, nuncupatus Cardinalis S. Georgij.  
Alphonſus Gefualdus, Neapolitanus, Episcopus Tuſculanus.

Marcus Antonius Columna, Romanus, Episcopus Prænestinus.

Ptolemæus Gallus, Nouocomensis, Episcopus Albanensis.

*Cardinales Presbyteri.*

**P**ROSPER Sancta Crucius, Romanus. tit. S. Clementis.

F. Michael Bonellus, Alexandrinus, ordinis Prædicatorum. tit. S. Mariæ super Mineruam.

Ludouicus Madruccius, Germanus. tit. Sanctæ Anastasiæ.

Nicolaus Peluius, Gallus. tit. S. Praxedis. Cardinalis Senonensis.

Iulius Antonius Santorius, Casertanus, sanctæ Seuerinæ nomine vocatus. tit. S. Bartholomæi in Insula.

Hieronymus Rusticucius, Vicarius. S. D. N. tit. S. Sufannæ.

Ioannes Hieronymus Albanus, Bergomensis. tit. S. Ioannis ante portam Latinam.

Petrus Deça, Hispanus. tit. Sancti Hieronymi Illyricorum.

Antonius Carapha, Neapolitanus. tit. SS. Ioannis, & Pauli.

Ioannes Antonius, Fachinettus, Bononiensis. tit. SS. Quatuor Coronatorum.

Ioannes Baptista Castagnius, Romanus. tit. Sancti Marcelli.

Franciscus Iolicusius, Gallus. tit. SS. Trinitatis in Monte Pincio.

Iulius,

Iulius Cananius , Ferrariensis tit. S. Eusebij .

Nicolaus Sfondratus , Mediolanensis , tit. S. Cæcilie Cardinalis Cremonensis .

Antonius Maria Saluiatus , Romanus , tit. S. Mariæ de pace .

Augustinus Valerius , Venetus . tit. S. Marci , Cardinalis Veronensis .

Vincentius Laurus , Tropiensis . tit. S. Mariæ in via Cardinalis Montis Regalis .

Scipio Lancellotus , Romanus . tit. Sancti Saluatoris in Lauro .

Henricus Caietanus , Romanus . tit. S. Pudentianæ . Cardinalis Camerarius .

Ioannes Baptista Castrucius , Lucensis . tit. S. Mariæ de Ara celi .

Dominicus Pinellus , Genuensis . tit. S. Laurentij , in pane , et perna .

Hieronymus Ruuerius , Taurinensis . tit. S. Petri ad Vincula .

F. Hieronymus Bernerius , ordinis Prædicatorum . tit. S. Thomæ in Parione . Cardinalis Asculanus .

Antonius Maria Gallus , Auximanus . tit. S. Agnetis in Agone , Cardinalis Perusinus .

F. Constantius ordinis Minorum . tit. S. Petri in Monte aureo , Cardinalis Sarnanus .

Scipio Gonzaga , Mantuanus . tit. S. Mariæ de populo .

Antonius Saulius , Genuensis . tit. S. Vitalis .

Euangelista Palottus . tit. S. Matthæi in Merulana , Cardinalis Cosentinus .

Petrus Gondius , Florentinus . tit. S. Siluestri , Cardinalis Parisiensis .

F. Stephanus Benucius , ordinis Seruitarum . tit. SS. Marcellini et Petri , Cardinalis Aretinus .

*Cardinales Diaconi .*

**F**RANCISCUS Sfortia , Romanus , Diac. S. Nicolai in carcere Tulliano .

Alexan-

Alexander Perettus , Cardinalis Montaltus , Diac. S. Eustachij .

Hieronymus Matthæius , Romanus , Diaco. S. Mariæ in Cosmedin .

Benedictus Iustinianus Genuensis , Diac. S. Agathæ .

Afcanius Columna Romanus , Diac. SS. Viti et Modestæ .

Federicus Borrhomæus , Mediolanensis , Diac. S. Mariæ in Domnica .

Interfuit etiam magnus Archiepiscoporum , Episcoporum , Antistitumq. aliorum numerus , maxima nobilium virorum frequentia , et innumera hominum omnis ordinis , omniumq. vrbis regionum multitudo , vt supra narraui , quæ iam inde vsque a prima fere vigilia noctis , frequentissima ad solemnissimum tantæ celebritatis actum conuenerat .

Sit per omnia benedictus Deus , qui tenebricosis his temporibus , tanti tamq. illustris beneficij lumine ecclesiam catholicam collustrauit . Est hoc , quod proxime accepimus , vere munus donumq. diuinum . Omnium est , qui Christiano catholicoq. nomine censentur , illud agnoscere , profiteri effusis ad Deum precibus , obsecrationibus , atque omnibus pietatis officijs , hoc præsertim necessario rei Christianæ publicæ tempore : quo opus est communibus supplicationum aliorumq. piorum operum præsidijs . Tu vero Hispania , quæ iam inde ab initio nascentis fidei Christianæ tot tantisq. a Deo adornata es , atque illustrata muneribus , beneficij etiam huius splendore illuminare : in eoq. etiam perspice paternam charitatem SIXTI QVINTI , Pontificis Optimi Maximi , salutis et gloriæ tuæ cupidissimi : deinde etiam agnosce regium potentissimi Regis tui studium , quo exardescit ad catholicæ pietatis opera . Est cur ingentes , immortalesq. Deo gratias agas , et habeas : illudq. ab eo maxime preceris omni orationis assiduitate , vt vtrumque et Pontificem , et Regem quàm diutissime saluum et incolumem Respublica Christiana habeat . Verum tu Didace Sancte , qui supra cælestes orbes euectus , iam ad Deum fontem viuum , quem tantopere sitieras , lætus migraisti , quiq. illum nunc contemplaris bonorum omnium

auctorem, tuis precibus opitulare ambobus egregijs sancti-  
tatis tuæ cultoribus, SIXTO Pontifici, et Philippo Re-  
gi. At tu Deus, omnium conditor, cuius maiestatem ac  
numen in Sanctis veneramus, cuius immensam amplitudi-  
nem, illorum vita, mors, gloria maxime ostendit, quæ-  
sumus omnes, exaudi confessorem tuum beatum Didacum,  
pro utroque precantem: facq. vt eorum tandem tempori-  
bus, tua potentia suffragante, vniuersorum hostium franga-  
tur impietas. Per Christum Dominum nostrum. Amen.

## L A V S D E O.



# MARCI ANTONII

CARD. COLUMNAE

EPISC. PRAENESTINI


Relatio,

*De vita et miraculis B. F. Didaci de S. Nicolao facta  
coram S. D. N. SIXTO Papa V.*

Et Cardinalium Collegio, in Consistorio secreto.

Die xx. Iunij, Anno M D L XXXVIII.

BEATISSIME PATER.

UPERIORIBVS annis, et praesertim anno  
M D LXIII. a Rege Philippo et Carolo eius  
primogenito, sicut ex litteris et mandatis con-  
stat, et ab vniuersa fere Hispania humiliter suppli-  
catum fuit sanctae memoriae Pio Quarto, ut itan-  
te celebri fama Fratris Didaci, laici professi, ordinis Minorum de  
Observantia, qua per centum et plures annos in toto illo Regno  
constantissima vignerat, ac vigeat, ac illius vitae sanctitate,  
pluribusq. eius miraculis, unde pro sancto ab omnibus reputa-  
batur, ac colebatur, vellet sanctitas sua committere, ut de ijs  
omnibus diligens informatio sumeretur. Qua si vera reperta  
fuissent, sanctitas sua illum inter sanctos connumerandum, et  
pro sancto ab vniuersa Catholica Ecclesia tenendum, ac veneran-  
dum statueret. Quibus precibus, et repetitis postulationibus San-  
ctitas sua mota, anno sequenti M D LXIII. Mense Maio in  
Consistorio secreto totum negotium de more Ioanni Morono, Sa-  
raceno, Alexandrino, qui postea Pius V. fuit, Aracali, et Vi-  
tello S. R. E. Cardinalibus commisit, fueruntq. Remissoria in  
partibus transmissa, et canonice inchoatus processus, atque sum-  
maria informatio capta, et ad Curiam, viuentem adhuc Pio Quar-  
to transmissa. Eius vero morte subsequuta, Pio V. ab eodem  
Rege et Principe, necnon Gregorio XIII. supplicatum fuit, ne  
negotium reassumeret, et ad finem perducere. Sed cum idem etiam

N 2 Pontii.

Pontifices, antequam hac omnia persicerentur, ultimum diem vita suae sanctissime clausissent, fuit apud Sanctitatem Vestram eiusdem Regis Philippi, et Regni nomine per Illustrem Comitem de Olivares Oratorem suum supplicatum; ut cum iam omnia, qua in mandatis data fuerant, circa processum conficiendum, essent perfecta: Cardinalesq. omnes deputati, essent vita sancti, Sanctitas V. qua vicem in terris Iesu Christi gerit, et cui universalis ecclesiae cura commissa est, et ad quam solum hac negotia spectant, pro sua singulari pietate, dignaretur committere, et mandare, ut tam pium, tam sanctum, et ab universo Hispania Regno desideratum opus, ad debitum finem perduceretur. Quibus S. V. benigne annuens, de Mense Iunio M D C L X X X V. mandavit duobus Rota Auditoribus, Io. Baptista videlicet de Rubeis, Decano, et Christophoro Robuilerio, ut diligenter viso processu, et discusso, Sanctitati V. ut moris est, de scripto relationem facerent. Quo in negotio cum per multos menses diligentem nauassent operam: tandem relatione, ac voto Sanctitatis V. de scripto transmissa, volens consuetum in similibus ab hac sancta Sede, et a Pradeecessoribus Sanctitatis V. modum servare, Die xxij. Ianuarij anni praeteriti in consistorio secreto commisit Reuerendissimo Farnesio Decano, Alexandrino, Sanctae Severinae, Carapha, Sarnano, de Medicis, Mattheio, et mihi, ut viso omni cum diligentia toto processu de vita et moribus, et miraculis in eo contentis, relatione Rota considerata, Sanctitati V. in consistorio secreto de more relationem faceremus, sententiamq. ac suffragium nostrum explicaremus, ut postea Sanctitas V. sancti Spiritus gratia illustrata, quid faciendum iudicauerit, mature deliberare possit.

Reuerendissimis Dominis meis collegis visum est hoc negotium, licet humeris meis impar, et omnium Dominorum meorum minimo mihi demandare: quod, si placet Sanctitati V. qua maxima breuitate potero, in praesentia praestare conabor.

Tria sunt, Beatissime Pater, qua in hac hodierna narratione mihi explicanda proposui: primo de istius viri vita sanctitate et fidei integritate pertractabo, in quo, ut Theologorum omnium, et Canonistarum est sententia, totius istius negotij summa consistit: secundo loco de eius obitu: tertio de miraculis verba faciam. Et, ut a primo exordiar:



In Regno Castella, et ditione Hispalen. oppidum est nomine sancti Nicolai, in quo ante M. CCCC. annum natus est beatus Didacus, humilibus, sed Christianis, et magna pietate imbutis parentibus, qui simili pietate filium suum educare procurarunt. Hunc et si non genus insigne, egregie tamen ipsius virtutes, sanctissime actus vitæ documenta, et coruscantia miracula, non solum insignem, sed etiam clarissimum, atque illustrissimum reddiderunt. Nam cum mortalis huius vitæ pericula, quibus saepe anima aternis inuoluitur cruciatibus, perspecta haberet, ab in-  
 cunte aetate totum se pijs deuotus operibus: et apud idem oppidum sancti Nicolai, in quodam eremitorio ibi propinquo, sancti Nicolai veteris nuncupato, una cum pio quodam sacerdote secessit: ubi per aliquot annos eremiticam vitam ducens, magna cum totius illius oppidi adificatione permansit. Inde cupiens ar-  
 rioris obedientia vinculis alligari, retento eodem penitentie habitu, ad conuentum de Arrizasa non longe a Corduba distan-  
 tem profectus, ibidem seraphici sancti Francisci habitu recepto, illius religionem expresse professus est: eiusque regulam sanctissime per totam vitam ita inuiolabiliter obseruauit, ut aperte tes-  
 sentur viri omni exceptione maiores, neminem se uidisse adeo sua regula, et praeceptorum obseruantem. Quia vero Spiritus sanctus magnum in eo sanctitatis adificium adificaturus erat, pri-  
 mum, ac solidum huius adificij fundamentum in humilitate collo-  
 cauit: quæ in hoc viro tanta fuit, ut omnes, qui cum illo conuer-  
 sabantur, admirarentur, atque hac potissimum virtutis armatura munitus, diaboli artes omnes facile superauit. Obedientia ingum-  
 suauiter ferebat. Pralatorum mandata prompte, ac libentissime exequabatur. Et quoniam regulam sancti Francisci, ut dixi, professus fuerat, paupertatem, quam in sua professione vouerat, pie ac religiose semper coluit. Erat in eo magna fides, maxima cum spe et charitate coniuncta. Pauperes Iesu Christi, ac pro-  
 ximos ardentem dilexit. Infirmos, si quando sibi occasio offereba-  
 tur, non solum omni charitatis officio prosequabatur, sed illis die nocteq. inferniebat, tanta humilitate, ac charitate, ut sapius et-  
 iam plagas pure plenas lingua lingere non erubuerit, elemo-  
 synis adinuabat, et quidquid ex quotidianis cibis in elemosynam Monasterio datis habere, vel ex proprio cibo sibi subtrahere po-  
 terat, alacriter eis largiebatur. Cum vero non haberet quid illis

in eleemosynam porrigeret, misericordia commotus, profusas lacrymas emittebat. Orationi erat intentus: Disciplinis non solum se Deo magis gratum reddere procurabat, sed etiam ut proximi sui emendationem vita facilius impetraret, corpus suum domabat. Ieiunijs fere continuis carnem macerabat, sed in primis omnibus vigilijs Beatissima Virginis Maria in pane et aqua ieiunabat. Acer erat reprehensor eorum, qui contra Dei honorem, aut regulam sancti Francisci aliquid temere perpetrabant: quam non solum ipse, ut dixi, diligenter observauit, sed eam ab alijs fratribus inuiolabiliter observari curauit. Nullas umquam didicerat litteras: sed quoniam conuersatio eius caelestis potius erat, quàm terrena, cum de rebus diuinis agebat, mirificos proferebat sensus, et difficillimarum questionum articulos enodabat: ita ut inter alios, duo eruditissimi et pietate insignes viri aperte testentur, sapius illis consigisse, ut rebus difficillimis, et in Theologia abstrusis questionibus cum illo communicatis, doctiores semper euasissent, illarumq. questionum solutionibus ita mentes ipsorum acquiescissent, ut a nullo alio doctore, nec in ulla academia id habere potuerint. Illud de hoc sancto viro valde laudabile commendatur, cum adeo puro, ac simplici corde semper fuisse, ut semper omnia in bonam partem accipiens, numquam male de aliquo indicauerit, nec contra aliquem vllum malum verbum umquam protulerit. Prudentiam cum simplicitate coniunctam habebat: unde factum est, ut cum ad Insulas Canarias missus esset, Guardiani officium in illo Monasterio sibi demandatum omni cum sua laude gesserit. Multos ibidem infideles, et adhuc idola colentes ad fidem Christi adduxit: quapropter ingentes in magna Canaria persecutiones pertulit. Desiderauit ille pro Christi fide martyrium subire, et multisoties parum absuit, quin eo bono frueretur: sed Deo ita ordinante non fuit voti compos effectus.

Reuersus in Hispaniam omnibus charus, et in magna veneratione habitus in conuentu Compluten. ubi multis annis fuit commoratus, annorum plenus, in grauem infirmitatem incidit: ex qua cum se iam moriturum cognosceret, et hora mortis instaret, fratribus, qui in illo Monasterio aderant, ad se vocatis, eos ita verbis amantissimis et sanctitate plenis allocutus est, ut ex eorum oculis lacrymas excussisset. Deinde arrepta cruce lignea, quam ad caput habebat, illorum orationibus se commendans, conuersus ad

ad crucem, hac verba protulit : DVLCE LIGNVM, DVL-  
CES CLAVOS, DVL CIA FERENS PONDERA, QVAE  
SOLA FVISTI DIGNA PORTARE REGEM CAELO-  
RV M ET DOMINVM. In quibus verbis animam Deo reddi-  
dit. Obijt itaque Compluti in suo Monasterio, die Sabbati xij.  
Nouembris. M C C C C LXIII.

Omnia supradicta, Beatissime Pater, constant per plures testes  
contestes, qui de causa scientia deponunt : quorum aliqui sunt  
eiusdem religionis fratres, viri magna eruditione et integritate  
praditi, et in religione probati, quique illum per plures annos co-  
gnouerunt, et in eodem Monasterio inrinsece cum illo conuersa-  
ti sunt, quorum etiam duo Guardiani illius Monasterij fuerunt,  
et sub illorum cura beatus iste vixit. Alij vero, vnus ex ordi-  
ne Praedicatorum, alter baccalaureatus gradu insignitus.

Eius vero morte audita, ingens populorum vicinorum concursus  
est factus, in primisq. vniuersorum ordinum amplissima ciuita-  
tis, et insignis collegij Compluten. Per quatuor dies humatum, et  
quarto die resosum cadauer, iacuit insepulium per multos dies,  
non est corruptum, non emisit faetorem, vt humanorum cadaue-  
rum est conditio : sed suauissimum spirans odorem, per multos  
menses visitantium animos magna suauitate repleuit, et vsque ad  
hodiernum diem saepe ille odor ex eius sepulchro spirans sentitur :  
non rignerunt membra, vt deficiente calore rigere solent defun-  
ctorum cadauera, sed veluti viuentis flexibilia erant, et moueri  
poterant. Similem rem veluti valde mirabilem narrat S. Hiero-  
nymus in vita S. Hilarionis, quod post decem menses integrum  
fuerit inuentum eius cadauer et suauem spirans odorem. Post  
aliquod vero tempus ab huius beati obitu, Henricus IIII. Ca-  
stella Rex, beneficij memor, quod huius beati Didaci intercessionem  
et ipse et eius filia grauisime aegrotantes sanitatem a Deo recu-  
perassent : sacellum in eius honorem adificari, et in eo intra fer-  
ream arcam huius beati corpus recondi iussit : in qua diligenter  
custoditum fuit, nec vumquam visum, donec anno M D LXII.  
ad Principem D. Carolum, Compluti aegrotantem, adductum, et  
tunc cum ex illa arca educeretur, integrum omnino repperit :  
adeo vt nec pili quidam albicantes superciliorum illi defuerint.  
Hac autem omnia, qua de odore et corporis integritate dicta sunt,  
præter publicam famam, multi testes omni exceptione maiores pro-  
bant,

bant, et inter alios, unus de Societate Iesu de visu testatur. Multa miracula tam in vita, quam in morte edidit, ita ut in processu et informatione transmissa legantur fere centum triginta, et probentur: sed pauca quaedam visum est Dominis meis collegis seligere, eaq. mihi hodierno die narranda dederunt, quorum primum est.

Fuit in oppido de Duron iuuenis quaedam Catharina vocata, qua cum ingentem paralyfim pateretur, et surda etiam euassisset, et muta, nouem diebus vigilias in sacello beati Didaci ducens, dum manu eiusdem beati tangeretur, subito cessauit surditas, loquela restituta; et membra paralytica distensa sunt, liberaq. et sana omnino visa est. Quae omnia per tres testes, prater principalis dictum probantur, qui examinati fuerunt rite et recte coram Vicario Archiepiscopi Toletani: quorum primus est Ioannes de Penäluer Guardianus, secundus Ioannes de Tolosa, tertius Frater Ioannes de Medina.

Didacus quidam de Lorca, iuuenis viginti fere annorum, qui per multos annos spiritu immundo detinebatur, ita ut aliquando septies in die illum corripere, et ad terram illum illidens, veluti mortuum relinquebat, cum se beato Didaco commendasset, et in eius Cappella vigilasset, omnino liberatus fuit. Quod plene probatur per duos testes, quorum primus est ipsemet patiens, qui per extensum, et magna cum adificatione omnia narrat: secundus, qui hac omnia comprobatur est Frater Ioannes de Penäluer Guardianus.

Catharina Garcia uxor nobilis viri Bartholomaei Sanchez, cum parturiens in maximo vite periculo versaretur, iamq. morti proximam se crederet, parte habitus sibi huius Beati superimposita fetum emisit, sed mortuum: et cum ita per quatuor horas puella, quam ediderat, stetisset mortua, eius socrus, et maritus illam beato Didaco commendarunt, ut eius precibus vitam puellula a Deo impetrarent, sicut factum est. Nam illam vinam matri suae reddiderunt, baptizataq. fuit, et Maria vocata, et per multos annos vixit. Quae omnia probantur prater dictum principalis, per tres testes, quorum primus est Maria Garcia socrus: secundus, Bartholomaeus Sanchez eius maritus, quiambo testes oculati: tertius Frater Ioannes de Penäluer.

Et Domina Maria dela Pinilla, qua tam horrenda et defor-

mi paralyſi fuit affecta cum multis alijs grauiſſimis infirmitatibus , ut neminem ei ſimilem Medici ſe vidiffe atteſtarentur , mirabili modo ſanata etiam apud ſepulchrum beati Didaci eſt . Cuius beneficij memor virginitatem ſuam Deo vovit in monaſterio S. Ioannis de penitencia vocato , ubi ſanctiſſimam vitam duxit . Hoc miraculum de Domina Maria dela Pinilla probatur per octoginta fere teſtes omnes conteſtes vel de viſu , vel de fama , qui rite , et recte examinati fuerunt .

Et denique cum Carolus , Princeps Hiſpaniarum Anno M D LXII: Compluti ex grauiſſimo caſu grauiter agrotaret , nec ulla remedia illi profuiſſent , ſed ſemper in deterius rueret , et omni humano auxilio , ſic Medici teſtantur , ac plene probatur , deſtitutus eſſet : eadem illa hora , qua Medici illum moriturum pradiſerant , melius habere cepit , et intra paucas horas interceſſione huius Beati ſanatus eſt . Hac omnia optime probant Medicorum illum curantium depoſitiones , necnon patris Mantij , eius Confeſſoris , multi alij inſignes et omni exceptione maiores teſtes , prater ipſiuſmet Principis et Regis dictum , qui aperte ſe per interceſſionem huius beati viri a Deo ſanitatem recuperaviſſe , et verbis et ſcriptis pluries teſtati ſunt .

Quare Hiſpaniarum Rex cum vitam praſati Caroli ſui primogeniti a Deo ſe per interceſſionem et merita beati Didaci recuperaviſſe cognoviſſet , ſicut dictum eſt , procurauit , et hodie ſupplicat , ut ad laudem omnipotentis Dei , totius Regni conſolationem , augmentum Catholica fidei inter Sanctos referatur .

Præter hæc omnia , quæ retuli , quod mirum in modum Reuerendiſſimos Collegas meos adificauit , et in ſententiam , quam modo dicam concorditer adduxit , fuit , quod per centum et viginti tres annos ab obitu beati Didaci , durat tanta erga illum totius illius gentis deuotio , tam frequenter illius opem apud Deum implorant , tot vigilie , tot ſacrificia in eius cappella celebrantur , tot donaria illuſtriſſima ſoluendi voti cauſa in ea ponuntur : ut certe firmiter credendum ſit , non paſſurum fuiſſe Deum Opt. Max. ut per tot annos , qui memoriam hominum excedunt , gens illa Hiſpana deuotiſſima , et de Chriſtiana religione optime merita , Clerus , ac Prælati , inſigni pietate et doctrina præditi , ſic eſſent decepti , ac deluſi .

Pater Beatiſſime , ſanctitatem vitæ beati Patris Didaci , fidei  
O purita-

puritatem et integritatem , egregias virtutes , præclara et insignia miracula optime probata inuenimus . Quare vnanimis in hanc sententiam venimus , Sanctitatem Vestram ad vltiora procedere , atque hunc beatum Virum , quæ sua est feruens deuotio ; in Sanctorum numerum referre merito posse . Nos tamen omnia correctioni , et iudicio Sanctitatis Vestræ , et Sanctæ huius Scdis subijcimus .

Non dubito Beatissime Pater , me in multis in hac narratione defecisse : supplebunt optime Reuerendissimi Domini mei Collegæ . Mihi Sanctitas Vestra ignoscat , obsecro , si tantæ pronuntia tam humeris meis impari , ut debui , atque desiderari satis facere non potui .





# POMPEII A RIGONII, CONSISTORIALIS,

Et Regis Catholici Aduocati,

## Oratio

*De vita et miraculis Beati Fratris Didaci .*

Qua Regis nomine B. Didacus canonizari postulatur .  
Habita Romæ in Consistorio publico ,

Die xxv. Iunij. Anno M. D. LXXXVIII.



**C**um multis alijs in rebus Philippus Hispaniarum Rex , summam in se Dei beneficentiam agnoscit , tum inter praeipuos Regni thesauros , diuino sibi beneficio tributos , asumat , in sua ditione viros egregios extitisse : qui calesiem in terris uiuendi rationem ingressi , sibi quidem ad calum aditum aperuerunt , ceteros autem sua apud Deum gratia , suoq. patrocinio tuentur . Quamuis enim , qui humanas hasce curas exuunt , Deo prorsus addicti , non unam gentem , aut alteram solum diligant , sed diuini instar numinis , cuius spiritu ducuntur , uniuersum genus humanum suo amore , ac beneuolentia complectantur : tamen proximi cuiusque maior est charitas , ac beatarum mentium benefacendi uoluntas ad omnes , beneficia ad utentes pertinent : quos ex propinquis frequentiores esse , quàm ex alienis necesse est . Merito igitur pius , uereq. catholicus , Hispaniarum Rex beato Didaco in sua ditione orto pra ceteris gloriatur , cuius et in populis opem expertus est , et in filio primogenito iam a Medicis omnibus destituto , quemadmodum suo loco dicemus .

De huius ego uita sanctitate, uarijsq. miraculis, tuo, Pater Sancte, Regisq. iussu hodie uerba facturus, illud in primis oro, ne ex mea tenuitate sanctissimi Viri uirtutes asstimentur, neu mihi conatus, cui me imparem fateor, audacia tribuatur: sed mea potius in re tam ardua uoluntas atque alacritas commendetur, imbecillitas, parendiq. necessitas excusetur. Nam diuina mortali cuiquam assequi nefas. nec tamen, quia de diuinis digne dicere nequeas, idcirco nihil omnino dicendum: aut quia nulla illis oratio sufficiat, omnis omnino oratio deneganda. Igitur uitam eius et miranda, non omnia sed pauca de multis, quàm breuissimè, simul et uerissimè dicam: nam singula recensentem dies deficiet.

Et ex his, quæ dicentur, satis aperte liquebit Beatum hunc uirum in Sanctorum numerum referendum. Natus est beatus Didacus in Prouincia Batia, in oppido sancti Nicolai ditionis Hispalensis, honestis parentibus et Christianis: quales fuisse par est, a quibus tantus futurus uir ad pietatem informaretur. Qui uero dies eius natalis fuerit, aut quo mense, quoue anno in lucem editus, haud satis compertum habeo ex ijs, quæ uidimus, litterarum monumentis. Sed quantum ex eisdem coniectura assequi licet, natum esse credibile est, paulo ante quadringentesimum supra millesimum annum a Christo nato. Nam cum ad multam senectutem uixerit, et anno Iubilei millesimo quadringentesimo quinquagesimo in Urbem uenerit, ac duodecim post annis in celum migrauerit: necesse est natiuitatem eius incidisse in ea tempora, quæ supra memorauimus. Cum prima uero aetate sapere cepit, humana omnia diuino cultui posthabuit. Itaque ne rerum terrestrium cura a celestibus contemplandis auocaretur, continuo se ab incunte adolescentia in solitudinem, hoc est, in libertatem uindictam: atque eremum patriæ propinquam coluit, sacerdote quodam ieiuniorum, uigiliarum, continentia, atque innocentia teste ac socio. Ibi Dei diuinorumq. meditatione animum, corpus elemosinis sustentabat: dumque Deo corde aut ore gratias ageres, interim manus operi intenta haud quaquam otio languescebat: sed uaria e iunipero uascula, salina, cochlearia conficiebat, eaq. largiebatur ijs, qui uictui necessaria suppeditabant. si quid autem præterea dare uellent, id omnino recusabat. Tantis in eius moribus elucebat uirtutum omnium consensus, ut omnium in se oculos

los raperet, omnes excitaret in admirationem sui. Radix autem virtutum omnium, et quasi fundamentum humilitas, et sui contemptio, qua. eam sequitur, aliorum hominum charitas, quo nullum aptius vinculum humana societatis. Nam qui seipsum despiciat, alios suspiciat, is numquam sibi plus sumet, quam ceteris: itaque aut iniustitiam adeptus iam est, aut iniustitia valde propinquus. Humilitas in eo tanta erat, ut omnes homines sibi praeferret, inferuire omnibus cuperet, senes, iuvenes consilio atque auxilio iuaret. charitatem autem haud facile cogitatione assequi, ne dum eloqui quisquam possit. Harum virtutum fama cum virginas urbes impleisset, repente ab eremo discessit, et se ad conuentum de Arriaza ordinis sancti Francisci a Corduba non longe distantem contulit, seque in illorum ordinem admitti postulat, quos vulgo obseruantes vocant: inde ad Monasterium Complutensem eiusdem ordinis, quod est ad adem sanctae Mariae Iesu, praefectorum iussis obtemperans se transfert. Hic latior humilitatis campus, vberiorq. materia virtutum omnium. nemo constantius atque hilarius Religionis illius iugum tulit: nemo exactius omnia illius regula praescripta seruauit: nemo acrius carnis stimulos retudit: nemo eam ieiunijs ac vigilijs, flagellisq. fortius macerauit. usq. ingenitos impetus reprimeret, gelidam interdum hiemali tempore aquam ingredi non dubitauit. Tam rigida utebatur castigatione corporis, a capite ad talos usque sese flagellis lacerans, ut nemo humana illam virtute ferri posse putaret. Fortunatas aliquando Insulas petijt, quas Canarias appellant: ibi innumerabiles Canarienses ad Christianam Religionem, verumq. Dei cultum traduxit. In his Ioannem Alphonsum quendam, qui eo infidelis atque Idolorum cultor, e magna Canaria venerat: is deinde duos filios B. Didaco instruendos, et vera pietate imbuendos tradidit. In magnam inde Canariam profectus, ut incolas ad veram Religionem traheret, magnas ibi Christiana Religionis propagandae causa persecutiones pertulit: magno enim studio martyrij subeundi tenebatur, nisi illum comites a proposito auertissent, qui vereri se dicerent, ne captiuus a Canariensibus detinerentur. horum charitas B. Didacum ab eo consilio retraxis. Quodq. admirationem auget, hac omnia peragebat nulla exultus doctrina, nullis litterarum studijs eruditus, erat enim illitteratus: quam ob causam nullis umquam

sacris ordinibus initiatus est, sed, ut vocant, laicus per omnem aetatem mansit. Quin etiam Conchensi cuidam amico bonarum artium peritissimo, alijsque non paucis quaestiones difficillimas de rebus non solum ad salutem animae, sed etiam ad litterarum studiaspectantibus enodabat: quarum illi solutionem neque Salamantica neque Lutetia, neque alijs in Academijs, in quibus antea studijs operam dederant, inuenire potuerant. Cum autem omnes omnium consensu virtutibus omnibus anteiret, praecipue in eo pauperum charitas enitebat. his omnia largiebatur. quidquid vndique ab amicis, a contubernalijs, a notis ab ignotis accipere poterat, id omne in usus pauperum erogabat. cumq. quid illis daret, non habebat, una cum illis eorum miseriam deplorabat, multisq. lacrymis animi sui dolorem testabatur. Mendicorum ulcera suis manibus abstergebat. Romam venit, ut ante dictum est anno iubilei: diuersitq. in Monasterium Sancti Francisci, quod est ad adem Sancta Maria, qua dicitur Avacali. ingens ibi agrotorum et languentium numerus: magna insuper annonae caritas et penuria rerum omnium Urbem inuaserat. Didacus agrotorum cura suscepta tanta illis charitate, ac diligentia ministrabat, tantaq. affluentia rerum omnium, ut omnes, in primisq. Monasterij praefectus, mirarentur, unde illi in tantis aliorum angustijs, tanta rerum copia suppeteret: omnesq. opem illam Beati Didaci apud Deum gratia acceptam ferebant: omnes Didacum ut virum sanctum, Deoq. gratisimum mirabantur.

Complutum tandem redijt, nam singulas eius actiones persequi nimis longum, et prope infinitum esset: ibiq. deinde ad duodecim, aut tredecim annos vixit tanta cum humilitate, atque in Superiores obedientia, tanta praceptorum observantia, tanta vitae austeritate, tanto exemplo, ut ab omnibus existimatus fuerit observatione mandatorum Dei ceteris omnibus, qui ulli umquam Religioni se addixerint, praestitisse. In morbum incidit, qui et illi mortalis huius vitae finem attulit, atque ad aeternam illam ac perennem aditum patefecit. Eius morbi molestias tanta constantia tulit, ut nullum umquam doloris indicium dederit.

Suauiter astantes alloqui, solari, veniam offensionum petere non destitit, donec utroque brachio sublato, quorum alterum magna vi morbi, quod apostema dicitur, immobile fuerat, Cruentum amplexus, atque exosculatus in illa Hymni verba: DVL-

CE LIGNVM, DVLCES CLAVOS, et que sequuntur, antequam Deo reddidit anno post Christum natum millesimo quadringentesimo sexagesimo tertio. Mortuo Didaco neque artius obruerunt, et multis mensibus flexibiles manserunt, ut vivis solent. Odoris etiam suavisissimi fragantia cubiculum opplenit. Hodieque odor a nonnullis plerumque sentitur, quamquam sine ullis illum odoribus aut aromatibus sepultum fuisse constat: atque ad vitam mortui famam ingens populorum concursus est factus. Scio, Pater Beatissime, de rebus mirabilibus dicenti plerumque faciles esse audientium aures, et alioquin a tadio narrationis defendit officij necessitas: verumtamen haud quaquam concessa mihi facultate, nec audientium benignitate intemperantius abutar, sed ex ingenti miraculorum copia, quibus divinus ille vir in vita claruit, unum aut alterum breuiter attingam: itemque nonnulla de ceteris, qua post mortem evenere. Quid autem mirabilius referam, quam quod e Monasterio quodam, quod Hispani Cerraja nominant. Hispalim profectus, mulieri cuidam filiolum in furno latitantem, ibique sopore correptum, accenso dein furno atque undique conflagrante, illasum a flamma servavit. Erat misera cuiusdam muliercula septennis filius, aut paulo maior, qui saepius eius iram metuens aufugere solebat. Is cum die quodam aufugisset, non ante diem Dominicum domum redijt. tum veritus ne a matre vapularet, in furno sese abdidit. nam Mater pane coquendo seque et puerulum, et reliquam familiam sustentabat. Ibi puerum iacere mater ignorans, furnum vesperi lignis opplet, ut summo mane postridie incenderet, ac feruesaceret. Tum sedula mulier, antequam lucesceret, ignem lignis admovent, atque arida fumenta tanto impetu flammam corripunt, ut simul et puer exitus clamare inciperet, et repente furnus flammis conflagraret. Quid in tam acerbo filij casu mater faceret? quod illi auxilium ferretur? omni humana ope destituta, scissa coma, gemitu atque ululatibus domum ac viciniam omnem complet. res ad Beati Didaci aures pervenit. ille obuiam factus mulierem solatur, ac bono animo esse iubet, hortatur, ut ad eadem maiorem Beata Virginis accedat, eique se toto ex animo commendet. Non secus atque oraculo monita, relicto furno, ac filio ad maiorem Dei genitricis eadem aduolat. Quid verbis opus est, continuo Beatus Didacus, quique illi comes aderat, qui et huius rei testimonium perhibuit,

in furno illasum puerum, combustis lignis inuenerunt, adductumq. ad adem, ubi mater orabat; Canonici albis vestibus in honorem Beatae Virginis induerunt. Hoc ille miraculo cum Hispalenses omnes obstupefecisset, incredibile dictum est, quàm ipse sibi solus humilior atque abiectior videretur.

Ex eodem Monasterio cum aliquando eodem comite ad oppidum Santucar de Barrameda, absque ullo commeatu profectus esset, ipseque et comes longo itinere defessi in vicum quendam, quem Palacios vulgo dictitant, diuertissent, ut inde sibi ad victum necessaria corrogarent, neque ibi quidquam opis inuenissent, quo famem sedarent, longumq. adhuc iter superesset, comitem hortatus, ut in Deo spem haberet, alacriter via reliquum obibat, varias Deo laudes concinens. Cumq. in planitiem quandam amplam peruenissent, animaduertunt in via prope herbam, qua Marefma dicitur, mantile quoddam linteum eximio candore, in coq. panem candidum ac duos pisces recens coctos, et malum medicum et insuper vini vasculum. Id illi quamquam diuinitus oblatum rati, non confestim arripuerunt: sed vndequaque circumspectantes, an quempiam viderent, cuius illa cibaria esse possent: erat autem planities maxima, ut non minus decem milibus passuum conspici vndequaque posset, ubi neminem viderunt. Paratis sibi dapibus refecti, Deo gratias egerunt, quodq. superfuit, ibidem reliquerunt. Ac Beatus Didacus comiti gratulatus, quod sibi Deus necessaria suppeditasset, non secus atque filijs Israel in deserto, tantus in eo fidei candor, et quedam, ut ita dixerim, simplicitas inerat, ut nihil supra. Itaque varias agrotantium ac languentium species ad sanctitatis eius famam undique confluentium digito lampadis oleo inuncto, ac signo Crucis facto sanabat. Hac aliq. innumerabilia ille miracula viuens edidit. Sed et aliquid referamus ex ijs, quae summa omnium admiratione mortem eius consecuta sunt, ac potius quotidie consequuntur.

Catherina Martinex, Antony filia, ex oppido de Duron oriunda, qua cum muta surdaq. esset, ac semper paralyssi laborasset, ad corpus beati Didaci delata, ac signo Crucis eius manu signata, repente conualuit: nec tantum suis pedibus incescit, sed etiam Vicario, praenunte hac verba protulit: Laus Christo Iesu. semperq. deinceps absque ullo impedimento locuta est.

Inueni



*Iuuenis alius .xx. annorum, cum spiritu quodam immundo delineretur, ita ut sapius quotidie in terram desidens, ad pueros rapti se diceret, adductus ad Sacellum, in quo beati Didaci corpus asseruatur, ibiq. dies aliquot moratus, sanitatem pristinam recuperavit.*

*Maria Garcia, cuius nurni Catharina nomine certa ex partu perniciēs aderat, propterea quod infans in utero transuersus unum tantum pedem extulerat, in tanto puerpera discrimine beati Didaci meminit, allatumq. vestis fragmentum, qua Beatus ille vir amittus fuerat, et paululum terra, qua corpus eius tegebatur, nurni superimposuit. ita, qua diem totum in tanto periculo manserat, continuo partum edidit, mortuum quidem, sed ipsa mortis periculo liberata. Tum socrus ex tanto miraculo etiam partui vitam restitui pra fidei seruire a Deo petere ausa, vouens, si id impetrasset, in sacello B. Didaci se nonem diebus euigilaturam, voti compos facta, infantem, qua per quattuor horas mortua fuerat cum reuixisset, in sacro Baptismatis lauacro Mariam de suo nomine dici voluit.*

*Aluarius de Gaa, Lusitanus, ancilla suae misericordia motus, qua filiam paucis ante horis mortuam miserabilem in modum lugebat, eam hortatur, ut puellam ad corpus beati Didaci deferret, atque a Deo peteret, ut ob eius merita vitam filia restitueret. Ancilla cum domini monitis paruisset, quam puellam exanimem domo extulerat, eam uiuentem ac validam domum reduxit.*

*Quamuis autem mortuos in vitam reuocare inter praecipua Dei miracula censeatur, haud scio, an maius etiam censendum sit, quod virgini cuidam Hispana, cui Maria de Pinilla nomen erat, non unam tantum ut alijs, sed multiplicem vitam reddidit: tot illa morbis grauisimis laborabat, tam intolerandis febribus vexabatur, tam acerbis atque assiduus capitis doloribus torquebatur, ut, si ita dici fas est, multas quotidie mortes experiretur. Ad hac humero, crure, tibia debilitata multarum corporis partium usum amiserat. Tot modis afflictam Virginem cupido incescit, quando nulla iam humana ope sanari se posse sperabat, ad beati Didaci corpus adeundi, ab eoq. auxilium implorandi. Ita uti petierat eo delata, quid memorem qua puella miranda viderit atque audierit.*

rit. Ea nec referre necesse habeo, et certis extant gravissimorum hominum testata monumentis. In summa quæ per undecim menses varijs cruciatibus exagitata fuerat, ubi ad Beatum hunc virum accessit, et morbum toto corpore depelli, et suum membris omnibus vigorem restitui sensit, ac suis pedibus deinceps incescit, Deum laudans, ingentesq. beato Didaco gratias agens, cuius precibus ac meritis a Deo salutem impetrasset. atque hoc nostra memoria factum est anno humana salutis millesimo quingentesimo quinquagesimo quinto.

Huic miraculo recentius aliud subiiciam, quod plerique meministis. factum est enim anno millesimo quingentesimo sexagesimo secundo.

Serenissimus Hispaniarum Princeps Carolus olim adolescens, Compluti, cum in Regia luderet e scalis quibusdam supinus cecidit, ac tam graviter offendit, ut ingens in capite vulnus acciperet, cum et letale vulnus omnibus videretur, et de salutis tantis Principis ageretur, existimandum est humanissimum Regem, ac liberorum amantissimum nihil intentatum reliquisse, quod filio primogenito in tanto discrimine adiuventum esse posset. Medicos undique accersit, remedia quacumque adhiberi possunt humanitus, adhibentur, omnia tamen vulnere cedunt, itaque desperata filij salute Rex secessit, sepultura locus destinatur: pauci lugubres funeralia, exequia tanto Principe digna magna cum cura parantur. Postremo tamen, astantium quorundam animus ad Beatum Didacum se convertit, postulatumque est, ut eius corpus in Cubiculum Principis deferretur, et prope eum locaretur. Postquam id factum est, paucorum horarum spatia Princeps meliuscule se habere, ac potius reviviscere cepit: ut omnibus liquido constaret, vitam ei non humanitus, sed beati Didaci merito diuinitus restitutam.

Igitur Beatissime Pater, qui ab incunte ætate sese ab humanis curis omnibus abdicavit, qui vitam suam omnem Deo dicavit, qui caelestem in terris vivendi rationem coluit, qui charitate in homines, in Deum pietate ceteris omnibus præstitit, qui divinas leges omnes adimplevit, qui suscepta Religionis iugum non exatle solum, verum etiam iucunde tulit, qui præscripta eius omnia ac mandata servavit, cuius vita sanctitatem et ex actionibus eius nominis, et ex innumeris miraculis comprobari quotidie videmus;

ex quibus ego tamen nonnulla recensui, quæ tamen eorum millesimam partem attingi: quem Deus acceptissimum sibi æterna beatitudine perfrui non obscuris indicijs, sed signis certissimis clarissimisque monstravit: quem a Sanctissimis Patribus maioribus tuis Pio IIII, Pio V, Gregorio Decimotertio, Pontificibus Maximis, Hispaniarum Rex ac potius Hispania tota petijt in Sanctorum numerum referri: quem referendum Sacri Palatii causarum Auditores causa ab eisdem Pontificibus delegata viri sapientissimi ac divini, humaniq. iuris peritissimi censuerunt. quem etiam ex hoc supremo Christiani orbis Concilio delecti Patres eadem causa diu multumq. cognita eisdem honoribus dignum iudicauerunt: eundem idem Philippus Hispaniarum Rex non minus re, quam cognomento Catholicus beati Didaci, tuæq. gloriæ studiosissimus, enixe rogat, ut Sanctorum numero tandem adscribi declares, ut quorum in calo consuetudine fruatur, eorumdem numero adscriptum in terris Ecclesiæ debitis honoribus ac laudibus prosequatur. Hoc si ab ullo ei Pontifice debebatur, abs te Pater Sancte præcipue debetur, qui et eandem regulam coluisti, et eius vita imitatione ad istud humanarum rerum fastigium ascendiisti. Hoc abs te suo quodammodo iure postulant pii viri omnes, qui eiusdem Regula contubernio utuntur, ne huiusmodi quasi Stellarum lumini, quæ e sancta ista domo emicant. ignoratione hominum, ac tenebris officiatur. Hoc abs te Toletana Ecclesiæ, hoc Complutensis petit Vniuersitas, quæ tali Alumno merito gloriantur: hoc denique Hispani omnes optimum ac sapientissimum Regem secuti summis precibus obsecrantur: tibi, atque huius Sanctæ sedis perpetuam beneficij memoriam et gratitudinem pollicentur.

F I N I S.



ANTONII BVCCAPADVLII  
SECRETARII APOSTOLICI,  
SANCTISSIMI D. N. SIXTI V.  
NOMINE, RESPONSIO.



IN TVRNAM Philippi Regis Catholici postulationem de beato Didaco, viro et vitæ sanctitate, et miraculorum copia, et magnitudine clarissimo in Sanctorum catalogum ascribendo, dignissimam iudicat Sanctissimus Dominus noster perpetua Regis ipsius pietate et gloria. Qui enim curam, cogitationemq. omnem habet locatam et fixam in Catholica religionem tuendam et propagandam, qui et semper antea, et hoc maxime tempore summis opibus contendit, ut deleta hæreticorum perfidia fides Catholica in veterem dignitatem, atque amplitudinem vindicetur. cuius omnia tum belli, tum pacis studia ad Dei gloriam referuntur, inq. ea consumuntur: hunc censet Sanctissimus Dominus noster conuenire; de augenda etiam quodammodo cælestium gloria cogitare et postulare, si ita videatur Romano Pontifici, cuius ea potestas, atque actio propria est, ut ei Viro, cui nihil fuisset in hac vita Deo charius, quiq. ipse Deo charissimus fuisset, is honos tribuatur, qui possit maximus adhiberi, ut Pontificis scilicet ipsius decreto declaretur, Sanctus esse ex eorum numero, quos Ecclesia quotidianis honoribus veneratur. Et beati quidem illius vita, ac miracula aliquot de multis nunc sunt diserta, et graui oratione exposita. Agit autem Sanctissimus Dominus noster Deo gratias immortales, quod tanta cum sui nominis gloria, cum Ecclesiæ lætitia, cum piorum fructu cumulet seruos suos summis virtutibus, velitq. illos summa apud omnes in veneratione, atque admiratione esse. Laudatur Deus in sanctis suis, ac mirabilis prædicatur; proponitur auxilium ad implorandum, exemplum ad imitandum, segnities nostra ad accusandum, dum agnoscimus tanto nos illis inferiores esse, tamq. longe ab illorum perfectione abesse. Sed facit rei magnitudo, ut censeat Sanctissimus Dominus noster de Regis postulatione esse etiam atque etiam cogitandum, cumq. suis fratribus deliberandum. Hortatur igitur eos, monetq. ut de actis beati Didaci, quæ confecta sunt, quam diligentissime considerent: quodq. ipse iam pridem facit, Deum orent, e cuius vultu debent hominis iudicia prodire, ut ostendat quid facto maxime opus sit, actionemq. hanc omnium grauissimam totam dirigat ad suam gloriam, sanctæq. Ecclesiæ suæ fructum, atque amplitudinem.

*Pf. 110.  
et 67. b.  
Bernar.  
in vigil.  
SS. Petri,  
et Pauli.*

*Pfal. 116.*

